



*Kwin bilong Heaven,
Mama bilong Marimari*

OL LITANI BILONG SANTU MARIA

FR. TOMÁS RAVAIOLI, IVE

FR. TOMÁS RAVAIOLI, IVE

*Kwin bilong Heaven,
Mama bilong Marimari*

OL LITANI BILONG SANTU MARIA

Imprimatur: ✠ Francis Meli
Bisop bilong Vanimō

© IVE Fathers in Papua New Guinea
ive.png@gmail.com

*Dispela buk i kamap
olsem «**tok tenkyu**»
i go long santu Maria.*

Insait

Tok i go pas.....	1
Ol litani bilong santu Maria.....	3
1 - Santu Maria.....	7
2 - Santu Mama bilong God	11
3 - Santu Virgo, yu go pas long lain bilong ol virgo	16
4 - Mama bilong Krai.....	20
5 - Mama bilong Sios.....	25
6 - Mama bilong grasia bilong God	30
7 - Mama i klin olgeta.....	34
8 - Mama i klin oltaim.....	38
9 - Mama i virgo oltaim	42
10 - Mama Imakulata	48
11 - Mama, yu gutpela tru	54
12 - Mama, pasin bilong yu i stret olgeta.....	58
13 - Mama bilong gutpela tingting	63
14 - Mama bilong God i kamapim olgeta samting.....	67
15 - Mama bilong Sevia	71
16 - Mama bilong marimari.....	75

17 - Virgo i save skelim gut ol samting	80
18 - Virgo, mipela i mas onarim yu	84
19 - Virgo, mipela i mas litimapim nem bilong yu	88
20 - Virgo, yu strongpela tru.....	93
21 - Virgo, yu pulap long marimari	100
22 - Virgo, yu bihainim God gut	105
23 - Eksampel bilong stretpela pasin	110
24 - As bilong gutpela na stretpela tingting.....	114
25 - As bilong amamas bilong yumi.....	119
26 - Spiritual meri.....	123
27 - Maria, mipela i mas onarim yu.....	127
28 - Maria, devosen bilong yu i bikpela tru.....	132
29 - Rosa mistika	136
30 - Taua bilong Devit.....	141
31 - Taua i waitpela olgeta.....	145
32 - Haus gol	149
33 - Bokis Kontrak bilong Bikpela.....	153
34 - Dua bilong heven	159
35 - Sta bilong moning	163
36 - Helpim bilong ol sikmanmeri.....	167
37 - Ples hait bilong ol sinmanmeri.....	172
38 - Strong bilong ol manmeri i bel hevi.....	176
39 - Helpim bilong ol Kristen manmeri.....	180
40 - Kwin bilong ol ensel	185

41 - Kwin bilong ol Tumbuna bilong Israel.....	191
42 - Kwin bilong ol profet	196
43 - Kwin bilong ol Aposel	201
44 - Kwin bilong ol martir	207
45 - Kwin bilong ol santu i kisim hevi long bilip bilong ol	213
46 - Kwin bilong ol virgo	218
47 - Kwin bilong ol santu	223
48 - Kwin i no gat sin bilong Adam na Iv	227
49 - Kwin i go bek long heven	231
50 - Kwin bilong Rosari	236
51 - Kwin bilong ol famili.....	241
52 - Kwin bilong bel isi.....	245

Tok i go pas

Dispela buk i kamap olsem «tok tenkyu» long santu Maria, long wanem em i save pulapim yumi long planti grasia na blesing bilong heven. Jisas yet i bin givim mama bilong em long yumi, bai em i gutpela mama bilong yumi tu. Na Maria i save inapim gut dispela wok mama bilong em, olsem na olgeta de bilong laip bilong yumi em i save sambai long yumi na mekim gut long yumi. Maski ai bilong yumi i no inap lukim em, bilip bilong yumi i tok: oltaim santu Maria i stap klostu long yumi!

Plantu manmeri bilong ol arapela lotu i save sutim spia long santu Maria, long wanem ol i tok olsem yumi ol Katolik i bilipim planti stori bilong santu Maria, tasol ol dispela stori i no i stap long Buk Baibel. Olsem na planti taim ol i save tok olsem yumi ol Katolik i mas yusim yusim Buk Baibel tasol. Tasol dispela toktok bilong ol i kranki olgeta, long wanem yumi ol Katolik tu i save yusim Buk Baibel. Yumi no ken lustingting

olsem ol bikpela saveman bilong Buk Baibel em ol Katolik tasol. Na olgeta skul bilong Katolik Sios i kam long Buk Baibel, long wanem Katolik Sios tasol i gat rait long skulim long as bilong olgeta tok i stap long Buk Baibel. Olsem na long dispela buk yumi bai yusim Buk Baibel tu, na yumi bai i skelim ol hap tok bilong Buk Baibel yet i toktok long santu Maria.

Insait long dispela buk yumi bai i painim eksplanesen bilong wan wan litani bilong santu Maria. Planti taim yumi ol Katolik i save beten Korona, na taim Korona i pinis, yumi beten ol litani bilong santu Maria. Olsem na em i gutpela long yumi save gut long mining bilong ol litani wan wan, long wanem wan wan litani i gat skul bilong em yet. Na taim yumi wok long ritim dispela buk na kisim save long ol samting bilong santu Maria, orait laik bilong yumi i go long em bai i kamap bikpela moa yet!

Olsem na dispela buk i gat wanpela as tasol: em i laik helpim ol manmeri long kisim save long Maria na laikim em moa moa yet, long wanem devosen long Maria em i gutpela rot bilong i go long heven. Na taim yu wok long ritim dispela buk, orait yu ken beten wanpela Ave Maria bilong helpim pris i bin raitim dispela buk.

Ol litani bilong santu Maria

Yumi save beten ol litani bilong santu Maria long taim bilong beten Rosari. Na em i gutpela long yumi mekim olsem, long wanem dispela em i wanpela kastam bilong Katolik Sios i kam long bipo tru! Olsem na taim yumi onarim nem bilong santu Maria long ol litani, orait yumi joinim ol Katolik manmeri bilong bipo tru i kam inap nau, na yumi olgeta i kamap wanpela famili tasol.

Tasol pastaim long yumi go insait long mining bilong wan wan litani, em bai i gutpela long yumi toktok liklik long mining na stori bilong ol litani bilong santu Maria.

Dispela wod «litani» i kam long Tok Gris na i min «prea», olsem na taim yumi tok «litani bilong santu Maria» em i wankain olsem yumi tok «prea long santu Maria». Ol litani em ol sotpela prea yumi yusim bilong litimapim nem bilong God, na tu bilong onarim ol santu. Na namel long ol santu, Maria i go pas.

Na ol litani i kamap olsem wanem? Bipo ol manmeri i no save gut long rait na long rit, olsem na ol i painim hat long ritim ol buk bilong Jisas na bilong ol santu. Na tu bipo i no gat planti buk, long wanem ol i no save salim ol buk long ol stua olsem nau. **Olsem na ol litani i save helpim ol manmeri long beten gut, long wanem ol litani em i isi long holim long tingting.**

Pasin bilong beten ol litani i kam long bipo tru! Oltaim ol Katolik manmeri i bin beten ol litani bilong Jisas, bilong Holi Spirit, bilong santu Maria na bilong ol santu! Olsem na taim yumi beten ol litani, orait yumi bihainim pasin bilong ol gutpela Katolik manmeri bilong bipo tru i kam inap nau. I gat ol buk bilong bipo tru i soim olsem long yia 200 samting ol Katolik manmeri i save beten pinis ol litani bilong ol santu! Olsem na pasin bilong beten ol litani em i olpela tumas, long wanem em i gat 1200 yia!

Ol manmeri bilong bipo i beten ol litani long taim bilong prosesio, na ol i save singim ol. Ol i save mekim olsem: pris i save singim wanpela litani, na ol manmeri i save bekim «Pre bilong helpim mipela». Tasol nau yumi no save mekim olsem, long wanem i no pris tasol i ken kolim ol litani. Nogat. Nau olgeta manmeri i ken kolim ol litani na go pas long beten.

Stori bilong ol litani bilong santu Maria

Ol litani bilong santu Maria i gat nem bilong ol yet. Trupela nem bilong ol em i olsem: **Litani bilong Loreto**. Olsem wanem? Harim dispela stori: long yia 1291 ami bilong ol Muslim i go insait long Holi Lan, na ol Muslim i birua tru bilong Jisas na bilong Katolik Sios, olsem na ol i wok long bagarapim olgeta haus lotu bilong ol Katolik. Ol Muslim i no marimari long ol Katolik manmeri na long ol haus lotu, olsem na ol i kilim planti tausen Katolik manmeri na ol i bagarapim tru ol haus lotu bilong ol. **Tasol i no longtaim bikpela mirakel i kamap!** Long yia 1294 wanpela ami bilong ol ensel bilong God i kisim trupela haus bilong Holi Famili long Nasaret na karim i go long kantri Itali, bai ol Muslim i no ken bagarapim em, long wanem dispela haus em i holi tru! I gat planti tausen manmeri i bin witnesim dispela mirakel, na ol i tok olsem ol i lukim ol ensel long heven i karim haus bilong Nasaret long han bilong ol! Olsem na ol ensel i putim haus bilong Nasaret long wanpela ples long kantri Itali. **Nem bilong dispela ples em Loreto.**

Olsem na long ples Loreto ol Katolik manmeri i bin wokim wanpela traipela haus lotu, na liklik haus bilong Nasaret i stap insait long em. Olsem na haus lotu bilong Loreto i kamap nambawan haus lotu bilong santu Maria long kantri Itali.

Orait i no longtaim long dispela mirakel i kamap, bisop bilong Loreto i bungim ol naispela nem ol manmeri i save givim long santu Maria, na em i mekim wanpela lista. Em i salim dispela lista i go long Papa Santu, na Papa Santu i givim tok orait bai olgeta Katolik manmeri bilong olgeta hap bilong graun i ken yusim long taim bilong beten. Na dispela lista i kam inap nau, na em ol litani bilong santu Maria yumi save beten nau long Papua Niugini.

Na pastaim long yumi go insait long mining bilong wan wan litani, orait yumi laik givim wanpela toksave. Namba bilong ol trupela litani bilong Loreto em i 52, tasol ol manmeri i bin tanim ol litani long Tok Pisin, ol i bin tanim 24 tasol. Olsem na long dispela buk yumi bai i painim planti nupela litani bilong santu Maria, na yumi mas save olsem ol dispela nupela litani yumi painim insait long dispela buk, em ol trupela litani bilong santu Maria i kam long bipo tru!

Santu Maria

(Holy Mary)

Namba wan samting yumi mekim taim yumi statim ol litani, em i olsem: yumi kolim nem bilong santu Maria, na yumi tok: «Santu Maria», na bihain yumi bekim: «Pre bilong helpim mipela».

Pastaim yumi mas tok olsem God tasol em i Santu Olgeta. Buk Baibel em i klia tumas, na planti taim i tok olsem God tasol em i as bilong olgeta samting i holi. Long Buk bilong Profet Aisaia i gat tok olsem: *...mi lukim Bikpela i sindaun i stap long sia king bilong em. (...) Na bikpela lain ensel i raunim em i stap. (...) Na ol i singaut long ol yet olsem: «**Bikpela em i holi, em i holi, em i holi. Bikpela I Gat Olgeta Strong em i holi. Bikpela lait na strong bilong em i inapim olgeta hap bilong graun**» (6:1-3).* Buk Baibel i tok olsem God tasol em i «*holi, holi, holi*», na ol ensel i

mekim dispela tok 3-pela taim, long wanem ol i laik soim olsem God tasol em i holi olgeta, na i no gat wanpela man o meri o ensel i holi olsem em. Nogat tru.

Santu Maria em i holi tru

God em i gutpela tumas na em i laikim ol manmeri wantaim olgeta strong bilong em, olsem na em i save helpim ol manmeri long kamap holi tu. God tasol em i holi olgeta na em i as bilong olgeta samting i holi, tasol em i save givim dispela pasin holi long ol manmeri em i save laikim tumas. Na namel long ol manmeri God i save i laikim tumas, santu Maria em i nambawan tru. Olsem na God yet i bin givim dispela pasin holi long Maria, na long dispela as tasol yumi tok olsem Maria em i santu tru, na yumi kolim em «Santu Maria».

Yumi ol Katolik i no ken paul: **pasin holi bilong santu Maria i kam long God yet.** Yes, long wanem Maria em i no kamap santu long strong bilong em yet. Nogat. Maria i kamap santu long wanem God yet i bin pulapim em long olgeta grasia na blesing.

Na namel long olgeta santu i stap long heven santu Maria i go pas. Olsem wanem? Long wanem God yet i bin banisim em long olgeta sin na long olgeta samting nogut bilong Satan. Olsem na Satan i no bin inap long bagarapim sol bilong santu

Maria long sin. Nogat tru. Maria i winim Satan, long wanem Maria i no bin gat sin long sol bilong em, na sol bilong em i klin olgeta oltaim.

Olgeta yia long de 8 bilong mun Disemba yumi ol Katolik i save amamas na selebretim Bikpela Pestode bilong «Maria i klin olgeta», o sampela manmeri i save kolim pestode bilong «Maria i no gat sin». Long Tok Inglis ol i save kolim «Pestode bilong *Immaculate Conception*». Wanem as bilong dispela pestode? Yumi tingim olsem God yet i bin banisim Maria long sin bilong Adam na Iv, olsem na sol bilong Maria i klin olgeta oltaim. Yumi ol manmeri i gat sin bilong Adam na Iv, olsem na taim mama i karim yumi, orait yumi gat sin long sol bilong yumi. Tasol Maria nogat, long wanem God yet i bin banisim em long dispela sin. Na God i mekim olsem long wanem long eterniti God i save pinis olsem dispela meri bai i kamap bilong Jisas, na Jisas em i God tru, olsem na God yet i mekim Maria i stap holi olgeta, bai mama bilong Jisas i no ken i stap doti long sin bilong Adam na Iv.

Olsem na oltaim yumi mas kolim nem bilong santu Maria, long wanem God yet i bin mekim em i kamap santu, na God i laikim em moa long olgeta samting. Na taim yumi kolim nem bilong Maria, orait wantu tasol yumi bai i painim bel isi na amamas. Santu Bernard i tok olsem: «Nem bilong Maria i save givim bel isi long ol manmeri i bel hevi. Nem bilong Maria em

i olsem marasim i save oraitim lewa bilong ol manmeri i daun tru na i karim hevi. Nem bilong Maria em i olsem kaikai i save strongim ol manmeri i wik tumas na i painim hat long bihainim ol gutpela pasin». Olsem na yumi mas bihainim dispela gutpela toktok bilong santu Bernard na kolim nem bilong Maria oltaim! Yumi mas kolim nem bilong em long gutpela taim na long taim nogut, long taim bilong bel isi na long taim bilong bel hevi, long taim bilong sori na long taim bilong amamas.

Na santu Bernard i tok moa olsem: «Nem bilong Maria i save oraitim olgeta samting nogut long laip bilong yumi, na em i save daunim ol laik nogut bilong bodi bilong yumi. Oltaim maus bilong yumi i mas kolim nem bilong Maria, na wantu em bai i kam na helpim yumi. Nem bilong Maria i save givim lait. Nem bilong Maria i save givim grasia. Nem bilong Maria i save givim marimari. Nem bilong Maria bai i helpim yumi long go long heaven».

Santu Mama bilong God

(Holy Mother of God)

Dispela em i namba 2 nem yumi save givim long santu Maria long taim yumi beten ol litani. Yumi save kolim em «Santu Mama bilong God».

Dispela nem bilong «Mama bilong God» i kam long Buk Baibel yet. Na dispela nem i winim tru olgeta nem bilong dispela graun, long wanem namba bilong Mama bilong God i winim tru namba bilong olgeta ensel bilong heven. **Na dispela namba bilong «Mama bilong God» em i as bilong olgeta gutpela samting i stap long Maria.** Na yumi ol Katolik i mas save gut long dispela samting, long wanem planti manmeri bilong ol arapela lotu i save sutim spia long Maria, long wanem ol i no klia long dispela samting.

Buk Baibel i tok olsem Maria em i Mama bilong God

Na Buk Baibel i tok olsem Maria em i Mama bilong God, o nogat? Pastaim yumi mas tok olsem Buk Baibel i tok klia olsem Jisas em i God tru. Yes, long wanem Jisas em i no wanpela man nating. Nogat olgeta. Long Buk Baibel em i klia olsem Jisas em i Pikinini bilong God Papa, olsem na Jisas tu em i God wankain olsem Papa bilong em. Jisas em i trupela man, tasol em i trupela God tu. Jisas em i God wankain olsem Papa na Holi Spirit. Na namba na strong na glori bilong Jisas em i wankain olsem namba na strong na glori bilong God Papa na God Holi Spirit.

Orait, **Buk Baibel i tok olsem Maria em i trupela mama bilong Jisas, na Jisas em i God tru, olsem na yumi gat olgeta rait long tok olsem Maria em i trupela mama bilong God.**

Buk Baibel i tok klia olsem Jisas i kamap man long bel bilong Maria, na Maria i karim em, olsem na Buk Baibel yet i soim yumi olsem Maria em i mama bilong Jisas, na Jisas em i God tru. Yumi no inap long skelim olgeta hap bilong Buk Baibel wan wan, tasol yumi lukim Gutnius bilong santu Matyu tasol. Matyu i tok klia olsem:

- Matyu 1:17: *Na **Maria i karim Jisas**, ol i save kolim em Krai, em man God i makim bilong kisim bek ol manmeri bilong em.*

- Matyu 1:18: *Stori bilong Jisas Krai i kamap, em i olsem. **Mama bilong em, Maria...***

- Matyu 1:24: ***Maria i karim pikinini man...***
- Matyu 2:1: ***Maria i karim Jisas long taun Betlehem long distrik Judia...***
- Matyu 2:11: ***Ol saveman i go insait long haus, na ol i lukim pikinini wantaim mama bilong em Maria...***

Tasol long Gutnius bilong santu Luk i gat tupela hap we em i klia tumas olsem Maria em i trupela Mama bilong God.

1) Long sapta 1 i gat stori bilong Ensel Gebriel i bringim tok long Maria, na ensel i tokim Maria olsem: «*Harim. Yu bai i kisim bel na karim wanpela pikinini man. Na yu mas kolim nem bilong em Jisas. (...) Na bai ol i kolim em Pikinini bilong God Antap Tru. (...) Holi Spirit bai i kam long yu, na strong bilong God Antap Tru bai i karamapim yu. Olsem na dispela pikinini bihain bai yu karim, em bai i stap gutpela na stretpela man bilong God, na ol bai i kolim em Pikinini Bilong God*» (Luk 1:31-35).

Long dispela hap bilong Gutnius bilong santu Luk em i klia olsem: **Maria i kisim bel long Holi Spirit, na dispela pikinini i stap long bel bilong Maria em i Pikinini bilong God Antap Tru**. Olsem na dispela pikinini i stap long bel bilong Maria em i trupela pikinini bilong Maria na trupela pikinini bilong God Papa. Jisas i no pikinini bilong God Papa tasol. Nogat tru! Jisas em i trupela pikinini bilong Maria tu!

2) Long sapta 1 i gat stori bilong Maria i go lukim kandere bilong em, Elisabet. Na santu Luk i tok: *Elisabet i harim gude bilong Maria, na pikinini i stap long bel bilong Elisabet em i kalap. Na Holi Spirit i pulap long Elisabet, na em i singaut strong tumas, na i tok: «God i bin mekim gut tru long yu na givim yu blesing i winim blesing em i givim long ol arapela meri. Na dispela pikinini i stap long bel bilong yu, em tu i kisim blesing bilong God. Mi husat na mama bilong Bikpela bilong mi em i kam long mi?»* (Luk 1:41-43).

Long dispela hap bilong Gutnius em i klia olsem **Holi Spirit i pulap long Elisabet, na Elisabet i kolim Maria «Mama bilong Bikpela»**. Na yumi save pinis olsem dispela nem «Bikpela» em i wankain olsem «Lord», na Buk Baibel i save givim dispela nem long God tasol. God tasol em i Bikpela na Lord bilong yumi. Olsem na Holi Spirit yet i bin mekim Elisabet i kolim Maria «Mama bilong Bikpela», na **dispela nem «Mama bilong Bikpela» em i wankain olsem «Mama bilong God»**. Na em i nais tru, long wanem Buk Baibel i tok klia olsem Elisabet i no mekim dispela toktok long tingting bilong em yet. Nogat tru! **Holi Spirit yet i bin pulap long Elisabet, na Holi Spirit yet i tok olsem Maria em i mama bilong Bikpela bilong yumi.**

Tasol long bipo tru i kam inap nau planti Kristen i no Katolik i save tok olsem Maria em i no mama bilong God. Ol i save tok

olsem Maria i karim Jisas, tasol em i no karim God, long wanem God i no gat mama bilong em. Dispela tok bilong ol dispela Kristen i kranki olgeta, long wanem yumi ritim pinis olsem Buk Baibel yet i save kolim Maria «*Mama bilong Bikpela*», na Buk Baibel yet i tok olsem dispela pikinini i stap long bel bilong Maria em i Pikinini bilong God Antap Tru. Olsem na sapos yumi tok olsem Maria em i mama bilong Jisas, orait yumi mas tok tu olsem Maria em i mama bilong Pikinini bilong God, na God Pikinini na God Papa i wankain tasol. Jisas yet i tok: «***Mi wantaim Papa mitupela i wanpela tasol***» (Jon 10:30).

Olsem na long yia 431 planti bisop bilong olgeta hap bilong graun i bung wantaim long ples Efesus aninit long Papa Santu, na ol i paitim tok long dispela samting. Ol i kolim dispela kibung bilong ol olsem «Kaunsel bilong Efesus». Olsem na ol bisop na Papa Santu i askim ol yet olsem: «Em i orait long yumi tok “Maria em i Mama bilong God”, o yumi mas tok “Maria em i mama bilong Jisas” tasol?». Na ol bisop na Papa Santu i tok klia olsem: yumi ol Katolik i mas tokaut olsem santu Maria em i trupela Mama bilong God! Olsem na long bipo tru i kam inap nau yumi ol Katolik manmeri i save kolim Maria «Mama bilong God», long wanem em i karim Jisas, na Jisas em i God tru na namba 2 persona bilong God Triwan.

Santu Virgo, yu go pas long lain bilong ol virgo

(Holy Virgin of virgins)

Dispela litani i min olsem pasin virgo bilong Maria i no wankain olsem pasin virgo bilong ol arapela manmeri. Nogat tru. Planti manmeri bilong dispela graun i save i stap virgo, long wanem ol i no save givim ol yet long wanpela man o meri. Tasol dispela litani i min olsem pasin virgo bilong santu Maria em i narakain olgeta.

Olsem wanem na pasin virgo bilong Maria i winim tru pasin virgo bilong ol arapela manmeri? **Long wanem Maria em i virgo na mama!** Ol meri i stap virgo i no inap long karim pikinini, tasol Maria i stap virgo na em i kamap mama, olsem na dispela samting i mekim pasin virgo bilong Maria i narakain olgeta!

Pastaim yumi mas tok olsem long taim Maria em i wanpela yangpela gel tasol, em i bin mekim promis bilong i stap virgo oltaim. Em i mekim olsem long wanem em i laik givim lewa na bodi bilong em olgeta long God tasol, olsem na em i no laik givim em yet long wanpela man. Stori bilong dispela promis em i bin mekim i no i stap long Buk Baibel, tasol olgeta santu na saveman bilong Sios i tok olsem dispela stori i kam long Tradisen bilong Katolik Sios.

Na Katolik Sios i skulim yumi olsem Maria i bin i stap virgo oltaim. Em i bin i stap virgo pastaim long em i karim Jisas. Em i bin i stap virgo long taim em i karim Jisas. Na em i bin i stap virgo bihain long em i karim Jisas.

Maria i bin karim ol arapela pikinini tu?

Planti manmeri bilong ol arapela lotu i save sutim spia long santu Maria na mekim kain kain rabis toktok long em, long wanem ol i tok olsem Maria i bin i stap virgo long taim em i kisim bel long Holu Spirit, tasol bihain em i bin karim ol arapela pikinini, olsem na em i bin lusim pasin virgo bilong em. Na ol dispela manmeri i save tok olsem Buk Baibel yet i tok long Maria i bin karim ol arapela pikinini. Long Gutnius bilong santu Luk i gat tok olsem: *Mama wantaim ol brata bilong Jisas ol i kam bilong lukim em. (...) Sampela man i tokim*

Jisas olsem: «Mama bilong yu wantaim ol brata bilong yu ol i sanap ausait, na ol i laik lukim yu» (8:19-20).

Olsem wanem nau? Maria i bin karim ol arapela pikinini tu, o nogat? Yumi ol Katolik manmeri i mas sanap strong na i tokaut klia olsem: nogat tru! **Maria i no bin karim ol arapela pikinini! Maria i bin i stap virgo oltaim!**

Orait, olsem wanem na Buk Baibel i toktok long ol brata na susa bilong Jisas? Bilong bekim dispela askim yumi mas save gut long kastam bilong ol manmeri bilong Israel bilong bipo. Na kastam bilong ol manmeri bilong Israel i wankain olsem kastam bilong yumi, hia long Papua Niugini. Namel long yumi planti taim yumi save kolim «brata» o «susa» long ol kasin na kandere bilong yumi. Na planti taim yumi save kolim «papa» o «mama» long ol ankol na anti bilong yumi tu. Na taim yumi kolim «brata» long wanpela kasin, yumi no min olsem dispela kasin em i trupela pikinini bilong mama bilong yumi. Nogat. Dispela kasin i gat papamama bilong em yet, na yumi gat papamama bilong yumi yet. Papamama bilong kasin i no wankain olsem papamama bilong yumi. Tasol long kastam bilong yumi, yumi save kolim ol kasin olsem «brata», maski papamama bilong ol i no wankain olsem papamama bilong yumi. Orait wankain samting i kamap long Jisas! Ol dispela man na meri Buk Baibel i kolim «brata na susa bilong Jisas» i no trupela brata o susa bilong em. Nogat tru! Ol dispela lain i no trupela pikinini bilong

santu Maria na santu Josep. Nogat olgeta! Ol dispela lain i wanblut bilong Jisas tasol, olsem na ol i kasin na kandere bilong em. Tasol long kastam bilong ol Juda ol i save kolim ol «brata na susa», olsem na planti manmeri i save kisim kranki dispela tok bilong Buk Baibel, na tingting bilong ol i paul olgeta.

Olsem na oltaim yumi mas sanap strong long bilip bilong yumi na i tokaut strong olsem: Maria em i virgo oltaim! Em i virgo pastaim long em i karim Jisas, em i virgo long taim em i karim Jisas, na em i virgo bihain long karim Jisas, na inap long indai bilong em!

Mama bilong Krai

(Mother of Christ)

Long taim bilong beten ol litani, yumi save givim kain kain nem long santu Maria. Na sampela taim ol dispela nem i luk olsem ol i wankain tasol. Kain olsem taim yumi kolim Maria «Mama bilong Krai» na «Mama bilong Sevia», i luk olsem dispela tupela nem i wankain tasol. Tasol nogat. Wan wan nem bilong Maria i gat mining bilong em yet.

Long dispela litani yumi kolim Maria em i «Mama bilong Krai», na bilong save long as o mining bilong dispela nem, orait yumi mas save pastaim long mining bilong dispela tok «Krai».

«**Krai**» **em i wanem samting?** «Krai» em i wanpela wod i kam long Tok Gris, na em i wankain olsem dispela wod «Mesaia». «Krai» na «Mesaia» i wankain tasol, tasol wanpela i kam long Tok Gris, na narapela i kam long Tok Hibru, tasol mining bilong

tupela i wankain. Na sapos yumi laik tanim dispela tok «Krais» i go long Tok Pisin, orait yumi mas tok olsem «Krais» i min olsem «man ol i bin kapsaitim wel antap long het bilong em».

Na wanem mining bilong dispela samting? Dispela nem «Krais» i gat bikpela mining bilong em! Long wanem long Olpela Testamen ol Israel i save kapsaitim wel antap long het bilong 3-pela kain man: ol pris, ol profet na ol king. Long Olpela Testamen God yet i bin tokim ol Israel long kapsaitim wel antap long ol dispela man, olsem mak i soim olsem dispela man em i bilong God tasol.

*Pasin bilong kapsaitim wel
long het bilong ol pris, profet na king*

Long Olpela Testamen em i klia olsem God yet i laik long ol pris, ol profet na ol king i gat wanpela spesel mak i soim olsem dispela man em i bilong God tasol. Na God yet i laik long dispela mak i kam long wel, na dispela wel i kam long diwai oliv. Nau yumi lukim sampela eksampel bilong Buk Baibel i soim olsem dispela pasin bilong kapsaitim wel antap long het bilong ol pris, profet na king i kam long laik na tingting bilong God yet.

- God yet i tokim ol Israel long kapsaitim wel antap long ol pris. Long Buk bilong Eksodas i gat stori bilong pasin bilong

makim ol pris i kamap olsem wanem. Na Buk Baibel i tok: *Bikpela i skruim tok olsem: «Nau mi laik tokim yu long ol samting yu mas mekim long Aron wantaim ol pikinini man bilong em bilong makim ol i kamap pris bilong mi. (...) **Na kisim wel bilong makim man i kamap pris na kapsaitim long het bilong em bilong makim em**»* (Eksodas 29:1-7).

- **God yet i tokim ol Israel long kapsaitim wel antap long ol profet.** Long namba 1 Buk bilong ol King i gat stori bilong God i laik makim profet Elisa bilong kamap profet, na Buk Baibel i tok: *Tasol Bikpela i tokim em [Elaija] olsem: «Yu mas go insait long taun na lukim Hasael na yu mas **kapsaitim wel long het bilong em, bilong makim em i kamap king bilong Siria. (...) Na tu yu mas makim Elisa... long kisim ples bilong yu na kamap profet bilong mi**»* (1 King 19:15-16).

- **God yet i tokim ol Israel long kapsaitim wel antap long ol king.** Long namba 1 Buk bilong Samuel i gat stori bilong Samuel i makim Sol olsem king bilong Israel. Buk Baibel i tok: *Orait Sol i salim wokboi i go pas, na Samuel i kisim wanpela liklik jak wel bilong oliv na **kapsaitim hap wel long het bilong Sol bilong makim em i kamap king.** Na Samuel i kis long em na i tokim em olsem: «Bikpela i makim yu king bilong ol manmeri bilong em, ol Israel»* (1 Samuel 10:1-2).

- Jisas yet i tok olsem God Papa yet i bin kapsaitim wel antap long het bilong em na makim em olsem pris, profet na king. Taim Jisas i go long ples Nasaret bilong autim Gutnius bilong em, orait em i sanap long ai bilong ol manmeri na i tok: «*Spirit bilong Bikipela i kam i stap long mi, long wanem, **Bikipela yet i kapsaitim wel long het bilong mi bilong makim mi bilong i go bringim gutpela tok bilong em long ol rabisman.** (...) Na em i salim mi long tokaut olsem, taim i kamap pinis bilong Bikipela i laik mekim gut long ol manmeri bilong em*» (Luk 4:18).

*Maria em i mama bilong nambawan pris,
nambawan profet na nambawan king*

Taim yumi kolim Maria em i «Mama bilong Krais» yumi laik onarim em, long wanem pikinini bilong em, Jisas, em i nambawan pris, em i nambawan profet na em i nambawan king.

Jisas em i nambawan pris, long wanem sakrifais bilong em antap long diwai kros i kisim bek ol manmeri bilong graun. Ol sakrifais bilong ol pris bilong Olpela Testamen i no inap long helpim ol manmeri, long wanem sakrifais bilong ol i no gat strong bilong tekewe ol sin na kisim bek ol manmeri. Tasol Pen na Indai bilong Jisas i winim strong bilong sin na i winim strong bilong Satan, olsem na em i kisim bek ol manmeri na opim dua bilong heven long ol.

Jisas em i nambawan profet, long wanem ol profet em ol man i save autim tok bilong God. Tasol Jisas em i God tru na em yet em i Tok bilong God, olsem na olgeta toktok i kam long maus bilong Jisas i winim tru olgeta toktok i kam long maus bilong ol profet bilong bipo.

Jisas em i nambawan king, long wanem kingdom bilong em i no bilong dispela graun. Nogat. Kingdom bilong Jisas i stap long heven na i no gat pinis bilong em, long wanem em bai i stap inap oltaim oltaim. Ol king bilong dispela graun i save dai, na kingdom bilong ol i save pinis. Tasol Jisas i no save dai, olsem na kingdom bilong em bai i stap inap oltaim oltaim.

Long dispela as tasol yumi kolim Maria em i «Mama bilong Krais», long wanem em i karim nambawan pris, profet na king bilong dispela graun, em Jisas yet.

Mama bilong Sios

(Mother of the Church)

Long bipo tru i kam inap nau ol Katolik manmeri i bin singaut long Maria bilong was na sambai long Katolik Sios. Long bipo tru i kam inap nau oltaim ol gutpela Katolik manmeri i bin askim Maria long daunim ol birua i laik bagarapim Sios. Olsem na yumi ol Katolik i save kolim Maria em i «Mama bilong Sios», na em i gutpela na i stret long yumi givim dispela nem long em.

Dispela nem bilong «Mama bilong Sios» i kam long Buk Baibel yet, na i gat bikpela mining bilong em. Buk Baibel yet i tok olsem Katolik Sios em i bodi bilong Jisas. Santu Pol yet i skulim yumi na em i tok: *Bodi bilong man em i wanpela tasol, na i gat planti hap bilong em. Na dispela planti hap bilong bodi em olgeta i stap wanpela bodi tasol. Na Krai tu i stap olsem, long*

wanem, wanpela Holi Spirit tasol i bin baptaisim yumi olgeta na mekim yumi i kamap wanpela bodi tasol. (...) Yumi save, bodi em i no wanpela hap tasol. Nogat. Em i gat planti hap bilong em (...)

Orait yupela olgeta i stap bodi bilong Krai. Na yupela wan wan i stap hap bilong bodi bilong em (1 Korin 12:12-27).

Olsem na Katolik Sios em i bodi bilong Jisas, na yumi olgeta i stap hap bilong bodi bilong em. Na wankain olsem bipo santu Maria i bin lukautim bodi bilong Jisas taim Jisas i bin i stap long graun, orait nau em i save lukautim Katolik Sios na yumi olgeta wan wan, long wanem yumi stap hap bilong bodi bilong Krai.

Na Katolik Sios i amamas long i stap aninit long lukaut bilong santu Maria, long wanem santu Maria i krungutim pinis het bilong Satan. Satan em i as bilong olgeta samting nogut na em i as bilong olgeta giaman tok i laik daunim Katolik Sios, tasol strong bilong Maria i winim tru strong bilong Satan.

Long bipo tru i kam inap nau oltaim yumi inap long painim planti man na meri i egensim Katolik Sios bilong Jisas. Oltaim planti man na meri i bin toknogutim na rabisim Katolik Sios, olsem na Katolik Sios i gat planti birua tru. Oltaim planti man na meri i bin lusim Katolik Sios na i bin kamapim kain kain lotu i kam long tingting bilong ol yet, na ol i bin wok hat bilong daunim Katolik Sios.

Tasol yumi no ken kirap nogut long dispela samting i kamap, long wanem Jisas yet i bin tokim yumi olsem dispela

samting bai i kamap. Jisas i save pinis olsem planti man na meri bilong giaman bai i kamap na paulim tingting na bilip bilong ol Katolik manmeri. Em yet i tokim yumi olsem: *«Yupela lukaut long ol giaman profet! Ol i save mekim gutpela tok bilong grisim yupela, tasol tingting tru bilong ol em i bilong paulim yupela na bagarapim yupela. Ol i olsem ol weldok i pasim skin bilong sipsip, bai ol i ken i go klostu long ol sipsip na holimpas ol»* (Matyu 7:15). Na tu em i tok: *«Planti giaman profet bai i kirap na giamanim planti manmeri... sampela man bai i kam na tok giaman olsem: “Mi dispela man God i makim bilong kisim bek ol manmeri bilong em”, o “Mi wanpela profet”»* (Matyu 24:11.24). Ol dispela manmeri i save giaman na paulim bilip na tingting bilong planti manmeri, olsem na Jisas i kolim ol **«giaman profet»**. Ol i save tok olsem ol i stap long trupela Sios bilong Jisas, na ol i save tok olsem Katolik Sios em i samting nating.

Na bilong egensim ol dispela giaman profet, long bipo tru i kam inap nau God i bin kamapim planti santu insait long Katolik Sios. Katolik Sios i pulap tru long planti saveman na Tisa na santu i bin bekim tok bilong ol dispela giaman profet, olsem na Katolik Sios i stap yet na i sanap strong.

Olsem na long de 21 bilong mun Novemba bilong yia 1964 Papa Santu Pol namba 6 i bin makim santu Maria olsem «Mama bilong Sios». Planti ol bisop bilong olgeta hap bilong graun i bin

bungim wantaim long ples Rom, na Papa Santu i sanap namel long ol na i tok:

«Mi laik onarim santu Virgo Maria, na mi laik givim bikpela amamas long olgeta Katolik manmeri tu. **Olsem na tude mi makim santu Maria olsem “Mama bilong Katolik Sios”.** Maria em i mama bilong pipel bilong God. Maria em i mama bilong ol pris na mama bilong ol Katolik manmeri. Maria em i gutpela mama i save laikim tumas ol pikinini bilong em. Olsem na mi laik long olgeta manmeri i kolim em olsem “Mama bilong Sios”.

Long bipo tru i kam inap nau ol Katolik manmeri i save pinis olsem Maria em i mama bilong Sios, long wanem Sios em i bodi bilong Jisas, na Maria em i mama bilong Jisas yet. (...) Na Maria em i no mama bilong Jisas na mama bilong Sios tasol. Nogat. Maria em i spesel mama bilong ol Katolik manmeri na bilong ol pris, long wanem Maria em i mama bilong Sios».

Olsem na yumi ol Katolik manmeri i amamas tru long santu Maria i was long Katolik Sios. Na yumi mas trastim em wantaim olgeta strong bilong yumi, long wanem strong bilong Maria i winim tru strong bilong Satan na strong bilong ol samting

nogut. Maria i save lukautim Katolik Sios wankain olsem em i bin lukautim Jisas, long wanem Katolik Sios na Jisas i pas tru olsem man i pas long meri bilong em. Jisas em i het bilong Sios, na yumi ol hap bilong bodi bilong em. Santu Maria i bin was long Jisas long taim Jisas em i liklik pikinini. Nau Maria i was long Katolik Sios, em i bodi bilong Jisas yet. Na em i was long yumi tu, long wanem yumi stap hap bilong bodi bilong Jisas. Olsem na sapos yumi i stap aninit long lukaut bilong santu Maria, orait yumi no ken pret long wangepela samting. Nogat. Yumi mas trastim em tasol, na askim em long helpim yumi.

Mama bilong grasia bilong God

(Mother of divine grace)

Long dispela litani yumi kolim Maria em i «Mama bilong grasia bilong God». Dispela litani i no i stap long ol litani i kam long ol buk long Tok Pisin, tasol em i trupela litani bilong santu Maria. Long bigin bilong dispela buk yumi tok pinis olsem planti ol litani bilong santu Maria ol i no bin tanim yet long Tok Pisin, olsem na planti Katolik manmeri bilong Papua Niugini bai i kirap nogut tru long harim ol nupela litani bilong santu Maria!

Dispela nem bilong «Mama bilong grasia bilong God» i kam long Buk Baibel yet, long wanem Buk Baibel yet i tok klia olsem Maria em i mama bilong Jisas, na Jisas em i as na papa bilong olgeta grasia. Olgeta grasia i kam long Jisas tasol, long wanem Jisas em i God tru, na God em i papa bilong olgeta

grasia. Tasol Maria i karim Jisas, olsem na taim Maria i karim Jisas, orait em i karim grasia bilong God tu. Olsem na yumi ol Katolik i amamas long tok olsem Maria em i «Mama bilong grasia bilong God»!

Buk Baibel i tok wanem samting?

Yumi no laik pulim toktok tumas, olsem na yumi bai i skelim tupela hap bilong Buk Baibel tasol. Long namba wan hap, Buk Baibel i tok klia olsem olgeta grasia i kam long Jisas tasol. Na long namba tu hap, Buk Baibel i tok klia olsem Maria i pulap long grasia.

1- Buk Baibel i tok olsem olgeta grasia i kam long Jisas tasol

Santu Jon i tok: *Tok em i bin kamap man, na em i kam i stap namel long mipela. Mipela i lukim pinis bikpela namba na strong bilong em. (...) **Grasia na pasin i tru i pulap long em. (...) I tru, God i givim lo long yumi long han bilong Moses. Tasol long Jisas Krais yumi kisim grasia wantaim pasin i tru*** (1:14.17).

Dispela tok bilong santu Jon i gat bikpela skul bilong em, long wanem santu Jon i tok klia tupela samting: **1) Namba wan samting**, santu Jon i olsem Tok bilong God i kamap man, na dispela Tok i kamap man em i Jisas tasol, na Maria em i mama bilong Jisas. **2) Namba tu samting**, santu Jon i tok olsem grasia

i pulap long Jisas, na long grasia bilong Jisas yumi olgeta i kisim grasia, long wanem Jisas em i papa bilong olgeta grasia.

2- Buk Baibel i tok klia olsem Maria i pulap long grasia

Taim Ensel Gebriel i bringim tok long Maria, em i tok: «*Ave, Maria! **Yu pulap long grasia.** Lord i stap long yu!*» (Luk 1:28). Ensel Gebriel i tok klia olsem Maria i pulap long grasia bilong God, long wanem God yet i bin makim em bilong kamap Mama bilong God. Olsem na grasia bilong Maria i winim tru grasia bilong olgeta manmeri bilong graun, na em i winim tru grasia bilong olgeta ensel bilong heven.

Planti taim yumi painim hat liklik long tanim long Tok Pisin olgeta tok i kam long Buk Baibel, long wanem ol i bin raitim Buk Baibel long Tok Hibru na long Tok Gris, olsem na i no isi long tanim olgeta tok i go long Tok Pisin. Tasol long trupela tok ples bilong Buk Baibel, dispela tok «*Ave Maria! Yu pulap long grasia!*» i min olsem God i bin mekim narakain samting tru long Maria, long wanem insait long bel bilong em, em i karim namba 2 persona bilong God Triwan, olsem na **olgeta grasia bilong God Triwan i stap insait long bel bilong Maria!** O bikpela misteri tumas! I no gat wanpela man o meri long dispela graun i ken skelim gut dispela misteri, long wanem tingting bilong yumi i sot tumas, na ol misteri bilong God i bikpela tru!

Na narapela stori i stap long Buk Baibel em i olsem: taim Maria i go lukim kandere bilong em, Elisabet, Buk Baibel i tok olsem Holi Spirit yet i pulap long Elisabet, na Elisabet i luksave long dispela bikpela misteri bilong Maria i pulap long grasia. Olsem na Gutnius i tok: *Na Holi Spirit i pulap long Elisabet, na em i singaut strong tumas, na i tok: «**God i bin mekim gut tru long yu na givim yu blesing i winim blesing em i givim long ol arapela meri**»* (Luk 1:41-42). Yumi mas putim yau gut, long wanem dispela tok i no kam long tingting bilong Elisabet yet. Nogat tru! Gutnis i tok olsem Holi Spirit yet i bin pulap long Elisabet, olsem na dispela toktok i kam long Holi Spirit yet!

Olsem na yumi ol Katolik manmeri i mas amamas long kolim Maria em i «Mama bilong grasia bilong God», long wanem olgeta grasia i kam long han bilong Jisas tasol, tasol Jisas i kam long graun long bel bilong santu Maria.

Mama i klin olgeta

(Mother most pure)

Nau yumi kolim Maria em i «Mama i klin olgeta». Dispela litani tu i no i stap long ol litani i kam long ol buk long Tok Pisin. Tasol dispela litani tu em i trupela litani bilong santu Maria! As bilong dispela litani em i olsem: klinpela pasin bilong santu Maria em i stret olgeta, na em i klin wankain olsem ol ensel.

Pastaim yumi bin tok olsem Maria i bin i stap virgo oltaim, na em i no bin givim bodi bilong em long wanpela man. Maski em i bin maritim santu Josep, em i no bin givim em yet long santu Josep. Olsem wanem? Long wanem Maria i bin mekim promis long God long em bai i stap virgo oltaim. Maria i laikim God tumas na em i laikim God wantaim olgeta strong bilong em, olsem na long dispela as tasol em i laik givim bodi, sol na lewa bilong em olgeta long God tasol.

Planti taim yumi ol manmeri bilong graun i painim hat long bihainim klinpela pasin, olsem na planti taim kain kain tingting nogut i save kirap long bel bilong yumi. **Tasol God i bin mekim narakain samting long Maria, olsem na God yet i bin mekim Maria i stap klinpela tru!** God yet i bin banisim Maria, bai em i ken i stap klinpela tru oltaim!

Yumi no ken lustingting olsem olgeta sin na olgeta samting nogut i stap long yumi i kam long sin bilong Adam na Iv. Dispela sin bilong Adam na Iv em i as bilong olgeta sin yumi save mekim. Taim mama i karim yumi, orait dispela sin i stap pinis long sol bilong yumi. Olsem na yumi save kisim sakramen bilong baptais, long wanem baptais i save tekewe dispela sin. Tasol maski baptais i tekewe dispela sin, sol bilong yumi i bagarap pinis, na i wik olgeta na i no gat strong. Olsem na sakramen bilong baptais i save tekewe sin bilong Adam na Iv long yumi, tasol bihain sol bilong yumi i wik, na em i painim hat long bihainim gutpela pasin oltaim. Olsem na olgeta manmeri bilong dispela graun i save mekim sin, long wanem olgeta manmeri i bin kamap long graun wantaim sin bilong Adam na Iv long sol bilong ol. Tasol Maria nogat! Bihain yumi bai i toktok long Maria Imakulata i no gat sin bilong Adam na Iv, tasol nau yumi tok olsem: **Maria i no bin mekim wanpela sin i doti long laip bilong em.** Nogat tru. Maria em i klinpela tru na em i klin olgeta.

Sol bilong Maria na sol bilong yumi i no wankain. Nogat. Sol bilong yumi i wik tumas, long wanem mama i karim yumi wantaim sin bilong Adam na Iv. Tasol sol bilong Maria i no gat dispela sin, olsem na sol bilong em i narakain olgeta! Sol bilong Maria i no save long sin em i wanem samting, long wanem God yet i bin banisim em long sin na long Satan. Maski Satan inap long traim ol manmeri bilong graun, em i no inap long traim Maria! Olsem na Maria i no bin pundaun long sin i doti long laip bilong em! Na long dispela as tasol yumi tok olsem em i klinpela tru na em i klin olgeta!

Sotpela advais bilong bihainim klinpela pasin

Klinpela pasin em i bikpela samting long ai bilong God, olsem na yumi olgeta i mas wok hat bilong bihainim klinpela pasin oltaim. Planti taim bodi bilong yumi i laik pulim yumi long mekim sin, na planti taim ol samting nogut bilong ausait tu i save kirapim kain kain tingting nogut insait long bel bilong yumi. Olsem na bilong winim ol dispela traim nogut na bihainim klinpela pasin, yumi mas bihainim dispela advais i kam long ol santu. Ol santu i tok olsem i gat 3-pela samting i save helpim yumi long bihainim klinpela pasin na abrusim ol sin i doti long ai bilong God. **1) Yumi mas prea na askim Jisas na santu Maria long strongim yumi:** long wanem long strong

bilong yumi yet, yumi bai i no inap long winim ol triam nogut. Tasol long strong bilong Jisas, yumi bai inap. **2) Yumi mas kisim santu komunio na konpes planti taim:** long wanem dispela tupela sakramen i save strongim sol bilong yumi na helpim yumi long sanap strong long taim bilong traim. **3) Yumi mas mekim penans na sakrifais:** long wanem pasin bilong mekim penans na sakrifais i save daunim ol laik nogut bilong bodi bilong yumi, olsem na yumi no larim bodi i bosim yumi.

Mama i klin oltaim

(Mother most chaste)

Pastaim yumi tok olsem Maria i no bin mekim sin i doti long laip bilong em. Nau long dispela litani «Mama i klin oltaim» yumi tok olsem sol bilong Maria em i klin olgeta na i winim tru ol ensel na ol santu.

Na as bilong dispela samting em i olsem: God yet i bin wokim bodi na sol bilong Maria long bel bilong santu Ana, em i mama bilong Maria. Olsem na God yet i bin mekim sol bilong Maria i stap klin olgeta, long wanem long bipo bipo tru God yet i bin makim Maria pinis bilong karim Jisas, em i God tru na namba 2 persona bilong God Triwan. Olsem na God i no laik long mama bilong em i gat sin. Nogat tru. God i no laik long sol bilong mama bilong em i doti. Nogat olgeta. Olsem na sol bilong Maria i klin olgeta, na i no gat wanpela samting i doti long em.

Long Buk Baibel i gat tok bilong Profet Devit olsem: ***[God] Yu bin wokim olgeta hap bilong bodi bilong mi. Yu wokim mi olgeta insait long bel bilong mama*** (Buk Song 139:13). Dispela tok em i tru olgeta, na i min olsem God yet i bin wokim yumi insait long bel bilong mama. Yumi kam long han bilong God tasol. God yet i bin wokim yumi insait long bel bilong mama, na em yet i bin wokim sol na bodi bilong yumi. ***Olsem na God yet i bin wokim bodi na sol bilong Maria tu.*** Tasol Maria em i no wanpela meri nating. Nogat. Long bipo bipo tru, long eterniti tru, God i bin makim Maria pinis bilong kamap mama bilong Jisas. Olsem na long dispela as tasol God yet i bin wokim bodi na sol bilong Maria i klin olgeta. God yet i redim sol bilong Maria, bai em i no ken kamap doti long sin. God yet i bin banisim Maria bai sol bilong em i ken i stap klin oltaim.

Yumi no ken lustingting olsem long bipo bipo tru God i save pinis long yumi wan wan. Yumi no bin kamap yet long bel bilong mama, na God i save pinis long yumi. Long eterniti God i save pinis long yumi wan wan, na em yet i wokim yumi na mekim yumi i kamap long bel bilong mama. Profet Jeremia i tok olsem: *Bikpela i tokim mi, Jeremaia, olsem: «Taim mi no bin mekim yu i kamap yet long bel bilong mama, mi save long yu. Na taim mama i no karim yu yet, mi makim yu bilong mekim wok profet namel long ol kantri nabaut»* (1:4-5). God i tokim Jeremaia olsem em i save long Jeremaia long eterniti!

Taim Jeremaia i no bin kamap yet long bel bilong mama, God i save pinis long em! Na wankain samting i bin kamap long santu Maria! Long bipo bipo tru God i save pinis olsem dispela meri bai i kamap mama bilong Ridima, olsem na God yet i bin banisim Maria, bai no gat wanpela samting nogut na doti i ken bagarapim sol bilong em.

Tasol yumi mas tok tu olsem i no sol bilong Maria i klin olgeta tasol, long wanem bodi bilong em tu i klin olgeta. Bodi bilong santu Maria i no gat wanpela samting nogut long em, long wanem God yet i bin wokim bodi bilong Maria, na Maria i bin wokim bodi bilong Jisas. **Blut bilong Jisas na blut bilong Maria em i wankain tasol, long wanem blut bilong Jisas i kam long Maria. Na mit bilong Jisas na mit bilong Maria em i wankain tasol, long wanem mit bilong Jisas i kam long Maria.** Olsem na long dispela as tasol God yet i bin mekim bodi bilong Maria i klin olgeta, long wanem bodi bilong Jisas i kam long bodi bilong Maria tasol!

Na tu dispela em i as bilong Bikpela Pestode bilong God i kisim Maria i go long heven (o «Asunsio», em i wankain tasol). Yumi ol Katolik i amamas long bodi bilong santu Maria i no bagarap long matmat. Na as bilong dispela samting em i olsem: yumi ol manmeri bilong graun i save dai long sin bilong Adam na Iv. Sin bilong Adam na Iv em i as bilong indai bilong yumi, na em i as bilong olgeta samting nogut i save kamap long

graun. Tasol Maria em i klin olgeta, na em i no gat sin bilong Adam na Iv, olsem na i no gutpela long bodi bilong em i bagarap long matmat. Nogat tru. Maria i bin winim strong bilong sin, long wanem em i klin olgeta. Na tu em i winim strong bilong indai, long wanem God yet i bin kisim em i go long heven.

Yumi ol Katolik i mas sanap strong long bilip bilong yumi, na oltaim yumi mas tokaut: bodi na sol bilong Maria i klin olgeta! I no gat wampela samting nogut long bodi na long sol bilong Maria! I no gat wampela samting i doti long bodi na long sol bilong Maria! Nogat tru! Santu Maria em i klin olgeta na em i klin oltaim, long wanem God yet i bin wokim bodi na sol bilong em, na God yet i bin banisim Maria long olgeta samting nogut!

Mama i virgo oltaim

(Mother inviolate)

Nau yumi kolim santu Maria em i «Mama i virgo oltaim», na dispela litani i save litimapim tru nem bilong Maria! **Long dispela litani yumi min olsem Maria i bin i stap virgo oltaim, inap long indai bilong em.** Yes, long wanem Maria i bin i stap virgo pastaim long em i karim Jisas, em i bin i stap virgo long taim bilong karim Jisas na em i bin i stap virgo bihain long em i karim Jisas.

Yumi mas amamas tru long dispela bikpela ona yumi givim long santu Maria, na yumi ol Katolik i mas sanap strong na tokaut olsem: Maria em i virgo oltaim!

Olsem na nau yumi toktok liklik long dispela pasin bilong santu Maria i bin i stap virgo oltaim.

*Maria i bin i stap virgo pastaim
ong em i karim Jisas*

Pastaim yumi mas tok olsem Maria i bin i stap virgo pastaim long em i karim Jisas. Yumi tok pinis olsem Maria yet i bin mekim promis long i stap virgo, long wanem em i laik givim sol na bodi bilong em olgeta long God. Em i mekim dispela promis taim em i yangpela gel yet, na em i inapim gut inap long indai bilong em.

Long Buk Baibel i gat wanpela tok bilong Profet Aisaia i mas mekim yumi i kirap nogut tru. Long sapta 7 God yet i tok olsem em i laik givim wanpela mak bilong soim strongpela pawa bilong em, na dispela mak em i olsem: «**Wanpela virgo i gat bel**, na bai em i karim wanpela pikinini man na kolim nem bilong em *Emanuel*» (7:14). Dispela nem «Emanuel» i kam long Tok Hibru na i min «God i stap wantaim yumi», na em i tok profet bilong Jisas bai i kam long graun.

Tasol nau yumi mas putim yau gut! Ol manmeri i bin tanim Buk Baibel i go long Tok Pisin i no bin tanim gut dispela hap tok bilong Profet Aisaia. Nogat tru. Long Buk Baibel long Tok Pisin i tok: «**Wanpela yangpela meri i gat bel**». Tasol dispela em i kranks. Long trupela tok ples bilong Profet Aisaia em i no tok long wanpela yangpela meri i gat bel. Nogat! **Em i tok long wanpela virgo.** Planti yangpela meri i gat bel, na

dispela samting em i no wanpela mak o mirakel bilong God. Nogat tru. Long Buk bilong Profet Aisaia God i tok long wanpela bikpela mak bai i kamap, na **dispela mak em i olsem wanpela virgo bai i kisim bel**, olsem na dispela mak bai i narakain olgeta, long wanem ol meri i gat bel i lusim pinis pasin virgo bilong ol! Olsem na sapos i gat wanpela virgo i gat bel, i min olsem dispela samting em i wanpela mak o mirakel i kam long God tasol! Na ol santu na saveman bilong Sios i tok olsem dispela virgo Profet Aisaia i tok long em, em i santu Maria. Santu Maria tasol i bin i stap virgo na i kisim bel. I no gat narapela meri long dispela graun i bin kisim bel na i bin i stap virgo tu. Nogat tru. Dispela tok profet bilong Aisaia i tok long santu Maria tasol.

*Maria i bin i stap virgo
long taim em i karim Jisas*

Nau yumi mas tok olsem Maria i bin i stap virgo long taim em i karim Jisas. Dispela samting tu em i wanpela mirakel God yet i bin mekim. Taim Maria i karim Jisas, em i no karim Jisas wankain olsem ol meri bilong graun i save karim ol pikinini bilong ol. Nogat tru. Ol meri bilong graun i save pilim bikpela pen long taim bilong karim ol pikinini, long wanem ol bebi i kam ausait long rot bilong pikinini, na dispela i mekim ol mama

i karim pen. Tasol Jisas nogat. Taim Maria i karim Jisas narakain samting i bin kamap!

Jisas i kam ausait long bel bilong Maria, tasol em i no kam ausait long rot bilong pikinini. Nogat tru. Santu Tomas bilong Akwainas, em i nambawan saveman bilong Sios, i givim wanpela naispela tok piksa na em i tok: «Wankain olsem lait bilong san i save kam insait long haus na em i no brukim glas bilong windo, orait wankain samting tasol i bin kamap long Jisas na santu Maria: Jisas i bin kam ausait long santu Maria, tasol em i no bin brukim rot bilong pikinini na mekim nogut long bodi bilong mama». Na narapela tok piksa santu Tomas i givim em i olsem: «Taim Jisas i kirap long indai, orait ol disaipel i bung long wanpela rum, na ol i lokim ol dua na windo. Tasol mirakel i kamap na Jisas i kamap namel long ol, na em i no opim windo o dua bilong kam insait. Nogat! Wankain olsem tasol i bin kamap long taim santu Maria i karim Jisas: Jisas i kamap ausait long Maria, tasol em i no brukim rot bilong karim pikinini».

Olsem na yumi ol Katolik i mas sanap strong na i tokaut olsem Maria i bin i stap virgo long taim em i karim Jisas, long wanem God yet i bin mekim bikpela mirakel, bai Jisas i ken kam ausait na i no ken mekim nogut long bodi bilong mama bilong em.

*Maria i bin i stap virgo
bihain long em i karim Jisas*

Yumi ol Katolik i mas tok strong olsem Maria i bin i stap virgo bihain long em i karim Jisas. Yes, long wanem em yet i bin mekim promis long em bai i stap virgo oltaim. Olsem na Maria i no bin givim bodi bilong em long santu Josep, na santu Josep i wanbel long dispela promis bilong Maria, olsem na santu Josep tu i bin mekim promis long em i laik bihainim meri bilong em na i stap virgo oltaim.

Sapos yumi tok olsem Maria i bin givim em yet long santu Josep na karim ol arapela pikinini, orait yumi rabisim santu Maria na yumi rabisim Jisas tu. Holu Spirit yet i bin mekim Maria i kamap mama bilong Jisas, olsem na em i no gutpela sapos bihain Maria i givim bodi bilong em yet long wanpela man. Nogat tru! Maria i save pinis olsem God Triwan i bin makim em bilong kamap mama bilong Sevia bilong yumi, olsem na Maria i no laik givim baksait long God na givim em yet long wanpela man. Santu Josep tu i save olsem God Triwan i bin makim Maria bilong kamap mama bilong Sevia bilong yumi, olsem na santu Josep tu i rispektim laik bilong God, olsem na em i bin bihainim klinpela pasin oltaim.

Na taim Buk Baibel i toktok long ol brata na susa bilong Jisas, yumi save pinis olsem Buk Baibel i toktok long ol kasin na

kandere bilong em tasol, long wanem long kastam bilong ol Juda ol i save kolim «brata» na «susa» long ol kasin na kandere, wankain olsem yumi save mekim long Papua Niugini.

Long narapela sapta bilong dispela buk yumi bin toktok pinis long dispela samting, olsem na nau yumi no ken pulim toktok tumas.

Olsem na yumi ol gutpela Katolik i mas tokaut olsem: santu Maria i klin oltaim, na em i bin i stap virgo inap long indai bilong em!

Mama Imakulata

(Mother undefiled)

Dispela litani bilong santu Maria em i bikpela samting tumas. Pastaim yumi bin tok olsem Maria i no bin mekim sin long laip bilong em. Tasol nau yumi tok olsem: **Maria i no bin gat sin bilong Adam na Iv**. Dispela sin bilong Adam na Iv yumi save kolim «sin bilong ol tumbuna» o «*original sin*». Em i wankain tasol. Na dispela em i as bilong dispela nem «Mama Imakulata», long wanem «Imakulata» em i wanpela tok i kam long Tok Latin na i min «no gat sin long em». Olsem na taim yumi kolim Maria em i «Mama Imakulata» yumi min olsem Maria em i klin olgeta long taim em i kamap long bel bilong mama bilong em inap long indai bilong em. Maria i no bin mekim wanpela sin long laip bilong em, na sin bilong Adam na Iv tu i no bin bagarapim em. Nogat tru. God yet i bin banisim santu Maria long sin bilong Adam na Iv.

Maria Imakulata long Buk Baibel

Long Buk Baibel i gat planti hap tok i ken helpim yumi long skelim na luksave long dispela bikpela misteri bilong Maria i no gat sin bilong Adam na Iv. Tasol i no gutpela long yumi pulim tok nau na toktok long olgeta hap tok wan wan, olsem na bai yumi toktok liklik long tupela hap tok bilong Buk Baibel i soim olsem Maria i no gat sin bilong Adam na Iv. Na yumi laik skelim wanpela hap tok bilong Olpela Testamen na narapela bilong Nupela Testamen.

1) Namba wan hap tok i stap long Olpela Testamen, na i kam long Buk bilong Stat (o Jenesis)

Long sapta 3 i gat stori bilong Adam na Iv i sakim tok bilong God, na tupela i mekim sin. Olsem na God i mekim strongpela tok long tupela, long wanem tupela i bin sakim tok bilong em. Na God tu i mekim strongpela tok long snek, long wanem snek i bin pulim Adam na Iv long mekim sin. Tasol God i sori long Adam na Iv, olsem na em i promis ol olsem wanpela de bai i kamap na em bai i kisim bek ol. Buk Baibel i tok:

Na God, Bikpela i tokim snek olsem: «Yu bin mekim dispela pasin nogut, olsem na nau mi gat strongpela tok bilong daunim yu. (...) Na bai mi mekim yu i stap birua bilong

meri, na meri i stap birua bilong yu. Na bai mi mekim ol lain bilong yu i birua long lain bilong meri. Bai ol i krungutim het bilong yu, na bai yu kaikaim lek bilong ol»
(Stat 3:14-15).

Wanem as bilong dispela samting? **Ol saveman bilong Sios i tok olsem dispela pasin birua God i putim namel long meri na long snek em i piksa bilong pasin birua namel long Maria na Satan.** God i promis olsem wanpela pikinini bilong meri bai i krungutim het bilong snek, olsem na ol saveman bilong Sios i tok olsem God i mekim tok profet long Jisas bai i krungutim het bilong Satan na daunim em. Dispela meri God i tok long em, em santu Maria tasol, long wanem pikinini bilong Maria tasol i winim Satan. Olsem na long bigin tru bilong Buk Baibel yumi lukim God i promis olsem Maria bai i winim Satan, olsem na Satan bai i no inap long mekim wanpela samting nogut long em, olsem na em bai i no inap long bagarapim sol bilong Maria long sin bilong Adam na Iv.

2) Namba tu hap i stap long Nupela Testamen, na i kam long Gutnius bilong santu Luk

Yumi tok pinis long Ensel Gebriel i tokim Maria olsem: «*Ave, Maria! Yu pulap long grasia!*» (Luk 1:28). Na yumi mas putim yau gut nau, long wanem long Buk Baibel yumi save yusim long

Tok Pisin dispela tok bilong Ensel Gebriel i narakain liklik. Ol manmeri i bin tanim Buk Baibel i go long Tok Pisin i no bin tanim gut dispela tok bilong Ensel Gebriel, olsem na i luk olsem Ensel i givim gude nating long Maria na i tokim em olsem God i bin blesim em tasol. Tasol nogat! **Long trupela tok ples bilong Buk Baibel dispela tok bilong Ensel Gebriel em i narakain olgeta, na em i tok klia olsem Maria i pulap long grasia!** Ensel Gebriel i makim maus bilong God Triwan, na em i tok klia olsem Maria i pulap long grasia na i no gat wanpela samting nogut long em!

Na wankain samting i kamap taim Maria i go visitim kandere bilong em Elisabet. Buk Baibel i tok olsem Holi Spirit i pulap long Elisabet, na Elisabet yet i kolim Maria «***Mama bilong Bikpela***» (Luk 1:43). Na Elisabet i tok moa olsem: «*God i bin mekim gut tru long yu na givim yu blesing i winim blesing em i givim long ol arapela meri*» (Luk 1:42). Dispela blesing santu Elisabet i tok long em, em i dispela presen God i bin givim long Maria, taim God yet i banisim Maria na mekim sol bilong em i abrusim sin bilong Adam na Iv.

Maria Imakulata long bilip bilong Katolik Sios

Long bipo tru i kam inap nau ol Katolik manmeri i bilip olsem Maria i no gat sin bilong Adam na Iv. Ol santu na ol saveman

bilong bipo i bin tok olsem strong bilong Maria i winim tru strong bilong Satan, olsem na Satan i no inap bagarapim Maria long sin. Tasol sampela ol Kristen bilong ol arapela lotu (kain olsem ol Protestan, ol Luteran, na ol arapela liklik lotu) i save sutim planti ston na spia long Maria, olsem na ol i rabisim em na toknogutim em, long wanem ol i tok olsem Maria em i wanpela meri nating na em i wanpela meri bilong mekim sin, wankain olsem ol arapela meri bilong dispela graun.

Olsem na long dispela as tasol long de 8 bilong mun Disemba bilong yia 1854, Papa Santu Pius namba 9 i raitim wanpela pas i go long olgeta Katolik manmeri bilong olgeta hap bilong graun, na em i mekim strongpela tok olsem:

«Yumi ol Katolik manmeri i bilip olsem Santu Maria Virgo i no gat sin bilong Adam na Iv. **Long taim Maria i kamap long bel bilong mama bilong em, God I Antap Tru i bin banisim em long dispela sin, olsem na Maria em i klin olgeta.** Long strong bilong God tasol Maria i klin olgeta na i no gat wanpela sin long em. Pen na Indai bilong Jisas em i as bilong dispela bikpela samting, long wanem Pen na Indai bilong Jisas i winim strong bilong sin na strong bilong Satan. Olsem na God yet i bin mekim Maria i stap klin oltaim, na God yet i bin mekim sol bilong Maria i abrusim sin bilong Adam

na Iv. Olsem na olgeta Katolik manmeri i mas sanap strong long dispela bilip, long wanem dispela bilip i kam long Buk Baibel yet».

Olsem na yumi ol Katolik manmeri i save selebretim dispela bikpela misteri long Disemba 8, long wanem em i Bikpela Pestode bilong Maria i no gat sin. Long dispela Pestode yumi tingim dispela pasin God i bin mekim long santu Maria: God i banisim Maria long sin bilong Adam na Iv, olsem na Maria em i klin olgeta na i no gat sin. Maria i winim strong bilong sin na em i krungutim het bilong Satan!

Olsem na taim Satan i traim yumi na i laik pulim yumi long mekim sin, orait yumi mas kolim nem bilong «Maria Imakulata», long wanem strong bilong Maria i winim strong bilong Satan. Satan i pret nogut tru long Maria, long wanem em i save olsem Maria i gat pawa bilong krungutim het bilong em! Olsem na sapos yumi kolim nem bilong «Maria Imakulata» orait Satan bai i ranawe long yumi tu!

Mama, yu gutpela tru

(Mother most amiable)

Long dispela litani yumi laik tingim ol gutpela pasin santu Maria i save mekim long yumi, olsem na yumi laik kolim em «Mama, yu gutpela tru». Na em i tru, long wanem ol pasin Maria i winim tru ol pasin bilong olgeta mama bilong dispela graun.

Na bilong luksave long bikpela laik bilong santu Maria i kam long yumi, em i gutpela long yumi tingim gen long namba wan mirakel o mak Jisas i bin mekim. Stori bilong dispela mirakel i stap long sapta 2 bilong Gutnius bilong santu Jon, na i tok olsem Jisas na Maria i bin go long wanpela kaikai bilong marit long taun Kana. Na taim ol i bisi long kaikai, orait Maria i luksave olsem wain i pinis. Olsem na em i no laik long dispela man i marit i kisim sem long ai bilong ol manmeri, olsem na em i askim Jisas long mekim wanpela mirakel bilong helpim dispela

man. Na wantu Jisas i harim tok bilong mama bilong em, na bikpela mirakel i kamap! Jisas i askim ol wokman long pulimapim wara long ol bikpela sopen, na em i mekim dispela wara i tanim na i kamap wain. Na dispela i kamap namba wan mirakel Jisas i bin mekim long ai bilong ol manmeri.

Orait dispela mirakel bilong Jisas i skulim yumi long 4-pela samting:

1) Maria i save pinis long ol nid bilong yumi. Namba wan samting, dispela mirakel i soim yumi olsem i no gat wanpela man o meri i bin toksave long Maria olsem wain i pinis. Nogat tru. Em yet i luksave, long wanem em i gutpela mama tumas, olsem na em i save skelim gut ol samting bilong ol pikinini bilong em.

2) Maria i gat bikpela laik long helpim yumi. Dispela mirakel i soim yumi olsem i no man i bosim kaikai i askim Maria long helpim em. Nogat tru. Maria yet, long laik bilong em yet, em i laik helpim dispela man. Dispela samting i soim yumi olsem lewa bilong Maria em i gutpela tumas na em i pulap long marimari. Maria yet i laik helpim dispela man, maski dispela man i no bin askim em.

3) Maria i save askim Jisas long helpim yumi. Narapela bikpela samting em i olsem: **Jisas i harim tok bilong mama bilong em!** Pastaim Jisas i bin tokim Maria olsem em i no taim yet bilong mekim mirakel na kamap ples klia long ai bilong ol

manmeri. Tasol Maria i no wari long toktok bilong Jisas, olsem na Jisas i daunim em yet na bihainim tok bilong mama bilong em. Jisas em i gutpela pikinini, olsem na oltaim em i save harim tok bilong mama bilong em.

4) Maria i gat pawa long ai bilong Jisas. Na las samting, dispela mirakel i soim yumi olsem **prea bilong santu Maria i gat bikpela pawa long ai bilong Jisas.** Long Gutnius i gat planti stori bilong ol manmeri i askim Jisas long wokim ol mirakel, tasol Jisas i no wokim. Tasol Maria em i mama bilong em, olsem na taim Maria i askim Jisas long mekim wanpela samting, orait wantu tasol Jisas i save mekim

Olsem na yumi mas tingim oltaim long bikpela laik bilong santu Maria i kam long yumi, na yumi no ken tubel. Yumi mas save olsem Maria em i gutpela mama bilong Jisas, tasol taim Jisas i hangamap long diwai kros, orait em i givim mama bilong em long yumi. Jisas i tokim Jon olsem: «***Dispela meri em i mama bilong yu***» (Jon 19:27). Na ol santu na saveman bilong Sios i tok olsem santu Jon i makim ol Katolik manmeri, olsem na Jisas yet i tokim yumi olsem: «*Dispela meri em i mama bilong yu*». Em i wankain olsem Jisas i tokim yumi: «**Lukim! Mama bilong mi, mi laik givim long yu. Nau mitupela i brata, long wanem mama bilong mi na mama bilong yu i wanpela tasol**». O gutpela Jisas! Yu gutpela tumas!

Yu givim mama bilong yu long mipela, bai em i ken i stap gutpela mama bilong mipela tu!

Oltaim yumi mas kolim nem bilong Maria, na yumi no ken tubel long askim planti samting long em. Lewa bilong Maria i pulap long marimari na long ol gutpela pasin, na em i amamas long harim ol singaut bilong yumi. Yumi mas singaut long em wankain olsem ol liklik pikinini i save singaut long mama bilong ol. Santu Maria em i redi oltaim long helpim yumi. Pawa na strong bilong em i bikpela tumas, olsem na em inap helpim yumi long olgeta wari na hevi bilong yumi. I no gat wanpela samting Maria i no inap mekim. Nogat tru. **Long strong i kam long God, Maria inap long mekim olgeta samting.** Ensel Gabriel yet i tok: *«I no gat wanpela samting God i no inap mekim»* (Luk 1:37). Na em i tru, long wanem i no gat wanpela samting God i no inap mekim. Na God yet i laikim Maria tumas na em i makim Maria bilong tilim ol grasia, olsem na yumi mas askim Maria long helpim yumi. Na taim yumi singaut long Maria, orait em bai i mekim wankain samting em i bin mekim long kaikai bilong marit long taun Kana: em bai i askim pikinini bilong em Jisas long helpim yumi! Na Jisas i no inap sakim tok bilong mama bilong em. Nogat tru. Jisas bai i harim tok bilong mama bilong em, na em bai i kam na helpim yumi!

Mama, pasin bilong y i stret olgeta

(Mother admirable)

Long dispela litani yumi laik litimapim nem bilong santu Maria, olsem na yumi kolim em «Mama, pasin bilong yu i stret olgeta». Na em i tru, long wanem olgeta pasin bilong santu Maria i bin gutpela na i stret long ai bilong God na long ai bilong ol manmeri.

Em i hat long toktok long olgeta gutpela pasin bilong santu Maria wan wan, long wanem sapos yumi laik mekim olsem, orait yumi bai i pulim tok tumas. Na tu long wanem i gat planti ol gutpela buk i pulap long ol skul long ol gutpela pasin bilong santu Maria, olsem na yumi ken painim ol dispela buk na ritim.

Santu Ogastin i tok: «**Sapos yumi laik bai ol santu i helpim yumi na harim ol singaut bilong yumi, orait yumi mas wok hat bilong bihainim ol gutpela pasin bilong ol.** Olsem na taim ol santu i lukim yumi i wok hat bilong bihainim ol, ol bai i blesim yumi na helpim yumi long ol samting yumi i sot long em». Olsem na long dispela as tasol yumi mas wok hat bilong bihainim ol gutpela pasin na eksampel bilong santu Maria!

Long Buk Baibel i gat tok olsem: «*Ol pikinini, yupela i mas harim gut tok bilong mi na bihainim ol pasin bilong mi. Sapos yupela i mekim olsem, bai yupela i amamas. Yupela i mas larim mi i skulim yupela, na bai yupela i kisim gutpela tingting na save*» (Gutpela Sindaun 8:32-33). Na santu Alfons i tok olsem dispela toktok i luk olsem Maria yet i bin mekim. Long tingting bilong santu Alfons santu Maria yet i askim yumi long kisim gutpela tingting na save long ol pasin bilong em, na wok hat bilong bihainim ol. Long wanem man o meri i save laikim tumas narapela man o meri, em i save wok hat bilong kamap wankain olsem dispela man o meri em i save laikim.

Santu Jerom i tok: «Sapos yumi laikim tru santu Maria, orait yumi mas wok hat bilong bihainim ol gutpela pasin bilong em». Na santu Rikard i tok moa olsem: «Ol man na meri i wok hat bilong bihainim ol gutpela eksampel bilong santu Maria, ol dispela manmeri tasol ol i gutpela pikinini bilong em». Na santu Bernard i skulim yumi olsem: «**Ol pikinini i mas**

bihainim ol pasin bilong mama bilong ol, na taim mama i lukim olsem pikinini i wok long bihainim ol pasin bilong em, em bai i givim planti gutpela samting long pikinini. Olsem na yumi mas mekim wankain long santu Maria. Yumi i pikinini bilong santu Maria, olsem na yumi mas bihainim gut ol pasin bilong em».

*Ol gutpela pasin i kam long grasia bilong God,
na Maria i pulap long grasia*

Taim yumi i laik toktok long ol gutpela pasin bilong santu Maria, planti manmeri i save sutim spia long Maria na i tok olsem long Nupela Testamen i no gat planti hap tok we yumi ken ritim ol stori bilong Maria. Na em i tru, long wanem Nupela Testamen i toktok long Jisas tasol, long wanem Jisas em i Sevia na Ridima bilong yumi, olsem na em i gutpela long Nupela Testamen i toktok long em tasol. Tasol i gat wanpela tok i stap long Nupela Testamen i mas mekim yumi i kirap nogut tru: **Buk Baibel i tok olsem Maria i pulap long grasia** (Luk 1:28). Taim ensel Gebriel i bringim tok long Maria, ensel i tok olsem: «*Ave Maria, yu pulap long grasia*» (Luk 1:28). Na taim yumi tok olsem Maria i pulap long grasia, orait yumi min olsem olgeta gutpela pasin i bin stap long em tu, long wanem taim God i pulapim sol bilong

Maria long grasia, em i bin pulapim sol bilong em wantaim olgeta gutpela samting tu!

Grasia bilong God em i as bilong olgeta gutpela pasin, na sapos yumi pulap long grasia, orait yumi bai i pulap tu long ol gutpela pasin. **Tasol namel long olgeta manmeri bilong graun, Maria tasol i bin pulap long grasia, olsem na Maria tasol i pulap long ol gutpela pasin.** Na nambawan saveman bilong Sios, santu Tomas Akwainas, i tok olsem: «Ol santu i bin mekim kain kain gutpela pasin, tasol Maria i winim ol. Maria i pulap long ol gutpela pasin na i no gat wangepela santu i ken winim em. Nogat tru. Maria i go pas long ol santu na pasin bilong em i winim tru pasin bilong ol. Olsem na santu Maria i kamap eksampel bilong yumi, bai yumi i ken bihainim em». Na santu Ambros tu i tok: «I gat planti santu insait long Katolik Sios, tasol Maria i winim ol. Olsem na laip bilong Maria i mas kamap eksampel bai olgeta manmeri i ken lukim na bihainim. Maria i mas kamap olsem mirra we yumi ken lukim ol pasin bilong em na bihainim. Yumi mas save long wanem samting em i bin mekim, na wokabaut wankain olsem em yet i bin wokabaut».

Olsem na yumi ol Katolik manmeri i amamas tru long kolim Maria «Mama, pasin bilong yu i stret olgeta», long wanem God yet i mekim na Maria i pulap long grasia, na grasia bilong God i bin mekim Maria i pulap tru long ol gutpela pasin! Yumi no ken lustingting olem Maria em i no

wanpela meri wankain olsem ol meri bilong ples Nogat tru! **Maria em i dispela meri God yet i bin makim bilong kamap bilong Pikinini bilong em, Jisas, em i God tru na Sevia bilong yumi.** Long bipo bipo tru, taim heven na graun i no bin kamap yet, God i bin makim pinis Maria bilong kamap bilong Jisas! Olsem na long dispela as tasol yumi kolim Maria em i «Mama bilong God» na «Mama, pasin bilong yu i stret olgeta»!

Mama bilong gutpela tingting

(Mother of good counsel)

Long dispela litani yumi kolim santu Maria em i «Mama bilong gutpela tingting». Na em i tru, long wanem God yet i bin pulapim Maria long olgeta gutpela save. Olsem na taim yumi tok olsem Maria i pulap long gutpela tingting, yumi tok olsem em i pulap long save bilong God na long save bilong ol samting bilong antap. Yumi min olsem Maria i pulap long ol gutpela tingting na advais, na save bilong em inap long soim yumi rot bilong bihainim ol gutpela pasin na bilong abrusim ol pasin nogut. Dispela em i as bilong dispela litani! Maria i pulap long gutpela tingting bilong God na bilong ol samting bilong heven, na em i pulap tu long ol gutpela advais bilong helpim yumi long go long heven.

Olsem na dispela nem bilong «Mama bilong gutpela tingting» i gat 2-pela as bilong em.

1) Maria em i Mama bilong gutpela tingting, long wanem em yet i kam long tingting bilong God

Long bipo bipo tru, taim dispela graun i no kamap yet, orait God i save pinis long Maria. Long eterniti God i makim Maria bilong kamap mama bilong Jisas, olsem na God i tingting long Maria na i amamas long em, maski Maria i no bin kamap yet long graun. Strongpela save na pawa bilong God i bin mekim Maria i kamap long graun, na God yet i bin pulapim em long olgeta grasia na blesing. Wankain olsem wanpela gutpela marit man i save tingting oltaim long meri bilong em, olsem tasol God i tingting long Maria oltaim. Maski heven na graun i no bin kamap yet, long eterniti God i tingting long Maria na i laikim em antap long ol ensel. Dispela tok profet bilong Jeremaia i kamap ples klia long santu Maria: *Bikpela... i tok olsem: «Long bipo bipo tru mi save laikim yu»* (31:3).

2) Maria em i Mama bilong gutpela tingting, long wanem gutpela tingting em i wanpela presen bilong Holi Spirit

Planti manmeri i gat save bilong ol samting bilong graun, tasol i no planti manmeri i gat save bilong God na bilong ol samting bilong antap. Save bilong ol samting bilong God i kam long yumi olsem wanpela presen bilong Holi Spirit. Holi Spirit tasol inap long givim dispela kain save long yumi, long wanem Holi

Spirit tasol inap long skulim yumi long ol samting bilong heven. Na Maria i pulap tru long Holi Spirit, olsem na Holi Spirit yet i bin pulapim Maria long save bilong God na long save bilong ol samting bilong heven. I no gat wanpela ensel o santu i ken winim Maria long save bilong God. Nogat tru. Holi Spirit yet i bin mekim na Maria i pulap long gutpela tingting na gutpela save bilong God.

Olsem na oltaim yumi mas singaut long Maria, bai em i ken givim gutpela tingting long yumi. Maria inap long soim rot long yumi, bai yumi i ken i stap gut na i stret long ai bilong God. Planti taim tingting bilong yumi i sot na paul, olsem na yumi no save gut long wanem samting yumi mas mekim bilong kamap santu. Tasol Maria i no sot long save, olsem na oltaim em i redi long givim gutpela tingting na advais long yumi!

Yumi mas askim Maria long givim gutpela tingting na advais long yumi, bai bilip bilong yumi i ken gro na kamap bikpela moa yet. Planti taim bilip bilong yumi i save slek, na yumi save tubel. Orait, Maria em i redi oltaim long helpim yumi, na ol gutpela tingting bilong em bai i helpim yumi!

Yumi mas askim Maria long helpim yumi long lukautim grasia bilong God insait long sol bilong yumi. Yumi save pinis olsem Satan, na amamas bilong graun, na ol laik nogut bilong bodi, i save pulim yumi long mekim sin, olsem na oltaim yumi mas

askim Maria long givim gutpela tingting long yumi, bai yumi ken skelim gut ol samting na abrusim ol samting nogut.

Yumi mas askim Maria long givim gutpela tingting long yumi, bai yumi ken helpim ol bratasusa bilong yumi. Planti taim yumi gat sans bilong helpim ol bratasusa i gat hevi, tasol yumi no luksave long ol, olsem na yumi i no helpim ol. Orait, yumi mas askim Maria long helpim yumi long luksave long ol nid bilong ol bratasusa bilong yumi!

Na tu yumi mas askim Maria long givim gutpela tingting long yumi, bai oltaim yumi ken putim Jisas olsem nambawan samting insait long laip bilong yumi. Jisas i mas i stap nambawan samting long lewa bilong yumi, long wanem Jisas i bin kapsaitim blut bilong em yet bilong kisim bek yumi. Tasol planti taim yumi bisi long ol samting bilong graun na yumi lustingting long Jisas, olsem na isi isi yumi go longwe long em. Orait, yumi mas singaut long Maria na askim em long givim gutpela tingting long yumi, bai Jisas i ken kamap trupela King bilong laip bilong yumi!

Mama bilong God i kamapim olgeta samting

(Mother of our creator)

Dispela litani bilong Maria em i «Mama bilong God i kamapim olgeta samting» i save mekim planti manmeri i kirap nogut tru. Na tu planti manmeri bilong ol arapela lotu i save tok olsem dispela litani em i no tru, olsem na ol i save rabisim santu Maria na Katolik bilip. Planti manmeri bilong ol arapela lotu i save tok olsem: «God i no gat mama bilong em. Olsem wanem na yupela ol Katolik i kolim Maria “Mama bilong God”?». Na tu ol i save tok olsem: «Taim God i mekim kamap heven na graun, Maria i no bin kamap yet. Olsem na i no stret long kolim Maria em i “Mama bilong God i kamapim olgeta samting”». Tasol dispela toktok bilong ol em i samting nating,

long wanem yumi ol Katolik i save pinis olsem Maria em i mama bilong Jisas, na Jisas em i God tru, olsem na Maria em i trupela mama bilong God. Jisas em i God tru, na em i bin i stap 9-pela mun olgeta long bel bilong Maria, na taim i kamap pinis, orait Maria i bin karim Jisas long ples Betlehem. Olsem na yumi kolim Maria em i «Mama bilong God», long wanem Maria i karim Jisas, na Jisas em i God tru na namba 2 persona bilong God Triwan.

Taim yumi tingting long God i mekim kamap heven na graun, yumi save kirap nogut tru long strongpela pawa bilong em! Buk Baibel i tok olsem God i mekim wanpela tok tasol, na heven na graun i kamap: *Bipo bipo tru God i mekim kamap heven na graun* (Stat 1:1). Olgeta samting bilong heven na graun i kam long han bilong God tasol. Buk Baibel yet i stori long yumi long dispela samting i kamap olsem wanem.

Na taim God i laik kam long graun na kamap man, orait em i laik kam long graun wankain olsem ol arapela man i save kam: **God i laik kam long graun insait long bel bilong wanpela meri, na em i laik long dispela meri i karim em na i kamap mama bilong em.** Stori bilong dispela samting i stap long 4-pela Buk bilong Gutnius, na ol i tok klia olsem Jisas i bin i stap 9-pela mun olgeta long bel bilong Maria, na bihain Maria i bin karim em, na Jisas yet i kolim em «Mama bilong mi», na Maria i kolim Jisas «Pikinini bilong mi».

Tasol pastaim long Maria i kamap long graun, orait God i save pinis long Maria. God i save pinis olsem wanpela de bai i kamap na em yet bai i kam long graun bilong kisim bek ol manmeri. Olsem na God i laik redim wanpela meri, bai dispela meri i ken kamap mama bilong em. Olsem na em i makim Maria, na em i pulapim Maria long olgeta grasia na blesing. God yet i mekim na sol bilong Maria i winim tru olgeta samting bilong heven na graun. God yet i mekim na Maria i winim ol strongpela ensel bilong heven. Na God i mekim olsem long Maria, long wanem God yet i laik kamap man insait long bel bilong Maria.

Olsem na taim i kamap pinis na Maria i kisim bel long Holi Spirit, orait God I Strong Olgeta i kam na i stap insait long bel bilong Maria! Yes, long wanem Jisas em i God tru, na namba, na pawa na strong bilong Jisas em i wankain olsem namba, pawa na strong bilong God Papa na God Holi Spirit! **Jisas em i God I Strong Olgeta i bin mekim kamap heven na graun, na em i bin i stap 9-pela mun olgeta insait long bel bilong santu Maria!** O bikpela misteri tumas! Heven na graun na olgeta sta i liklik tumas long ai bilong God, tasol em yet i bin kam i stap long bel bilong Maria! Heven na graun i olsem das nating long ai bilong God, tasol em yet i laik kamap liklik bebi na i gro long bel bilong Maria! Olsem na long dispela as tasol tumi kolim Maria em i «Mama bilong God i kamapim olgeta samting», long wanem God I Strong Olgeta i bin kamap man insait long bel

bilong em. God I Strong Olgeta i bin kamap wanpela liklik bebi insait long bel bilong Maria, na Maria yet i bin karim em na i kamap trupela Mama bilong God.

Olsem na oltaim yumi mas trastim Maria na singaut long em! Strong bilong Maria em i bikpela tumas, long wanem strong bilong em i kam long God yet! Santu Antoni i tok: «Prea bilong Maria i winim tru prea bilong ol ensel na ol santu. Long wanem ol ensel na ol santu, ol i pren bilong God tasol. Tasol Maria i no pren bilong God. Nogat. **Maria em i Mama bilong God! Olsem na taim Maria i askim wanpela samting long God, orait wantu tasol God i save harim prea bilong Mama bilong em**».

Nau yumi pinisim dispela sapta wantaim wanpela stori. Wanpela de Jisas na santu Maria i kamap long santu Brigit, na Brigit i harim Jisas i tokim mama bilong em olsem: «Mama, yu ken askim olgeta samting long mi. Long wanem taim mi stap long graun, oltaim yu bin helpim mi, na i no gat wanpela taim yu bin tok “nogat” long mi. Olsem na nau mi laik mekim wankain pasin long yu. Mi laik helpim yu oltaim, na mi promis olsem mi no inap tok “nogat” long yu». Olsem na oltaim yumi ol Katolik i mas singaut long Maria, na askim em long helpim yumi! Jisas yet i tok olsem em i no inap tok «nogat» long mama bilong em. Oltaim Jisas i redi long harim ol singaut bilong mama bilong em!

Mama bilong Sevia

(Mother of our saviour)

Nau yumi kolim Maria «Mama bilong Sevia». Na em i tru, long wanem Maria i karim Jisas, na Jisas em i Sevia na Ridima bilong yumi. Olsem na em i gutpela na i stret long yumi kolim Maria em i «Mama bilong Sevia» bilong yumi. Long wanem salvesen i kam long Jisas, na Jisas i kam long graun long bel bilong santu Maria.

Taim Adam na Iv i mekim sin, God i pasim dua bilong heven, olsem na ol manmeri i no inap long go long heven. Tasol God i laikim yumi tumas, olsem na em i laik marimari long yumi. Olsem na God yet i promis olsem em bai i salim wanpela Sevia i kam bilong kisim bek ol manmeri. Olsem na long bipo tru oltaim ol profet i bin tok klia olsem God i no inap lustingting long promis bilong em, na wanpela de bai i kamap na em bai i

salim Ridima i kam long graun. Tasol ol Israel i mas wet pastaim, long wanem God i no inap salim Mesaia i kam hariap.

Na taim God yet i bin makim i kamap pinis, orait dispela promis bilong God i kamap ples klia na em i salim Jisas i kam long graun. Long Gutnius bilong santu Matyu ensel i tokim santu Josep olsem: «*[Maria] bai em i karim pikinini man, na yu mas kolim nem bilong em Jisas, long wanem, **em bai i lusim sin bilong ol manmeri bilong em na kisim bek ol***» (1:21).

Na long Gutnius bilong santu Luk ensel i tokim Maria olsem: «*Maria, yu no ken pret. God em i belgut tru long yu. Harim. Yu bai i kisim bel na karim wanpela pikinini man. Na yu mas kolim nem bilong em Jisas. Em bai i stap bikman. **Na bai ol i kolim em Pikinini bilong God Antap Tru***» (1:30-32). Dispela tupela hap tok bilong Buk Baibel i gat bikpela mining bilong ol!

Gutnius bilong santu Matyu i soim klia olsem Jisas i kam long graun bilong mekim wok Ridima tasol. Dispela em i as bilong God i kamap man! God i kamap man bilong kisim bek yumi. Ensel i tok klia long Josep olsem: «*[Jisas] em bai i lusim sin bilong ol manmeri bilong em na kisim bek ol*». Na Jisas yet i tok: «*Pikinini Bilong Man i kam bilong painim ol man i lus na kisim bek ol*» (Luk 19:10). Na santu Pol i mekim wankain toktok: *Krais Jisas i bin kam long graun bilong kisim bek yumi manmeri bilong mekim sin* (1 Timoti 1:15).

Na Gutnius bilong santu Luk i soim klia olsem Jisas em i trupela Pikinini bilong God. Ensel i tokim Maria olsem: «**...ol bai i kolim em [Jisas] Pikinini bilong God...**». Jisas i no wangepela man nating wankain olsem ol man bilong dispela graun. Nogat tru. Jisas em i Pikinini bilong God Antap tru, olsem na Jisas tu em i God tru, long wanem God pasin (o *divinity*) bilong Papa i stap tu long Pikinini. Ol Juda i bilip long God bai i salim Mesaia i kam bilong kisim bek ol manmeri, tasol ol i paul tumas, long wanem ol i tingting olsem Mesaia bai i stap wangepela bikman bilong graun tasol. Ol i no save olsem Mesaia bai i stap pikinini tru bilong God! Olsem na taim Jisas i kolim em yet «Pikinini bilong God», orait ol Juda i belhat nogut tru long em na kilim em i dai. Long Pen na Indai bilong Jisas em i klia olsem ol farisi na ol Juda i kros nogut tru long Jisas, long wanem Jisas i kolim em yet «Pikinini bilong God».

Olsem na yumi mas amamas na tokaut oltaim olsem: Maria em i trupela Mama bilong God, olsem na em i trupela Mama bilong Sevia bilong yumi! God yet i kisim bek yumi long wok ridima bilong Jisas! Na Maria em i gutpela mama tru bilong Jisas! Olsem na yumi mas amamas long kolim Maria em i «Mama bilong Sevia» bilong yumi, **long wanem Sevia bilong yumi i bin i stap 9-pela mun olgeta long bel bilong Maria!**

Na ol santu na saveman bilong Sios i tok olsem i gat narapela as bilong dispela nem «Mama bilong Sevia». Na dispela as em i

olsem: **Maria tu i bin mekim wok bilong kisim bek yumi.** Na Maria i bin mekim wanem wok? **Maria i bin givim bodi na blut long Jisas, long wanem bodi na blut bilong Jisas i kam long Maria yet.** Olsem na bodi bilong Jisas i hangamap long diwai kros i kam long Maria. Na blut bilong Jisas i kapsait long graun i kam long Maria tu. God yet i laik long Maria i pas tru wantaim pikinini bilong em, olsem na Maria tu i bin mekim wok bilong kisim bek yumi.

Em i tru olsem salvesen i kam long sakrifais bilong Jisas long diwai kros tasol, tasol Maria i bin ofarim pikinini bilong em long God Papa. Maria i akseptim dispela tingting bilong God Papa i tok olsem Jisas i mas i dai long diwai kros, na Maria tu i ofarim Jisas, bai Jisas i ken dai na kisim bek yumi. Na long dispela as tasol ol saveman bilong Sios i tok olsem Maria tu i bin wok bilong kisim bek yumi, long wanem em i givim bodi na blut long Jisas, bai Jisas i ken ofarim dispela bodi na blut long diwai kros.

O Maria! Yu trupela Mama bilong Sevia bilong yumi, long wanem yu yet i bin givim laip long Jisas! Yu yet i bin redim wanpela bodi long Jisas, na Jisas i ofarim dispela bodi long diwai kros! Blut bilong Jisas i kapsait bilong kisim bek yumi, em yu yet i bin givim long em!

Mama bilong marimari

(Mother of mercy)

Dispela litani bilong «Mama bilong marimari» i save givim bel isi na amamas long ol Katolik manmeri. Long wanem yumi save pinis olsem Maria em i trupela mama bilong yumi, na em i pulap long marimari, olsem na yumi no inap pret o bel hevi long wanpela samting. Nogat tru. Oltaim yumi mas tingim olsem Maria em i Mama bilong marimari, na yumi mas trastim em wantaim olgeta strong bilong yumi.

Buk Baibel i tok klia olsem God tasol em i as bilong sori na marimari, long wanem olgeta gutpela pasin i kam long God tasol. Na tu yumi save olsem God tasol inap long marimari long yumi, long wanem olgeta sin bilong yumi i egensim ol lo bilong em, olsem na God wanpela tasol i gat rait long marimari long yumi. Taim yumi mekim sin, orait yumi brukim ol lo bilong

God, olsem na God wanpela tasol i gat rait long marimari o panisim yumi, long laik bilong em tasol.

Long Olpela Testamen Profet Devit i amamas long litimapim nem bilong God, na em i singsing olsem: *God, yu as bilong sori, yu ken marimari long mi. Yu gat bikipela marimari tru, olsem na mi laik bai yu rausim olgeta pasin nogut bilong mi* (Buk Song 51:1). Profet Devit i luksave olsem God tasol em i as bilong sori na em i as bilong marimari. I no gat wanpela man o meri o ensel i ken tekewe ol sin bilong yumi. Nogat tru. God tasol inap long sori long yumi na klinim sol bilong yumi long sori bilong em.

Long Nupela Testamen marimari bilong God i kamap ples klia long Jisas. Taim Jisas i kam long graun, orait marimari na sori bilong God i kamap ples klia long ai bilong olgeta manmeri. God yet i kamap man bilong tekewe ol sin bilong yumi! God yet i kamap man bilong marimari long yumi! Na maski planti manmeri i bin givim baksait long Jisas, oltaim em i bin redi long marimari long ol!

Santu Pol i tok: *Tru, rong bilong yumi em i kilim yumi na yumi dai pinis. Yumi stap olsem ol man i dai pinis olgeta. Tasol marimari bilong God em i pulap tru na em i givim bel bilong em moa yet long yumi. Olsem na em i mekim yumi i stap laip wantaim Krai. Yes, long marimari bilong God tasol em i kisim bek yupela* (Efesus 2:4-5). Na em i tok moa olsem: *Tasol God, em Man bilong kisim bek yumi, em i laikim yumi tru, na em*

i marimari long yumi na mekim gutpela pasin long yumi. Na taim dispela pasin bilong em i kamap ples klia, em i kisim bek yumi (Taitus 3:4-5).

Marimari bilong Maria long «Yesa» bilong em

Olsem wanem na yumi kolim Maria em i «Mama bilong marimari»? Maria em i Mama bilong marimari, long wanem bikpela marimari bilong em i kamap ples klia long taim em i tok «Yesa» long Ensel Gabriel. Long dispela taim tasol heven i op, na marimari bilong God i kapsait long graun, na Jisas i kam i stap wantaim yumi hia long graun. Sapos Maria i tok «Nogat» long Ensel Gabriel, orait yumi olgeta bai i lus, long wanem Jisas bai i no inap long kam long graun bilong kisim bek yumi. Tasol Maria i tok «Yesa», olsem na bikpela marimari bilong God i kam long graun na kisim bek yumi!

Olsem na God yet i bin makim Maria olsem namelmeri bilong tilim marimari, long wanem God yet i bin makim em bilong kamap Mama bilong Jisas. God tasol inap long marimari long yumi, tasol God yet i bin makim Maria bilong tilim marimari bilong em. Olsem na taim yumi pilim olsem yumi stap longwe long Jisas na yumi painim hat long kam bek, orait yumi mas singaut long Maria, na em bai i helpim yumi long kam bek long Jisas.

Santu Alfons i tok: «**Maria em i Kwin bilong marimari, long wanem em i save marimari oltaim long ol manmeri bilong sin.** I no gat wanpela man o meri bilong sin i singaut long Maria, na Maria i no bin helpim em. Nogat tru. Maski ol sin bilong yumi i planti tumas na i bikpela tru! Sapos yumi singaut long Maria, orait wantu tasol em bai i karamapim yumi long marimari bilong em». Na santu Gregori i tok moa olsem: «Pawa na strong bilong santu Maria i winim tru pawa na strong bilong ol santu. Wankain olsem tasol marimari bilong Maria i bikpela tumas na i redi oltaim long helpim ol manmeri bilong sin». Na santu Bernard tu i tok: «**Maria em i Kwin bilong marimari, olsem na yumi no ken pret long kam long em.** Em i no save kros long ol manmeri bilong sin. Em i no save bel nogut long ol. Nogat tru. Maria i save marimari tasol long ol manmeri bilong sin i singaut long em».

Yumi ol Katolik i mas tok tenkyu oltaim long santu Maria, long wanem marimari bilong God i kamap ples klia long Jisas, na Jisas i kam long santu Maria. «Yesa» bilong santu Maria i mekim God i marimari long yumi, na nau yumi inap long go long heven! Nau heven i op, na ol gutpela manmeri inap long go insait long em. Na dispela samting i kamap long taim Maria i tok «Yesa» long Ensel Gebriel!

Nau yumi pinisim dispela litani bilong santu Maria wantaim wanpela sotpela stori. Wanpela de Maria i kamap long santu

Brigit na i tokim em olsem: «Mi Kwin bilong heven na Mama bilong marimari. Mi save givim amamas long ol gutpela manmeri, na mi save opim dua bilong heven long ol manmeri bilong sin. I no gat wanpela man o meri bilong mekim sin i singaut long mi na mi no harim prea bilong em. Maski sin bilong ol manmeri i bikpela tumas, sapos ol i singaut long mi, orait wantu tasol bai mi marimari long ol na kisim ol i kam bek long God».

Virgo i save skelim gut ol samting

(Virgin most prudent)

Long dispela litani yumi kolim Maria em i «Virgo i save skelim gut ol samting». Trupela litani long Tok Inglis i kolim Maria em i «*prudent*», tasol em i hat liklik long tanim long Tok Pisin. Dispela litani i min olsem Maria i bin pulap long save bilong skelim gut ol samting, na dispela kain save long Tok Inglis ol i save kolim «*prudence*».

Ol santu na ol saveman bilong Sios i tok olsem dispela save bilong skelim gut ol samting (o *prudence*, long Tok Inglis) em i bikpela samting tumas, long wanem em i save helpim yumi long mekim tupela samting:

1) **Namba wan samting**, dispela save bilong skelim gut ol samting i save helpim yumi long abrusim ol samting nogut i laik pulim yumi long go long hel.

2) Namba tu samting, dispela save bilong skelim gut ol samting i save helpim yumi long bihainim ol gutpela pasin bilong i go long heven.

Olsem na yumi ol Katolik manmeri i mas wok hat bilong kisim dispela save, na yumi mas askim God long givim dispela save long yumi, bai oltaim yumi ken save gut long wanem samting yumi mas mekim na wanem samting yumi mas abrusim. Sapos yumi sot long dispela kain save, orait yumi bai i pundaun long planti sin, na yumi bai i no inap long luksave long ol gutpela pasin yumi sapos long mekim. Olsem na long dispela as tasol ol santu i save tok olsem dispela save i go pas long ol gutpela pasin, long wanem sapos yumi sot long em, orait yumi bai i no inap long bihainim God gut. Tasol sapos yumi pulap long dispela save i kam long God, orait em bai isi long yumi i bihainim God na abrusim ol samting nogut i laik pulim yumi long mekim sin.

Na santu Maria i bin pulap tru long dispela save bilong God, na oltaim em i bin skelim gut ol samting! Taim Ensel Gebriel i bringim tok long Maria, orait wantu tasol Maria i bilip long tok bilong Ensel, tasol em i askim Ensel tu long ol dispela samting bai i kamap olsem wanem. Maria i amamas long kamap mama bilong Jisas, tasol em i askim Ensel long givim wanpela eksplanesen long em, long wanem Maria i laik i stap virgo, olsem na em i laik save long em bai i kisim bel olsem wanem.

Buk Baibel i tok: *Na Maria i askim ensel olsem: «Dispela samting bai i kamap olsem wanem? Mi no marit yet long wanpela man»* (Luk 1:34). Dispela askim bilong Maria i soim yumi olsem em i save skelim gut ol samting, long wanem em i no laik mekim rong, na em i laik mekim ol pasin i stret tasol. Santu Bernard i tok: «Taim Maria i askim Ensel Gebriel long givim eksplanesen long em, orait bikpela save bilong Maria i kamap ples klia, long wanem wantu tasol em i bilipim long tok bilong Ensel, tasol em i no klia long rot bilong dispela samting bai i kamap olsem wanem. Olsem na bikpela save bilong Maria i pulim em long askim Ensel Gebriel long givim wanpela eksplanesen». Orait, na taim Ensel Gebriel i tokim Maria olsem em bai i kisim bel long Holu Spirit tasol, wantu Maria i givim «Yesa» bilong em long Ensel, na em i kamap Mama bilong God: *Na Maria i tok olsem: «Harim. Mi wokmeri bilong Bikpela. Em i ken mekim long mi olsem yu tok»* (Luk 1:38).

Rot bilong kisim save bilong skelim gut ol samting

Em i gutpela long yumi tu i gro long pasin bilong skelim gut ol samting, long wanem sapos yumi sot long em, orait em bai i hat long yumi bihainim God gut. Kain kain samting nogut bai i paulim tingting bilong yumi na pulim yumi long go longwe long God. Olsem na yumi tu i mas pulap long save bilong

skelim gut ol samting (o *prudence*, long Tok Inglis).

Na bai save bilong yumi i ken kamap bikpela moa yet, orait ol santu i save tok olsem yumi mas mekim dispela 3-pela samting:

1) Prea na askim God: yumi mas askim God oltaim long givim dispela save long yumi, long wanem God tasol em i as na papa bilong olgeta gutpela save. Olgeta de yumi mas askim God long givim gutpela tingting na gutpela save long yumi, bai yumi ken skelim gut ol samting.

2) Ritim ol gutpela buk: yumi mas ritim ol gutpela buk, long wanem ol skul i stap insait long ol dispela buk bai i mekim save bilong yumi i gro na i kamap bikpela moa yet.

3) Bihainim pasin bilong ol santu: yumi mas save long laip stori bilong ol santu, na yumi mas wok hat bilong bihainim ol gutpela pasin bilong ol. Ol santu ol i man na meri wankain olsem yumi, tasol ol i pulap tru long save bilong God, olsem na sapos yumi save long laip stori bilong ol, orait em bai isi long yumi ken bihainim ol pasin bilong ol, na ol bai i helpim yumi long i stap gut.

Long dispela as tasol yumi kolim santu Maria «Virgo i save skelim gut ol samting», long wanem God yet i mekim na santu Maria i pulap long save i kam long God tasol!

Virgo, mipela i mas onarim yu

(Virgin most venerable)

Long dispela litani yumi kolim Maria «Virgo, mipela i mas onarim yu», na em i tru, long wanem oltaim yumi mas onarim santu Maria na amamas long givim ona long em. Tasol i gat planti manmeri bilong ol arapela lotu i no wanbel long dispela pasin bilong yumi ol Katolik, olsem na ol i save askim yumi long as bilong dispela ona yumi save givim long Maria. Olsem na yumi i mas tok klia olsem: yumi save onarim Maria long 3-pela as: **1)** Yumi onarim Maria long wanem em i mama bilong Jisas. **2)** Yumi onarim Maria long pasin holi bilong em. **3)** Yumi onarim Maria long wanem em i gutpela mama bilong yumi.

1) Yumi onarim Maria long wanem em i mama bilong Jisas

Dispela em i nambawan as bilong ona bilong yumi i go long

santu Maria: God yet i bin makim Maria bilong kamap mama bilong Jisas, na Jisas em i God tru na Sevia bilong yumi! Yumi onarim Maria long wanem em i Mama bilong God, na salvesen i kam long graun long taim Maria i tok «Yesa» long Ensel Gebriel! Pastaim long Jisas i kam long graun ol manmeri i no inap long go long heven, long wanem dua bilong heven i pas olgeta long sin bilong Adam na Iv. Tasol taim Jisas i kam long graun em i winim strong bilong Satan na strong bilong sin, na long sakrifais bilong em long diwai kros em i kisim bek yumi na opim dua bilong heven gen. Olsem na nau ol manmeri i dai wantaim grasia bilong God inap long go long heven. Na dispela samting i kamap long wanem santu Maria i bin tok «Yesa» long Ensel Gebriel, na God yet i salim Pikinini bilong em i kam long graun long bel bilong santu Maria. Olsem na oltaim yumi mas onarim santu Maria, long wanem em i Mama bilong God na Sevia bilong yumi!

2) Yumi onarim Maria long pasin holi bilong em

God yet i bin mekim narakain samting long Maria, na em i bin pulapim Maria long olgeta grasia na blesing! Taim Ensel Gebriel i bringim tok long Maria, Ensel yet i kolim Maria em i **«pulap long grasia»** (Luk 1:28). Na santu Maria yet i tok: **«God i gat bikpela strong, em i bin mekim narakain samting tru bilong helpim mi»** (Luk 1:49). Olsem na God yet i bin litimapim

Maria antap long ol ensel na ol santu! God yet i bin pulapim Maria long olgeta gutpela samting, na mekim Maria i pulap long grasia na olgeta gutpela pasin. Maria i no sot long wanpela pasin i holi. Nogat tru. Olgeta gutpela pasin i stap long Maria, na em i winim tru ol ensel na ol santu! Olsem na yumi ol gutpela pikinini bilong Maria i amamas tumas long ol bikpela samting God i bin mekim long em, na yumi onarim em gut tru!

3) Yumi onarim Maria long wanem em i gutpela mama bilong yumi

God yet i givim ol 10-pela mandato long yumi, na long mandato namba 4 God i tokim yumi olsem: «Yu mas rispektim papamama bilong yu na mekim gut long ol». Olsem na yumi ol Katolik i bihainim dispela mandato na yumi laik onarim santu Maria, long wanem Maria em i trupela mama bilong yumi. Taim Jisas i hangamap long diwai kros, em i givim mama bilong em yet long santu Jon, bai em i ken kamap mama bilong Jon tu. Na ol saveman bilong Sios i tok olsem santu Jon i makim ol Katolik manmeri! Olsem na Jisas i no givim mama bilong em long Jon tasol. Nogat tru! Jisas i givim mama bilong em long yumi ol Katolik, olsem na yumi save pinis olsem Maria em i trupela mama bilong yumi tu! Na long dispela as tasol yumi onarim Maria na amamas long em, long wanem God yet i tok olsem yumi mas onarim na mekim gut long papamama bilong yumi.

Long dispela 3-pela as tasol yumi ol Katolik i save onarim nem bilong Virgo Maria! Na yumi ol Katolik i no ken tait long onarim nem bilong em! Nogat tru! Oltaim yumi mas amamas long onarim nem bilong santu Maria, na oltaim yumi mas toktok long ol gutpela samting God i bin mekim long em!

Na tu yumi no ken larim ol manmeri bilong ol arapela lotu i sutim spia long Maria na rabisim em. Nogat olgeta. Planti taim i save kamap olsem ol manmeri bilong ol arapela lotu i save rabisim santu Maria, na ol Katolik i harim, na ol i stap isi na ol i no mekim wanpela samting. Na dispela pasin bilong ol Katolik em i kranki olgeta. Sapos yumi harim olsem wanpela man o meri i wok long toknogutim santu Maria na rabisim em, orait yumi mas sanap strong na bekim maus na paitim tok wantaim dispela man o meri. Yumi mas sanap strong na difendim santu Maria oltaim! Maria em i Mama bilong God na em i mama bilong yumi, olsem na oltaim yumi mas kisim sait bilong em na bekim maus long ol manmeri i wok long bagarapim nem bilong em! God yet i tok olsem yumi mas mekim gut long papamama bilong yumi, olsem na i no gutpela long yumi i stap isi taim wanpela man o meri i rabisim santu Maria. Sapos yumi trupela pikinini bilong santu Maria, orait oltaim yumi bai i painim strong bilong onarim nem bilong em!

*Virgo, mipela i mas litimapim
nem bilong yu*

(Virgin most renowned)

Long dispela litani yumi kolim Maria «Virgo, mipela i mas litimapim nem bilong yu», na em i tru, long wanem yumi mas litimapim nem bilong Maria oltaim. Na yumi ol Katolik i save inapim gut dispela litani, long wanem oltaim yumi save litimapim nem bilong Maria. Yumi save pinis olsem God i bin mekim narakain samting long Maria, olsem na God yet i bin mekim Maria i kamap nambawan santu long heven, antap tru long olgeta arapela ensel na santu. Na long dispela as tasol bel bilong yumi i save kalap na singsing amamas oltaim long Mama bilong God!

Yumi mas litimapim santu Maria long wanem God Papa yet i bin makim em bilong kamap mama bilong Jisas. Bipo bipo tru, taim dispela graun i no bin kamap yet, God Papa i bin makim pinis Maria bilong karim Sevia bilong yumi long bel bilong em!

Yumi mas litimapim santu Maria long wanem God Pikinini i bin i stap 9-pela mun olgeta long bel bilong em. Maria yet i bin givim bodi na blut long bebi Jisas taim Jisas i bin i stap long bel bilong em. Na dispela bodi tasol i bin hangamap long diwai kros bilong kisim bek yumi, olsem na yumi mas tenkim Maria na litimapim nem bilong em oltaim.

Yumi mas litimapim santu Maria long wanem God Holi Spirit i mekim na Maria i kamap mama bilong Jisas. Holi Spirit tasol i bin mekim santu Maria i kisim bel na karim Ridima bilong yumi long bel bilong em.

Yumi mas litimapim santu Maria long wanem em i pulap long grasia na blesing bilong God. Grasia bilong God insait long sol bilong Maria i pulap tru, na i no gat wanpela ensel o santu i ken winim em. Nogat tru! Maria i go pas long ol ensel na ol santu.

Yumi mas litimapim santu Maria long wanem em i pulap long ol gutpela pasin. Grasia bilong God i mekim na Maria i pulap long olgeta gutpela pasin. I no gat wanpela pasin i gutpela i no i stap long sol bilong Maria. Nogat tru. Olgeta gutpela pasin i stap long sol bilong em.

Yumi mas litimapim santu Maria long wanem em i krungutim het bilong Satan na em i klin olgeta. Long taim mama i karim em inap long em i dai, Maria i bin i stap klin olgeta long ai bilong God, na sol bilong em i no bin gat wanpela sin.

Yumi mas litimapim santu Maria long wanem em i bin i stap virgo oltaim, na long dispela as tasol yumi tok olsem Maria i go pas long ol virgo. Maria em i mama na em i virgo, na dispela mirakel i kam long han bilong God tasol, long wanem God i laikim Maria tumas.

Yumi mas litimapim santu Maria long wanem God i kisim em i go long heven wantaim bodi na sol. God i no larim Maria i bagarap long matmat wankain olsem ol arapela manmeri bilong dispela graun. Nogat tru. God i laik long mama bilong em i stap long heven wantaim em, olsem na em i kisim Maria i go long heven, na nau Maria i stap long heven wantaim bodi na sol bilong em.

Yumi mas litimapim santu Maria long wanem God yet i bin makim em olsem Kwin bilong heven na graun. Jisas em i King bilong olgeta samting, tasol Jisas yet i makim mama bilong em olsem Kwin. Na long dispela as tasol Maria i go pas long olgeta samting.

Yumi mas litimapim santu Maria long wanem em i winim ol ensel na ol santu. God yet i bin putim Maria antap tru long

ol ensel na santu bilong heven, olsem na ol i save amamas long Maria na litimapim nem bilong em oltaim.

Yumi mas litimapim santu Maria long wanem em i Mama bilong marimari, na em i ples hait bilong ol manmeri bilong mekim sin. Maria i save harim prea bilong ol manmeri bilong sin na i save helpim ol long kam bek long Jisas.

Yumi mas litimapim santu Maria long wanem em i gutpela mama bilong yumi. Jisas yet i givim mama bilong em long yumi, bai em i gutpela mama bilong yumi tu. Olsem na yumi ol Katolik i gat tupela mama: wanpela mama long graun na wanpela long heven. Mama bilong graun i givim laip long bodi bilong yumi, na mama bilong heven i givim Jisas long yumi, na Jisas i givim laip long sol bilong yumi.

Ol santu na ol saveman bilong Sios i bin raitim planti tausen buk wantaim ol gutpela pasin bilong Maria. Santu Bernard i tok: «Maski yumi raitim planti buk bilong santu Maria, ol bai i no inap long tok klia long bikpela pawa na strong bilong Maria. Tingting bilong yumi i sot, olsem na i no gat wanpela man o meri long graun i ken toktok gut long ol gutpela samting God i bin mekim long santu Maria».

Olsem na nem bilong santu Maria i mas i stap oltaim long maus bilong yumi! Oltaim yumi mas toktok long ol gutpela samting God i bin mekim long Maria, na oltaim yumi mas litimapim nem bilong em! Maria yet i bin promis long santu

Dominik olsem em bai i givim planti grasia long ol manmeri i litimapim nem bilong em. Na tu Maria i tok olsem em bai i givim spesel blesing long ol manmeri i save mekim wok aposel na wok long lainim ol samting bilong santu Maria long ol arapela manmeri i no save yet long em. Olsem na oltaim yumi mas wok hat na mekim wok aposel long ol manmeri i no save yet long santu Maria!

Virgo, yu strongpela tru

(Virgin most powerful)

Nau yumi kolim santu Maria «Virgo, yu strongpela tru», na em i gutpela long yumi givim dispela nem long em, long wanem strong bilong santu Maria i bikpela tru long ai bilong God.

Pastaim yumi mas tok olsem God tasol em i Strong Olgeta. Yes, long wanem strong bilong God Triwan i winim tru strong bilong santu Maria, na strong bilong ol ensel, na strong bilong olgeta samting. Yumi no ken paul na tingting olsem strong bilong Maria em i wankain olsem strong bilong God. Nogat tru.

Strong bilong God i kam long em yet, na i no gat arere o pinis bilong em, olsem na yumi kolim God em I Strong Olgeta. Tasol strong bilong Maria i no kam long Maria yet. Nogat. **Strong bilong santu Maria i kam long God yet**, olsem na God yet i

bin mekim na Maria i strong tumas. Olsem na strong bilong God na strong bilong Maria i no wankain. God tasol i gat Olgeta Strong i kam long em yet, na Maria em i strong tru wantaim strong i kam long God. Olsem na yumi mas tok klia olsem strong bilong God i winim tru strong bilong santu Maria, na strong i stap long santu Maria i kam long God tasol.

Orait tasol yumi save pinis olsem God i bin pulapim santu Maria long olgeta grasia na blesing i winim tru ol ensel na ol santu. Na God i bin pulapim Maria tu long strong tu, olsem na strong bilong Maria i winim strong bilong ol ensel na ol santu. Santu Alfons i tok: «Strong bilong santu Maria em i bikipela tumas, na God tasol inap long winim em».

Olsem wanem na God i bin givim bikipela strong long santu Maria? God i bin givim bikipela strong long Maria, bai Maria i ken helpim ol manmeri. Dispela em i as bilong strong bilong santu Maria. God yet i bin givim bikipela strong long Maria, long wanem God yet i laik long Maria i helpim ol manmeri bilong graun, olsem na oltaim yumi mas singaut long em. Na helpim bilong santu Maria i kamap ples long taim em i karim Jisas, long wanem Ridima bilong yumi i kam long graun long bel bilong em. Tasol oltaim Maria i wok long helpim yumi inap long nau, na inap long las de bilong laip bilong yumi!

Strong bilong santu Maria long Buk Baibel

Long Buk Baibel i gat planti eksampel i toktok long strong bilong santu Maria. Tasol i no gutpela long yumi pulim tok tumas, olsem na bai yumi toktok long 3-pela stori i stap long Buk Baibel.

1) Maria i krungutim het bilong Satan

Dispela stori i stap long buk bilong Stat, na em i namba wan taim God i tok olsem em bai i salim Mesaia i kam long graun bilong bagarapim Satan na winim strong bilong em. Buk Baibel i tok: *Na God, Bikpela i tokim snek olsem: «Yu bin mekim dispela pasin nogut, olsem na nau mi gat strongpela tok bilong daunim yu. (...) Na bai mi mekim yu i stap birua bilong meri, na meri i stap birua bilong yu. Na bai mi mekim ol lain bilong yu i birua long lain bilong meri. Bai ol i krungutim het bilong yu, na bai yu kaikaim lek bilong ol»* (Stat 3:14-15). Dispela meri Buk Baibel i tok long em, em i santu Maria tasol. Na Buk Baibel yet i tok olsem dispela meri bai i pinisim strong bilong Satan, long wanem pikinini bilong em bai i kisim bek ol manmeri. Long bigin tru bilong Buk Baibel God i soim olsem pawa bilong Maria em i bikpela tru, inap long krungutim het bilong Satan!

2) Maria i tok na Jisas i mekim namba wan mirakel bilong em

Long Gutnius bilong santu Jon i gat stori bilong strong bilong Maria long mirakel Jisas i bin mekim long kaikai bilong marit long taun Kana long Galili. Buk Baibel yet i tok olsem Jisas i no laik mekim dispela mirakel, long wanem taim bilong Jisas bilong mekim ol mirakel na kamap ples klia i no bin kamap yet. Olsem na Jisas i bekim mama bilong em olsem: «*Meri, yu laikim wanem samting bilong mi? Taim bilong mi em i no yet*» (Jon 2:4). Tasol i luk olsem Maria i no putim yau long bekim bilong pikinini bilong Jisas, olsem na em i singautim ol wokman na i tokim ol olsem: «*Mekim olgeta samting em i tokim yupela long mekim*» (Jon 2:5). Na wantu Jisas i harim singaut bilong mama bilong em, olsem na Jisas i mekim namba wan mirakel bilong em! Na stori bilong dispela mirakel i skulim yumi long tupela samting:

1- Stong bilong Maria i kam long Jisas yet. Long wanem i no santu Maria i bin mekim dispela mirakel long strong bilong em yet. Nogat tru. Jisas tasol i mekim dispela mirakel! Tasol Jisas i mekim dispela mirakel taim mama bilong em i askim long mekim. Olsem na olgeta grasia na mirakel i save kam long han bilong Jisas tasol, tasol Jisas i save harim ol prea bilong mama bilong em. Na long dispela as yumi tok olsem Maria em i strong tumas, long wanem ol prea bilong em i gat bikipela strong long ai bilong Jisas, na Jisas i no inap sakim tok bilong mama bilong em.

2- Jisas i save harim ol prea bilong mama bilong em. Dispela mirakel bilong taun Kana i soim yumi olsem maski Jisas i bin tokim mama bilong em olsem em i no taim yet bilong mekim mirakel, Maria i askim Jisas na wantu Jisas i harim prea bilong mama bilong em. Olsem na yumi mas putim ol prea bilong yumi long han bilong santu Maria, na askim em long givim ol prea bilong yumi long Jisas. Long wanem sapos mama bilong Jisas i askim em long mekim wanpela samting, orait wantu tasol Jisas bai i mekim!

3) Maria i pasim san olsem klos bilong em

Long pinis tru bilong Buk Baibel, i gat wanpela hap tok long Buk bilong Revelesen i tok olsem: *Orait wanpela narakain mak tru i kamap long skai. Dispela mak i olsem. Wanpela meri i stap, na em i pasim san olsem klos bilong em. Na mun i stap aninit long lek bilong em, na 12-pela sta i stap olsem hat long het bilong em* (12:1). Dispela meri em i husat tru? Ol saveman bilong Sios na ol santu i tok olsem dispela meri em i piksa bilong santu Maria. Na Buk bilong Revelesen i soim bikpela pawa bilong Maria, long wanem Maria i pasim san olsem klos bilong em, na mun i stap aninit long lek bilong em, na tu 12-pela sta i raunim het bilong em olsem wanpela hat bilong kwin.

Na Buk bilong Revelesen i tok moa olsem: *Dispela meri i gat bel... Em i laik karim pikinini... Na narapela mak i kamap long*

skai. Dispela mak em i olsem. Wanpela traipela retpela snek i stap... Orait dispela snek i sanap long pes bilong meri i laik karim pikinini, na em i wetim meri i karim pikinini pinis, bai em i ken kaikai dispela pikinini. Na meri i karim pikinini man, em pikinini God i makim bilong holim stik ain na bosim strong olgeta lain manmeri. Meri i karim pikinini pinis, orait kwiktaim ol i kisim pikinini i go antap, na ol i bringim em i go long God na long sia king bilong em. Na dispela meri em i ranawe i go long hap i no gat man (12:2-6). Dispela hap tok bilong Buk bilong Revelesen i toktok long Maria i karim Jisas, na Satan i kros nogut tru. Tasol Satan i no inap long mekim wanpela samting long Jisas na long Maria. Nogat tru. Maski Satan inap long bosim olgeta spirit nogut bilong hel, em i no inap long mekim wanpela samting long Jisas na long Maria, long wanem Jisas em i God tru, na Maria i gat strong i kam long God.

Olsem na yumi ol Katolik i save kolim santu Maria «Virgo, yu strongpela tru», na em i tru, long wanem strong bilong Maria i kam long God tasol, na God yet i bin pulapim Maria long olgeta strong. Olsem na taim yumi sot long wanpela samting o taim yumi gat hevi, orait wantu yumi mas singaut long Maria. Maria i pulap long grasia na em i pulap long strong! Sapos yumi singaut long em, orait wantu em bai i harim ol prea bilong yumi, long wanem yumi pikinini bilong em. Na wantu Maria bai i helpim

yumi wankain olsem em i bin helpim dispela man na meri i laik
marit long taun Kana. Maria yet bai i askim Jisas long helpim
yumi, na Jisas i no inap long sakim tok bilong mama bilong em.
Nogat tru. Sapos Maria i askim Jisas long mekim wanpela
samting, orait Jisas bai i mekim!

Virgo, yu pulap long marimari

(Virgin most merciful)

Pastaim yumi bin kolim Maria em i «Mama bilong marimari», na nau yumi kolim em «Virgo, yu pulap long marimari». Dispela tupela litani bilong santu Maria i luk wankain, tasol tupela i no wankain, long wanem mining bilong tupela i no wankain. Taim yumi kolim Maria em i «Mama bilong marimari» yumi min olsem Maria i bin karim Jisas, na Jisas em i as bilong sori na marimari. Na taim yumi tok «Virgo, yu pulap long marimari» yumi min olsem lewa bilong Maria i pulap long marimari, olsem na oltaim em i save marimari long yumi.

Long taim Maria i tok «Yesa» long Ensel Gabriel, orait marimari bilong God i kamap ples klia, na God i salim Jisas i kam long graun bilong kisim bek yumi. Tasol wok bilong Maria i no pinis

long «Yesa» bilong em. Nogat tru! Wok bilong santu Maria i go het yet, na bai i go het inap long dispela graun i pinis!

Santu Maria i save marimari long yumi olgeta

Maria i gat wok bilong marimari long yumi. Wankain olsem long taun Kana em i bin askim Jisas long helpim dispela man i sot long wain, orait wankain olsem nau Maria i save askim Jisas long helpim yumi. Dispela em i wok bilong Maria! Em i gat wok bilong marimari na helpim yumi oltaim! Na dispela wok marimari bilong santu Maria i kam long bikpela laik bilong em i go long God, long wanem ol manmeri i save laikim God tru, ol i save laikim tu ol arapela manmeri. Buk Baibel i tok: ***Dispela lo yumi kisim long Krai, em i olsem. Man i save laikim tru God, em i mas laikim tru ol arapela manmeri*** (1 Jon 4:21).

Taim Maria i stap yet long dispela graun em i pulap long laikim pasin na marimari, na em i bin helpim olgeta manmeri, maski ol i no bin askim em pastaim. Long marit long taun Kana ol i no bin askim santu Maria long helpim dispela man i marit, tasol Maria i save pinis olsem ol i sot long wain, olsem na em i tokim Jisas: «*Ol i no gat wain*» (Jon 2:3). Taim wanpela man o meri i sot long sampela samting, wantu tasol Maria bai i kam na helpim ol hariap! Taim em i harim olsem kandere bilong em

Elisabet i gat bel, Gutnius i tok: *Maria i kirap na i **hariap** i go long ples maunten* (Luk 1:39). Santu Maria i no save westim taim na givim eskus. Nogat tru!

Santu Alfons i tok: «Sapos yumi laik luksave long bikpela laik bilong Maria i kam long yumi, orait yumi mas tingim olsem em i bin givim pikinini bilong em long yumi. Maria i larim Jisas i dai bilong helpim yumi. Maria i no pasim Jisas long dai bilong helpim yumi. Nogat tru. Maria i wanbel long Jisas i mas i dai bilong kisim bek yumi». Na santu Bonaventura i tok: «Maria i laikim tumas ol manmeri bilong dispela graun, olsem na em i givim pikinini bilong em yet long ol». Na em i tok moa olsem: **«Na nau Maria i stap long heaven, na dispela laikim pasin bilong em i kam long yumi, i kamap bikpela moa moa yet!** Nau Maria i inap long save long olgeta samting yumi sot long em, na wantu tasol em bai i kam na helpim yumi. **Bipo, taim Maria i stap long graun, marimari bilong em i bikpela tru. Tasol nau marimari bilong Maria i bikpela moa moa yet**». Na wanpela ensel i tokim santu Brigit olsem: «I no gat wanpela man o meri i bin singaut long Maria, na Maria i bin les long helpim dispela man o meri. Nogat tru». Sapos Maria i no prea bilong helpim yumi, orait yumi bai i lus olgeta. Na Jisas yet i tokim santu Brigit moa olsem: «Sapos Mama bilong mi i no prea bilong helpim ol manmeri, orait ol manmeri bai i lus».

Olsem na long dispela as tasol yumi kolim Maria «Virgo, yu pulap long marimari», long wanem lewa bilong Maria i pilim bikpela sori na marimari long yumi. Santu Maria i save pinis olsem yumi sot long planti samting, olsem na em i redi oltaim long marimari long yumi na helpim yumi.

Santu Maria i save marimari long ol manmeri bilong sin

Na i gat wanpela pasin Maria i save mekim na i bikpela tru: em i save marimari tru long ol manmeri bilong mekim sin. Dispela pasin em i nambawan wok marimari bilong santu Maria! Long wanem Maria i laikim tumas pikinini bilong em Jisas, olsem na em i laik long olgeta manmeri i kam long Jisas. Taim Maria i lukim wanpela man o meri i stap longwe long Jisas, orait marimari bilong em i pulim em long askim Jisas long helpim dispela man o meri, nogut em i lus olgeta long hel.

Santu Maria i no save les long ol manmeri bilong sin. Nogat. Em i save laikim ol, na em i save prea bilong helpim ol, long wanem em i laik helpim ol long go long heven. Maria i sori tumas long sin bilong ol manmeri, long wanem ol sin i bin bagarapim Jisas long diwai kros. Tasol Maria i no save belhat o bel nogut long ol manmeri nogut. Nogat tru. Em i save laikim ol, na prea strong bai ol i ken kam bek long Jisas na kisim grasia bilong God long sakramen bilong konpesio.

Na planti taim marimari bilong Maria i kamap ples klia long mun Me na Oktoba. Long mun Me yumi tingim mun bilong Maria, na long mun Oktoba yumi tingim mun bilong Rosari. Orait long dispela tupela mun planti manmeri bilong sin i save tanim bel na kam bek long Jisas. Long dispela tupela mun santu Maria i save kirapim tingting bilong konpes long planti man na meri, na ol i save tok olsem ol i laik kam bek long Jisas, long wanem ol i tingim santu Maria! Olsem na wok marimari bilong santu Maria i save go het, na em i save helpim planti manmeri long go long heven!

Oltaim yumi mas trastim marimari bilong santu Maria. Taim yumi sot long wanpela samting, yumi mas kolim nem bilong Maria. Taim yumi bel hevi, yumi mas kolim nem bilong Maria. Taim yumi gat wari o hevi, yumi mas kolim nem bilong Maria. Na taim yumi gat sin na yumi go longwe long God, orait yumi mas kolim nem bilong Maria planti taim, long wanem em bai i amamas tumas long harim prea bilong yumi, na em bai i kisim yumi i go bek long Jisas!

Virgo, yu bihainim God gut

(Virgin most faithful)

Dispela litani em i hat liklik long tanim i go long Tok Pisin. Long Tok Inglis yumi tok olsem Maria em i «*faithful*», olsem na long Tok Pisin yumi tok olsem Maria i «bihainim God gut», long wanem pasin «*faithful*» i min olsem pasin bilong bihainim God gut na inapim gut ol promis yumi bin mekim long em. Na dispela pasin bilong santu Maria bilong bihainim God gut i kam long bilip bilong em. Bilip tasol i save pulim yumi long bihainim God gut na long inapim olgeta promis yumi bin mekim long em. Olsem na sapos yumi sot long bilip, orait yumi bai i slek long bihainim God. Tasol sapos bilip bilong yumi i bikpela tru, orait yumi bai i bihainim gut ol tok bilong God na yumi bai inapim gut ol promis yumi bin mekim long em.

Bilip bilong santu Maria long Buk Baibel

Em i gutpela long yumi toktok liklik long bilip bilong santu Maria, long wanem bikpela bilip bilong em i bin strongim em long bihainim God gut. Pastaim yumi tok pinis olsem Maria i pulap long olgeta grasia na gutpela pasin, olsem na yumi mas tok olsem Maria i pulap long bilip tu. Na bilip bilong santu Maria i bikpela tumas na i winim tru bilip bilong ol arapela santu, long wanem God yet i bin makim em bilong kamap mama bilong Jisas, olsem na God yet i bin pulapim em long bilip.

Nau yumi skelim sampela eksampel bilong bilip bilong santu Maria i kam long Buk Baibel yet.

1) Maria i bilip olsem em bai i kamap mama bilong Ridima

Taim Ensel Gabriel i bringim tok long Maria, orait Maria i no tubel. Nogat. Wantu tasol em i bilipim olgeta tok i kam long maus bilong ensel, na em i daunim em yet na akseptim dispela wok God Papa yet i bin givim long em. Maria i bekim tok bilong Ensel Gabriel olsem: «*Harim. Mi wokmeri bilong Bikpela. Em i ken mekim long mi olsem yu tok*» (Luk 1:38).

2) Maria i bilip olsem lapun kandere bilong em i gat bel

Ensel Gabriel i toksave long Maria olsem Elisabet i gat bel na 6-pela mun bilong em i go pinis. Maski Elisabet em i lapun

pinis, Maria i bilipim tok bilong Ensel na wantu em i lusim haus na ples bilong em na i go helpim Elisabet. Buk Baibel i tok: *Long dispela taim Maria i kirap na i hariap i go long ples maunten, long wanpela taun bilong distrik Judia* (Luk 1:39).

3) Maria i bilip olsem Jisas em i God tru na i adorim em long Betlehem

Taim Maria i karim Jisas, orait em i putim bebi long bokis kaikai bilong bulmakau. Santu Josep i no bin inap long painim wanpela haus bai meri bilong em i ken karim Jisas. Olsem na taim Holi Famili i stap insait long dispela groto, ol i sot long olgeta samting. Ples i doti na i smel nogut, long wanem em i ples kaikai bilong ol animal. Tasol taim Maria i karim Jisas, orait wantu tasol em i adorim bebi Jisas. Maski Maria i no inap lukim God long ai bilong em, em i save pinis olsem dispela liklik bebi em i God tru na Bikipela bilong yumi. Maria em i namba wan meri i bin adorim Jisas long dispela graun.

4) Maria i bilip olsem God yet bai i helpim bebi Jisas

Buk Baibel i stori long pasin bilong King Herot i salim ol soldia bilong kilim ol pikinini man i no winim 2-pela krismas. Na Jisas tu i stap namel long ol dispela pikinini. Olsem na ensel i kamap long santu Josep na i tokim em olsem em i mas

ranawe na i go long Isip wantaim santu Maria na bebi Jisas. Olsem na Holi Famili i ranawe na i go hait long Isip. Na maski ol i bungim planti hevi long rot i go long Isip, oltaim Maria i trastim God, na em i save olsem God yet bai i helpim bebi Jisas long i stap gut. Dispela taim nogut bilong Holi Famili i no mekim Maria i slek long bilip bilong em. Nogat. Oltaim Maria i bin bilip strong long God.

5) Maria i bilip olsem Jisas bai i kisim bek olgeta manmeri

Dispela em i as bilong bikpela misteri bilong God i kamap man: God i kamap man bilong kisim bek ol manmeri bilong graun. God Papa i salim Pikinini bilong em i kam long graun bilong kisim bek yumi olgeta, long wanem bipo olgeta manmeri i bin i stap aninit long Satan, olsem na dispela graun i pulap long sin, na grasia bilong God i no bin kam yet. Tasol taim Jisas i kam long graun na em i ofarim bodi na blut bilong em long sakrifais bilong diwai kros, orait God Papa i amamas long dispela sakrifais bilong Jisas, olsem na em i kisim bek yumi. God Papa i lukim sakrifais bilong Jisas long diwai kros, na em i marimari long ol manmeri bilong graun. Na taim Maria i sanap long ples Kalvari na em i lukim pikinini bilong em i hangamap long diwai kros, em i save pinis olsem indai bilong Jisas bai i kisim bek ol manmeri. Olsem na Maria i bilipim God Papa na i no komplein long indai bilong Jisas.

Nogat. Maria i bilipim olgeta tok i kam long maus bilong God, olsem na em i bilip long Jisas i kam long graun bilong kisim bek yumi olgeta.

Yumi ol Katolik manmeri i mas prea oltaim long santu Maria na askim long mekim bilip bilong yumi i gro na i kamap bikpela moa yet! Sapos yumi bilip long God wantaim olgeta strong bilong yumi, orait laip bilong yumi bai i senis, na yumi bai inap long bihainim em gut. Olsem na oltaim yumi mas askim Maria long helpim yumi! Taim yumi painim hat long bihainim laik bilong God, orait yumi mas singaut long Maria na kolim nem bilong em!

Eksampel bilong stretpela pasin

(Mirror of justice)

Long dispela litani yumi kolim Maria em i «Eksampel bilong stretpela pasin», long wanem em i bin pulap long stretpela pasin, olsem na yumi mas lukluk long em na bihainim ol gutpela eksampel bilong em.

Buk Baibel i tok long sampela man i bin i stap «stretpela man» long ai bilong God. Na Buk Baibel i save litimapim nem bilong ol dispela man, na ol i kamap eksampel bai yumi i ken bihainim pasin bilong ol. Yumi skelim sampela eksampel bilong ol «stretpela man» bilong Buk Baibel.

Long **Olpela Testamen**, namba wan stretpela man yumi painim em i Noa. Buk Baibel i tok: *Noa em i gutpela man, na wokabaut bilong em i stret long ai bilong God. Em i pren tru bilong God* (Stat 6:9-10). Na wankain toktok Buk Baibel i

save mekim long Abraham, Moses, Jop, Devit na planti arapela man.

Long **Nupela Testamen** tu Buk Baibel i tok olsem i gat planti man i stretpela tru long ai bilong God:

- **Josep:** *Man bilong Maria, Josep, em i stretpela man* (Matyu 1:19).

- **Simeon:** *Long dispela taim i gat wanpela man i stap long Jerusalem, nem bilong em Simeon. Em i man bilong mekim stretpela pasin na em i man bilong lotu long God* (Luk 2:25).

- **Jon bilong Baptais:** *Herot i pret long Jon. Em i save, Jon em i gutpela na stretpela man long ai bilong God* (Mak 6:20).

- **Josep bilong Arimatea:** *Wanpela man i stap, nem bilong em Josep. Em i man bilong wanpela taun bilong ol Juda, ol i kolim Arimatea. Em i gutpela stretpela man* (Luk 23:50-51).

- **Kornilius:** *Pita i tok olsem: «Kornilius, em i kepten bilong 100 soldia, em i salim mipela i kam. Em i stretpela man na em i save pret long God. Olgeta lain Juda ol i save tok, em i gutpela man»* (Wok Aposel 10:22).

*Wanem mining bilong dispela tok «stretpela»
long Buk Baibel?*

Sapos yumi skelim pasin bilong ol dispela man Buk Baibel i kolim ol «stretpela man», yumi bai painimaut olsem ol dispela lain i save bihainim gut ol dispela gutpela pasin:

- Ol stretpela man i pren bilong God.
- Ol stretpela man i save pulap long daunpasin.
- Ol stretpela man i save bihainim laik bilong God oltaim.
- Ol stretpela man i save lotu long God.
- Ol stretpela man i save bihainim gut ol 10-pela mandato bilong God.
- Ol stretpela man i save mekim gut long ol arapela manmeri.

Olsem na yumi i kolim Maria «Mama, yu stretpela tru» long wanem stretpela pasin bilong Maria i winim tru stretpela pasin bilong ol dispela man na meri Buk Baibel i toktok long ol!

Maria i winim ol long pasin bilong i stap pren bilong God, long wanem em i pulap long grasia, na grasia tasol i save mekim yumi i kamap pren bilong God. Sapos yumi no gat grasia long sol bilong yumi, orait yumi no pren bilong God. Tasol sapos yumi gat grasia, orait yumi ken kolim yumi yet pren bilong God. Na grasia bilong Maria i winim tru grasia bilong ol arapela manmeri, long wanem em i pulap long grasia! Ensel Gebriel yet i tokim Maria olsem: «*Ave Maria! yu pulap long grasia!*» (Luk 1:28).

Maria i winim ol long daunpasin, long wanem maski em i Mama bilong God na em i karim Sevia bilong yumi, oltaim em i bin daunim em yet long ai bilong God na long ai bilong ol manmeri. Em yet i tok: «*Bikpela i lukim daunpasin bilong mi, na em i marimari long mi*» (Luk 1:48).

Maria i winim ol long pasin bilong bihainim laik bilong God oltaim. Em yet i bekim Ensel Gebriel olsem: «*Harim. Mi wokmeri bilong Bikpela. Em i ken mekim long mi olsem yu tok*» (Luk 1:38).

Maria i winim ol long pasin bilong lotu long God, long wanem God em i nambawan samting long lewa bilong Maria, na oltaim em i bin lotu long em.

Maria i winim ol long pasin bilong bihainim ol 10-pela mandato bilong God, long wanem yumi save olsem em i no bin mekim wangepela sin long laip bilong em, olsem na em i klin olgeta.

Maria i winim ol long pasin bilong mekim gut long ol arapela manmeri, na Buk Baibel i stori long yumi long mirakel Jisas i bin mekim long marit long taun Kana, taim santu Maria yet i bin askim Jisas long helpim dispela man i marit.

Long dispela as tasol yumi amamas long kolim Maria «stretpela tru», long wanem em i pulap long grasia bilong God na em i pulap long olgeta gutpela pasin. I no gat wangepela ensel o santu i ken winim Maria long stretpela pasin bilong em. Nogat tru. God yet i mekim na Maria em i stretpela tru!

As bilong gutpela na stretpela tingting

(Seat of wisdom)

Nau yumi kolim Maria em i «As bilong gutpela na stretpela tingting». Dispela litani i gat bikpela mining tru, long wanem mining bilong em i kam long Buk Baibel yet. Long Tok Inglis yumi kolim Maria «*seat of wisdom*», tasol Long Tok Pisin yumi no gat dispela tok «*wisdom*», olsem na yumi kolim Maria em i «As bilong gutpela na stretpela tingting» o «as bilong gutpela save». Na sapos yumi laik kisim save long as bilong dispela litani, orait em i gutpela long yumi skelim Buk Baibel, long wanem dispela nem o litani bilong santu Maria i kam long Buk Baibel yet.

Buk Baibel i toktok long stretpela tingting

Planti taim Buk Baibel i toktok long «*wisdom*» o «gutpela na stretpela tingting» o «save bilong God». Tasol sampela taim dispela tok i gat wanpela mining, na narapela taim mining bilong em i narakain. Olsem na yumi mas skelim ol mining bilong dispela tok «*wisdom*», na yumi mas tok olsem long Buk Baibel dispela tok «*wisdom*» o «gutpela save» i gat 3-pela mining bilong em.

1) «Gutpela save» em i Jisas yet

Long Nupela Testamen Buk Baibel i save tok olsem Jisas em i «*Tok bilong God*» na «*save bilong God*». Santu Jon i tok: ***Tok em i bin kamap man, na em i kam i stap namel long mipela... Papa i salim em i kam*** (Jon 1:14). Na santu Pol i tok: *Krais em i strong bilong God, na em i save bilong God* (1 Korin 1:24).

Buk Baibel i kolim Jisas em i «*save bilong God*», long wanem Jisas em i God tru, olsem na em yet em i as bilong tok i tru. Jisas yet i tok: «***Mi as bilong tok tru***» (Jon 14:6).

2) «Gutpela save» em i presen bilong Holi Spirit

Taim ol Aposel i laik makim 7-pela man bilong kamap diken, ol Aposel i tok: «...*yupela i mas painim 7-pela man namel long yupela (...) na Holi Spirit i pulap long ol, na ol i gat gutpela*

save» (Wok Aposel 6:3). Na wankain samting Buk Baibel i tok long santu Stiven taim ol Juda i wok long kilim em i dai: **Holi Spirit i givim gutpela save tru long Stiven, olsem na ol dispela man i no inap winim tok bilong em** (Wok Aposel 6:10).

Na i gat planti hap tok moa long Nupela Testamen i soim klia olsem gutpela save em i wanpela presen i kam long Holi Spirit, tasol nau yumi no laik pulim toktok tumas. Dispela save i skulim yumi long ol samting bilong God.

3) «Gutpela save» em i stretpela tingting bilong ol gutpela manmeri

Long Olpela Testamen yumi gat eksampel bilong King Solomon, em i man bilong gutpela na stretpela tingting. Buk Baibel i litimapim nem bilong em na i tok: **God i givim planti gutpela tingting na save long Solomon. Em i gat planti save tumas olsem wesan long nambis na man i no inap kaunim. Gutpela tingting na save bilong em i winim save bilong ol saveman bilong hap sankamap na bilong ol saveman bilong Isip. Save bilong Solomon i winim save bilong olgeta saveman bilong graun** (1 King 4:29-31).

Dispela save Buk Baibel i tok long em i no wankain dispela save i kam long Holi Spirit. Nogat. Save bilong Salomon em i save bilong ol samting bilong graun, na save bilong Holi Spirit em i save bilong ol samting bilong God na heven.

Santu Maria em i «as bilong gutpela save»

Orait, olsem wanem na yumi kolim Maria em i «As bilong gutpela na stretpela tingting» o «as bilong gutpela save»? Yumi givim dispela nem long santu Maria, long wanem em i bin inapim tru dispela 3-pela mining i stap long Buk Baibel yet!

1) Maria em i mama bilong Jisas, na Jisas em i «save bilong God», olsem Buk Baibel i tok. Maria i karim Jisas, na Jisas i kolim em yet *«as bilong tok tru»*. Olsem na taim Maria i karim Jisas, em i karim *«save bilong God»* na *«tok tru»* i kam long graun!

2) Maria i pulap long ol presen bilong Holi Spirit, olsem na em i pulap tru long gutpela save! Dispela gutpela save i kam long Holi Spirit i save skulim yumi long ol samting bilong heven, na i no gat wangepela man o meri i ken winim Maria long save bilong God na long ol samting bilong antap! Nogat tru! Save bilong Maria i winim tru save bilong ol ensel na ol santu!

3) Maria i bin pulap long stretpela tingting bilong ol samting bilong graun tu, long wanem God yet i no laik long Maria i sot long wangepela samting. Nogat. God yet i mekim na em i pulapim Maria long olgeta grasia, na blesing na save! Olsem na save bilong Maria i winim tru save bilong Solomon na save bilong ol saveman bilong dispela graun.

Olsem na taim tingting bilong yumi i paul, orait yumi mas kolim nem bilong Maria! Maria inap long kliarim tingting bilong yumi na em i inap long helpim yumi oltaim. Planti taim tingting bilong yumi i no klia tumas long wanem samting yumi sapos long mekim, olsem na yumi bel hevi na tingting planti. Tasol Maria i pulap long save bilong God, olsem na em i inap long bekim olgeta askim bilong yumi! Yumi no ken pret long singaut long em, na askim em long givim gutpela save long yumi.

As bilong amamas bilong yumi

(Cause of our joy)

Long dispela litani yumi kolim Maria em i «As bilong amamas bilong yumi». Na em i gutpela long yumi givim dispela nem long em, long wanem Maria i karim Jisas, na Jisas em i as na papa bilong olgeta amamas bilong yumi.

Pastaim yumi mas tok klia olsem i gat 2-pela kain amamas, na tupela i narakain olgeta:

1) Amamas bilong graun: em i amamas bilong ol manmeri i save tingting long ol samting bilong graun tasol, olsem na ol i save amamas long pasin bilong dring, spak, danis, pasin pamuk, na ol i tingting long givim amamas long bodi bilong ol yet. **Orait, Maria em i no as bilong dispela kain amamas.** Nogat tru. Amamas bilong graun i kam long Satan na i kam long laik nogut bilong bodi bilong yumi tasol.

2) Amamas bilong spirit: em i amamas bilong ol manmeri i save tingting long ol samting Jisas i bin mekim bilong kisim bek ol, olsem na ol i save amamas long i stap wantaim em, na ol i wok hat bilong bihainim ol gutpela pasin. **Orait, Maria em i trupela as bilong dispela kain amamas!** Long wanem amamas bilong spirit i kam long Jisas tasol, na Maria em i mama bilong Jisas, olsem na Maria em i as bilong amamas bilong yumi!

Yumi ol Katolik i mas amamas oltaim. Santu Filip Neri i tok: «Sapos wanpela Katolik man o meri i save pes drai oltaim na em i no gat amamas long sol bilong em, orait em i no trupela Katolik». Na narapela santu tu i tok: «Ol manmeri i no save amamas, na ol i save komplein nabaut, na ol i kros na pes drai oltaim, orait ol dispela manmeri bai i no inap long kamap santu». Na em i tru, long wanem sapos yumi bilip long Jisas, orait sol bilong yumi i mas kalap long amamas!

Jisas em i as bilong amamas bilong yumi

Long Nupela Testamen Buk Baibel i tok olsem Jisas em i as bilong amamas bilong yumi. Planti taim dispela tok «amamas» i kamap long Nupela Testamen, na oltaim em i klia olsem dispela amamas i kam long Jisas tasol. Yumi skelim sampela eksampel tasol:

- **Jisas i givim amamas long ol saveman bilong hap sankamap.** Taim ol saveman i lukim sta i kisim ol i go long Jisas, Buk Baibel i tok: *Taim ol i lukim sta, bel bilong ol i amamas moa moa yet* (Matyu 2:10).

- **Jisas i givim amamas long Jon bilong Baptais.** Taim Maria i go visitim kandere bilong em Elisabet, orait Buk Baibel i tok: *Elisabet i tok: «Harim. Taim yau bilong mi i harim gude bilong yu, orait pikinini i stap long bel bilong mi **em i amamas** na i kalap»* (Luk 1:44).

- **Jisas i givim bikpela amamas long Maria.** Maria i pilim bikpela amamas long God i bin makim em bilong kamap mama bilong Jisas, olsem na em i tok: *«...spirit bilong mi **em i amamas** long God...»* (Luk 1:47).

- **Jisas i givim amamas long ol wasman bilong sipsip.** Taim Maria i karim Jisas long groto bilong Betlehem, orait ensel i tokim ol wasman bilong sipsip long ol i mas amamas long Jisas: *Ensel i tokim ol olsem: «Yupela i no ken pret. Harim. Mi bringim gutnius i kam long yupela, **em nius bilong mekim olgeta manmeri i amamas tru»*** (Luk 2:10).

- **Jisas i givim amamas long ol disaipel.** Taim Jisas i kirap long indai, ol disaipel i lukim em na ol i amamas tru! Buk Baibel i tok: *Ol disaipel i toktok yet i stap, na Jisas yet i sanap namel long ol... **Ol i amamas tru**, tasol ol i no bilip yet* (Luk 24:36.41).

- **Jisas i givim amamas long yumi.** Jisas i save pulapim ol manmeri i save laikim em wantaim bikpela amamas tru! Na amamas Jisas i save givim long yumi i winim tru olgeta amamas bilong dispela graun! Buk Baibel i tok: *Yupela i no bin lukim em [Jisas] yet, tasol yupela i save laikim em na givim bel bilong yupela long em. Nau yupela i no save lukim em, tasol **yupela i bilip long em na amamas tru. Dispela amamas i winim olgeta amamas bilong dispela graun, na yumi no inap autim long maus.*** Nogat tru (1 Pita 1:8).

Yumi mas amamas long kolim santu Maria em i «As bilong amamas bilong yumi»! Yumi givim dispela nem long em, long wanem Maria i karim Jisas, na Jisas tasol em i as bilong olgeta amamas! Oltaim yumi mas tenkim Maria na litimapim nem bilong em, long wanem yumi i save amamas long Jisas i kisim bek yumi, na Maria i bin karim Jisas long bel bilong em! Salvesen i kam long graun long Jisas, na Jisas i kam long graun long bel bilong Maria!

Spiritual meri

(Spiritual vessel)

Long Tok Inglis yumi save kolim Maria em i «*spiritual vessel*». Em i hat liklik long tanim dispela litani long Tok Pisin, long wanem dispela tok «*vessel*» i no i stap long tok ples bilong yumi. Na long ol litani bilong santu Maria 3-pela taim yumi kolim Maria em i wanpela «*vessel*».

Long Buk Baibel long Tok Pisin sampela taim ol i save tanim dispela tok «*vessel*» na raitim «sospen graun», tasol dispela i no stret tumas. Olsem na pastaim long yumi go insait long dispela litani, yumi mas save olsem long Buk Baibel dispela tok «*vessel*» i gat 2-pela mining bilong em: **1)** Sampela taim Buk Baibel i yusim «*vessel*» bilong makim ol sospen graun o ol konteina samting. **2)** Sampela taim Buk Baibel i yusim «*vessel*» bilong makim ol samting i kam long han bilong God, long wanem

God yet i bin mekim yumi, olsem man bilong wokim sospen graun, em i kisim graun malumalum na em i tanim tanim nabaut long han bilong em, na em i wokim ol kain kain plet na sospen samting. **Olsem na long dispela namba 2 mining bilong dispela tok «vessel» yumi min ol samting i kam long han bilong God**, na Maria em i wanpela meri i kam long han bilong God.

Orait, olsem wanem na yumi kolim Maria em i «*spiritual vessel*» o «spiritual meri»? Yumi givim dispela nem long Maria long 3-pela as:

1) Maria em i spiritual meri long wanem em i pulap long Holi Spirit

Dispela em i nambawan as bilong dispela litani: Maria i bin pulap tru long Holi Spirit. Buk Baibel yet i tok olsem Maria i kisim bel long Holi Spirit tasol, na Holi Spirit i bin kam antap long em. Santu Luk i tok: *Na ensel i bekim tok bilong em [Maria] olsem: «Holi Spirit bai i kam long yu, na strong bilong God Antap Tru bai i karamapim yu»* (Luk 1:35).

Holi Spirit i save i stap long ol manmeri i gat grasia bilong God long sol bilong ol. Sapos yumi gat grasia bilong God long sol bilong yumi, orait God Holi Spirit i stap long sol bilong yumi. Tasol grasia bilong Maria i winim tru grasia bilong olgeta manmeri, long wanem God yet i bin givim olgeta grasia long

em. Ensel Gebriel yet i kolim Maria «*Yu pulap long grasia*» (Luk 1:28). Olsem na Holi Spirit i pulap long Maria moa yet long ol arapela man o meri bilong dispela graun.

2) Maria em i spiritual meri long wanem em i no gat sin bilong Adam na Iv

Yumi no ken lustingting tu olsem santu Maria em i Klin Olgeta na em i no gat sin bilong Adam na Iv, olsem na long taim em i stap yet long bel bilong mama bilong em inap long indai bilong em, em i bin pulap tru long grasia bilong God na long Holi Spirit, long wanem i no gat wangepela samting i rong long laip bilong em.

Dispela bikpela misteri bilong Maria Immakulata i no gat sin bilong Adam na Iv em i bikpela samting tumas, long wanem em i soim yumi olsem God yet i bin banisim Maria long olgeta samting nogut, na God yet i bin pulapim em long olgeta gutpela samting.

3) Maria em i spiritual meri long wanem em i bihainim klinpela pasin

Planti taim bodi bilong yumi i laik pulim yumi long mekim kain kain sin i no stret long ai bilong God, long wanem ol laik nogut bilong bodi i save kirap nating insait long bel blong yumi. Na ol manmeri i save bihainin ol laik nogut bilong bodi, ol i save

mekim planti sin. Tasol ol manmeri i save winim ol laik nogut bilong bodi na i save bihainim ol lo bilong God, ol dispela manmeri i save bihainim spirit bilong God, olsem na ol i no gat sin i doti long sol bilong ol, olsem na yumi kolim ol «spiritual» manmeri. Orait Maria i no bin mekim wanpela sin i doti long laip bilong em. Yumi tok pinis olsem santu Maria em i Virgo oltaim na sol bilong em i klin olgeta! I no gat wanpela samting i doti long sol bilong em. Nogat tru! Em i klin olgeta na em i winim tru ol ensel na ol santu! Olsem na i no gat wanpela taim Maria i bin bihainim ol amamas nogut bilong dispela graun. Nogat olgeta! Olsem na Maria em i spiritual tru na bodi bilong em tu i klin olgeta!

Yumi ol Katolik manmeri i mas singaut oltaim long Maria i helpim yumi long kamap spiritual manmeri. Yumi mas wok hat bai grasia bilong God i ken gro na i kamap bikpela moa insait long sol bilong yumi! Na sapos sol bilong yumi i klin na grasia i wok long kamap bikpela moa, orait God Holi Spirit bai i amamas tru long i stap long sol bilong yumi, na yumi tu bai inap kamap spiritual manmeri!

Maria, mipela i mas onarim yu

(Vessel of honour)

Nau long dispela litani yumi tok «Maria, mipela i mas onarim yu», na em i tru, long wanem olgeta manmeri i mas givim bikpela ona long Maria. Long Tok Inglis yumi tok «*vessel of honour*», na long sapta antap yumi tok pinis olsem dispela tok «*vessel*» i min «olgeta samting i kam long han bilong God», long wanem God i bin mekim yumi wankain olsem man bilong wokim sospen graun i kisim graun na i wokim ol plet na sospen samting.

Olsem wanem na yumi mas givim ona long santu Maria? **Yumi mas givim ona long Maria long wanem God Triwan yet i bin pulapim santu Maria long ona!** God Papa, God Pikinini na God Holi Spirit yet i bin mekim narakain samting long santu Maria, olsem na yumi amamas long God na yumi amamas long

Maria tu! God yet i bin tokim Maria «***Yu pulap long grasia!***» (Luk 1:28). God yet i bin tokim Maria: «***Lord i stap wantaim yu!***» (Luk 1:28). God yet i bin tokim Maria: «***God i bin mekim gut tru long yu na givim yu blesing i winim blesing em i givim long ol arapela meri***» (Luk 1:42). Na yumi no ken paul, long wanem taim yumi givim ona long santu Maria, orait olgeta ona i go long God tasol, long wanem God i bin mekim santu Maria i kamap mama bilong Jisas.

Nau yumi lukim hariap wanem samting God Triwan i bin mekim long Maria.

1) God Papa na santu Maria

Long bipo bipo tru, taim heven na graun i no bin kamap yet, orait God i bin makim Maria pinis bilong kamap mama bilong Jisas. Long Buk Baibel i gat planti hap tok i soim olsem God i save pinis long yumi long taim yumi i no bin kamap yet long bel bilong mama. Profet Jeremia i tok olsem: *Bikpela i tokim mi, Jeremaia, olsem: «Taim mi no bin mekim yu i kamap yet long bel bilong mama, mi save long yu»* (1:4-5). Olsem na long eterniti tru God i bin makim santu Maria bilong i stap klin olgeta, long wanem God i save pinis olsem dispela yangpela meri bai i karim Ridima bilong ol manmeri long bel bilong em. God i save pinis olsem Maria bai i kamap mama bilong Jisas, na Jisas em i God tru, olsem na Maria bai i kamap Mama

bilong God yet. Na long dispela as tasol God Papa i bin pulapim santu Maria long olgeta grasia na blesing i winim tru olgeta ensel na santu bilong heven.

2) God Pikinini na santu Maria

Em i isi tru long toktok long ol samting santu Maria i bin mekim long Jisas, em i namba 2 persona bilong God Triwan. Maria i bin karim God Pikinini long bel bilong em inap long 9-pela mun olgeta. Maria i bin karim Jisas long ples Betlehem. Maria i bin givim susu long Jisas. Maria i bin mekim isi long Jisas. Maria i bin givim planti kis long Jisas. Maria i bin wasim Jisas long wara na putim ol laplap samting long em. Maria i bin slipim Jisas long skru bilong em. Maria i bin skulim Jisas long toktok na long wokabaut. Maria i bin lukautim bebi Jisas taim bebi Jisas i sik. Maria i bin givim kaikai long bebi Jisas taim bebi Jisas i krai long hangre. Na sapos yumi go het long kolim ol samting Maria i bin mekim long Jisas, orait dispela buk bai i no inap pinis! Maria em i trupela mama bilong Jisas, na Jisas em i trupela pikinini bilong Maria. Maria i bin lukautim Jisas wankain olsem ol mama i save lukautim ol pikinini bilong ol. Na Jisas i bin harim tok bilong Maria wankain olsem ol gutpela pikinini i save harim tok bilong papamama bilong ol.

3) God Holi Spirit na santu Maria

Long Tok Bilip yumi save tok: «Long strong bilong Holi Spirit, Maria Virgo i kisim bel». Na em i tru, long wanem Buk Baibel yet i skulim yumi olsem Holi Spirit i mekim Jisas i kamap man. Ensel Gebriel i tokim santu Maria olsem: «**Holi Spirit bai i kam long yu, na strong bilong God Antap Tru bai i karamapim yu**» (Luk 1:35). Na taim santu Maria i tok «yesa», orait wantu tasol God Holi Spirit i bin kam long Maria na i mekim em i kamap mama bilong Jisas. Dispela bikpela misteri bilong God i kamap man, i kam long strong bilong Holi Spirit! Holi Spirit na Maria i bin mekim na God i kamap man na i kam i stap namel long yumi!

Olsem na em i gutpela na i stret long yumi givim ona long santu Maria, long wanem taim yumi givim ona long em, orait yumi givim ona long Papa, long Pikinini na long Holi Spirit. Olsem na olgeta ona yumi save givim long Maria i go long God Triwan tasol. God Triwan i amamas tru long yumi givim ona long Maria, na Maria tu i amamas tru long givim olgeta ona i go long God Triwan!

Na yumi mas save gut long ol dispela samting, long wanem ol manmeri bilong ol arapela lotu i save kisim kranki ol ona yumi givim long santu Maria na long ol santu, olsem na ol i save tok olsem yumi ol Katolik i save adorim Maria na ol

santu. Na dispela toktok bilong ol em i rong olgeta. **Yumi ol Katolik i save adorim God Triwan tasol. Yumi no save adorim santu Maria na ol santu. Nogat.** Yumi save givim ona long ol santu, long wanem ol i stap pinis long heven, olsem na yumi amamas long ol. Tasol taim yumi givim ona long santu Maria na long ol santu, orait olgeta ona i go long God tasol, long wanem God yet i bin mekim na ol dispela manmeri i kamap santu.

Maria, devosen bilong yu i bikpela tru

(Singular vessel of devotion)

Long dispela litani yumi tok olsem devosen bilong santu Maria em i bikpela tru. Olsem na pastaim long yumi go insait long mining bilong dispela litani, em bai i gutpela long yumi save long mining bilong dispela tok «devosen».

Devosen em i wanem samting? Santu Tomas bilong Akwainas i tok: «Devosen em i pasin bilong givim yumi yet olgeta long God wantaim amamas na bel isi. Devosen em i pasin bilong harim na bihainim gut ol tok bilong God».

Olgeta santu i bin i gat devosen long God, long wanem olgeta santu i bin givim ol yet long God na ol i bin bihainim gut ol lo na mandato bilong em. Tasol namel long olgeta santu i gat

wanpela i go pas: santu Maria. Santu Maria i go pas long ol ensel na long ol santu, olsem na devosen bilong em i winim tru devosen bilong ol. Oltaim Maria i bin givim bel bilong em olgeta long God. Oltaim em i bin bihainim tok bilong God. Oltaim em i bin amamas na bel isi na trastim God wantaim olgeta strong bilong em.

Devosen bilong santu Maria long Buk Baibel

Yumi lukim nau sampela eksampel i kam long Buk Baibel yet i stori long yumi long bikipela devosen bilong santu Maria.

- **Taim Ensel Gabriel i bringim tok long Maria**, orait wantu tasol Maria i tok «Yesa» long God. Maria i no tubel. Em i no pret. Em i no givim eskus. Nogat tru! Wantu tasol Maria i redi long harim tok bilong God na bihainim.

- **Taim Maria i harim olsem kandere bilong em Elisabet i gat bel**, orait wantu tasol em i lusim ples Nasaret na i go helpim Elisabet, long wanem Elisabet em i lapun pinis. Maski Maria tu i gat bel, em i no givim eskus na wantu em i go na halivim kandere bilong em.

- **Taim Maria i harim olsem ol Rom i laik kisim nem bilong ol manmeri**, orait em i no komplein. Olsem na em i mas lusim ples Nasaret na i wokabaut i go long Betlehem. Na ples Betlehem em i longwe tru, tasol wantu Maria i

bihainim dispela lo bilong ol Rom, long wanem em i save olsem olgeta samting i kam long han bilong God.

- **Taim Maria i karim Jisas long groto bilong Betlehem**, em i amamas tru, long wanem em i save pinis olsem dispela liklik groto em i ples God yet i bin makim bilong Maria i karim Jisas. Olsem na maski ples em i kol, em i doti na em i tudak, Maria i amamas tasol long bihainim laik bilong God.

- **Taim Maria i harim olsem King Herot i laik kilim bebi Jisas i dai**, orait wantu em i bihainim tok bilong ensel na em i kisim bebi na i ranawe na i go long Isip. Maria i no komplein long God na em i no kros long Herot, long wanem em i save pinis olsem God i save helpim ol gutpela manmeri oltaim.

- **Taim Holi Famili i kam bek long Nasaret**, orait santu Maria i amamas tasol long ol liklik samting em i gat long haus bilong em. Santu Josep em i wanpela kamda, olsem na em i wanpela man i no gat planti mani, na Holi Famili i bin i stap tarangu. Tasol bikpela devosen bilong Maria i mekim na em i amamas na bel isi oltaim.

- **Taim Jisas i lusim Maria long wanem em i mas kamap ples klia** na mekim wok aposel, orait Maria i wanbel long Jisas. Maski santu Josep i bin dai pinis na Maria bai i stap wanpis long haus, Maria i akseptim olgeta samting wantaim amamas, long wanem em i save olsem dispela samting em i laik bilong God.

- **Taim Jisas i hangamap long diwai kros**, Maria i no bin komplein long God Papa. Nogat tru. Maria i bin karim bikpela pen tumas, long wanem em i lukim pikinini bilong em i dai long diwai kros. Tasol Maria i wanbel long God Papa i bin makim Jisas bilong ofarim dispela sakrifais, long wanem Maria i save pinis olsem Jisas em i Sevia bilong olgeta manmeri.

- **Taim Jisas i kirap bek na i laik go bek long heven**, orait Maria i no pasim Jisas long lusim em gen. Jisas i bin lusim Maria namba wan taim long diwai kros, olsem na nau em i namba 2 taim long Jisas i lusim Maria. Tasol Maria i amamas long Jisas i kisim ona na biknem long raithan bilong God Papa.

I gat planti eksampel moa i soim bikpela devosen bilong santu Maria, tasol yumi no laik pulim toktok nau.

Olsem na yumi ol Katolik i mas askim santu Maria long helpim yumi long bihainim ol gutpela eksampel bilong em. Yumi tu i mas bilip long God olsem Maria i bin bilipim. Yumi tu i mas trastim God olsem Maria i bin trastim. Yumi tu i mas laikim God olsem Maria i bin laikim. Yumi tu i mas bihainim ol tok na lo bilong God olsem Maria bin bihainim. Olsem na oltaim yumi mas askim Maria long mekim devosen bilong yumi i kamap bikpela moa moa yet!

Rosa mistika

(Mystical rose)

Long dispela litani yumi kolim Maria em i «Rosa mistika». Long Tok Pisin yumi tu i save yusim dispela nem «Rosa mistika» long planti singsing na prea. Tasol sampela manmeri i no save gut olsem wanem na yumi kolim Maria em i «Rosa mistika», olsem na nau yumi bai i skelim mining bilong dispela nem, long wanem mining bilong dispela nem em i nais tumas na i save givim amamas long ol manmeri i save laikim santu Maria.

Olsem wanem na yumi kolim Maria em i «Rosa»?

Dispela tok «rosa» i kam long Tok Latin, na i min «rous». Rous em i wanpela naispela plaua i save kamap long planti hap bilong graun, na ol manmeri i save laikim em tumas, long wanem kala

na smel bilong em i naispela tru. Ol rous i save bilasim gut ol gaden, na em i naispela tru long lukim.

Orait, tasol olsem wanem na yumi save tok Maria em i «Rosa»?

- **Rous em i kwin bilong ol plaua.** Planti manmeri i save tok olsem rous em i «kwin bilong ol plaua», long wanem retpela o pink kala bilong em i winim tru kala bilong ol arapela plaua. Na sampela manmeri i save tok olsem rous em i «bilas bilong ol gaden», long wanem smel bilong em i winim tu smel bilong ol arapela plaua tu. Olsem na dispela plaua em i piksa bilong santu Maria, long wanem wankain olsem ol rous i save winim ol arapela plaua bilong graun, olsem tasol santu Maria i save winim ol arapela santu na ensel bilong heven. Biuti bilong ol rous i winim biuti bilong ol plaua, olsem tasol biuti bilong Maria i winim biuti bilong ol arapela santu na ensel tu.

- **Rous em i mak bilong san bai i kamap.** Narapela as bilong dispela nem em i olsem: long taim bilong kol dispela plaua i no save kamap. Nogat tru. Ol rous i save kamap long spring tasol, taim bikpela san bilong samer i kam klostu pinis. Olsem na ol rous i kamap olsem mak bilong bikpela san bai i kamap bihain. Orait Maria em i olsem wanpela rous i soim yumi olsem Jisas, em i trupela san bilong yumi, bai i kamap long graun. Buk Baibel yet i save tok olsem Jisas em i olsem san i save givim lait: «*[Jisas] Em i wanpela lait, na em bai i givim lait long ol man*

bilang ol arapela lain» (Luk 2:32). Na Jisas yet i tok: «*Mi yet mi lait bilang graun»* (Jon 8:12). Olsem na Maria i soim Jisas long yumi wankain olsem ol rous i save soim bikpela san.

- **Rous i save kamap namel long gras nogut.** Maski planti taim graun i no gutpela tumas na i pulap long gras nogut, ol rous i save kamap tu. Dispela em i piksa bilong santu Maria, em i Klin Olgeta na i pulap long grasia, tasol em i stap long graun namel long ol manmeri bilong sin. Maria em i naispela tumas olsem wanpela rous, tasol em i stap namel long ol manmeri bilong sin.

- **Rous i pulap long planti nil.** Rous em i nambawan plaua bilong graun, tasol stik bilong em i pulap long planti nil. Wankain samting i bin kamap long santu Maria: Maria em i nambawan santu bilong heaven, tasol laip bilong em i pulap long planti samting i bin givim pen long em. Yumi no ken lustingting olsem santu Maria i bin karim Jisas long wanpela groto, em i putim bebi long bokis kaikai bilong bulmakaus, em i mas ranawe na go long Isip, em i stap tarangu long ples Nasaret, na bihain ol i bin kilim pikinini bilong em i dai. Olsem na laip bilong Maria i no isi. Nogat tru. Laip bilong em i pulap long planti nil.

Olsem wanem na yumi kolim Maria em i «mistika»?

Dispela tok «mistika» i kam long Tok Gris, na i min «misteri» o «tok hait». Long Katolik Sios i gat planti santu

yumi save kolim ol «mistik», long wanem God yet i bin givim planti save long ol long ol misteri bilong God. Planti ol santu i bin kisim bikpela save long han bilong God yet, olsem na ol i gat save bilong ol samting bilong heven na ol samting bilong God Triwan. Ol dispela samting i save i stap hait long yumi ol manmeri nating, tasol God i save givim dispela save long ol mistik.

Olsem na yumi kolim Maria em i «mistika» long wanem em i pulap long save bilong ol misteri bilong God Triwan. Yumi no ken lustingting olsem God yet i bin makim Maria bilong kamap mama bilong Jisas, olsem na God yet i bin pulapim Maria long olgeta save bilong ol samting bilong God na bilong heven. Na save bilong Maria i winim tru save bilong ol santu, ol ensel na ol saveman! I no gat wanpela man o meri i bin i stap klostu long God olsem santu Maria. Nogat tru. Olsem na i no gat wanpela man o meri i gat save bilong God olsem santu Maria. Nogat. Santu Maria i bin karim God yet insait long bel bilong em 9-pela mun olgeta! Santu Maria tasol i bin karim God, na givim susu long em. Santu Maria tasol i bin karamapim Jisas long laplap. Na taim Jisas i wok long gro, santu Maria tasol i bin lainim em long toktok, long wokabaut na long harim tok bilong papamama. Olsem na i no gat wanpela man o meri i ken save long God olsem santu Maria!

Olsem na yumi ol Katolik i amamas long singsing long santu Maria, na yumi amamas long kolim em «Rosa mistika». Nau yumi save pinis long mining bilong dispela litani. Yumi kolim em «rosa» long wanem ol rous em i kwin bilong ol plaua na i winim tru ol arapela plaua bilong graun, wankain olsem santu Maria em i Kwin bilong ol santu na i winim ol santu na ensel bilong heven. Na yumi kolim em «mistika» long wanem em i pulap long save bilong ol misteri bilong God Triwan na em i pulap long save bilong ol samting bilong heven.

Taua bilong Devit

(Tower of David)

Nau yumi kolim santu Maria em i «Taua bilong Devit». Planti manmeri bai i kirap nogut tru long harim dispela litani, long wanem dispela litani tu i no i stap long lista bilong ol litani yumi save beten long Tok Pisin. Tasol maski dispela litani i no i stap long Tok Pisin, dispela em i wanpela bilong ol trupela litani bilong santu Maria i kam long bipo bipo tru. **Na dispela litani bilong santu Maria i kam long Buk Baibel yet**, olsem na long dispela as tasol yumi tok olsem em i gat bikpela mining bilong em!

Taua bilong Devit long Buk Baibel

Long Buk Baibel i gat wanpela buk em i nais tumas, na em i buk bilong Song bilong Solomon. Dispela buk i stori bilong wanpela

yangpela man i save laikim tumas meri bilong em. Dispela buk i pulap long ol naispela toktok na song bilong man i go long meri bilong em, na tu i gat planti naispela toktok na song bilong meri i go long man bilong em. Ol santu na saveman bilong Sios i tok olsem dispela man em i piksa bilong God, na dispela meri em i piksa bilong yumi olgeta. Olsem na dispela buk i toktok long bikpela laik bilong God i kam long yumi. **Orait, long sapta 4 dispela man i tokim meri bilong em olsem: «*Nek bilong yu i naispela tru, olsem gutpela taua bilong King Devit*»** (Song bilong Solomon 4:4). Wanem mining bilong dispela tok?

Dispela taua Buk Baibel i toktok long em, em i wanpela bikpela taua King Devit yet i bin mekim, long wanem em i laik banisim taun bilong em, Jerusalem. King Devit i pret long ol birua i kam na bagarapim taun bilong em na kisim ples bilong em olsem king. Olsem na King Devit i mekim dispela taua, bai ol soldia i ken was oltaim na lukautim gut taun Jerusalem. Na dispela taua i pulap long planti soldia na long planti bainat na ol samting bilong pait. Ol soldia i stap antap long taua ol i redi long pait oltaim, na ol i save was long san na long nait.

Taua bilong Devit em i piksa bilong santu Maria

Orait, olsem wanem na yumi kolim Maria em i «Tua bilong Devit»? Yumi givim dispela nem long Maria, long wanem ol santu

bilong bipo i tok olsem dispela taua em i wanpela piksa bilong santu Maria. Na nau yumi lukim liklik long as bilong dispela samting:

- **Taua bilong Devit i stap antap tru.** King Devit i bin mekim taua bilong em antap long wanpela maunten, bai ol soldia i ken lukim gut ol samting. Orait, Maria i stap tru antap long heven, na i no gat wanpela santu o ensel i stap antap moa long em. Nogat tru. Maria em i olsem dispela taua i stap antap tru na em i inap long lukim olgeta samting.

- **Taua bilong Devit i save daunim ol birua.** Taim ami bilong ol birua bilong Israel i laik kam insait long taun Jerusalem, orait ol i no inap, long wanem taua bilong Devit i pulap long planti soldia, olsem na ol soldia i stap antap long taua i save lukim ol birua i kam taim ol birua i stap longwe yet. Orait, Maria tu i save daunim na bagarapim ol birua bilong sol bilong yumi. Maria i save bagarapim Satan na ol samting nogut i laik pulim yumi long mekim sin. Yumi mas askim em long helpim yumi, na wantu em bai i helpim yumi!

- **Taua bilong Devit em i naispela tru.** Ol buk bilong bipo i tok olsem dispela taua em i naispela tru, na ol Juda i save tok: «Taua bilong Devit em i bilas bilong Jerusalem». Ol Juda i amamas long lukim taua bilong ol, long wanem King Devit i bin bilasim em gut. Orait, God i bin bilasim Maria tu wantaim olgeta grasia na blesing, na em i naispela moa yet long olgeta samting! Maria em i bilas bilong heven, na i no gat wanpela

ensel o santu i ken winim Maria long biuti bilong sol na bodi bilong em. Nogat tru. Maria i go pas oltaim!

- **Taua bilong Devit em i strong tumas.** King Devit i bin mekim dispela taua wantaim aion, ston na simen. Taua bilong Devit em i strong tumas, olsem na ol birua i no inap long mekim wanpela samting bilong brukim em. Nogat tru. Orait, Maria tu i strong tumas, na strong bilong em i winim strong bilong ol santu na ol ensel. God yet i bin mekim na Maria i pulap long strong, olsem na em i inap long helpim yumi long olgeta wari na hevi bilong yumi! Long ol sapta bilong dispela buk yumi bin toktok pinis long strong bilong Maria, olsem na nau yumi no laik pulim tok gen.

Yumi ol Katolik i mas amamas oltaim long kolim santu Maria em i «Taua bilong Devit»! Maria i stap antap tru long heven, wankain olsem Taua bilong Devit i bin i stap antap tru long maunten! Maria i save bagarapim ol birua bilong yumi, wankain olsem Taua bilong Devit i bin helpim ol Juda long bagarapim ol birua bilong Israel! Maria em i nais tumas, wankain olsem Taua bilong Devit i bin pulap long planti bilas na planti naispela samting! Maria em i strong tumas, wankain olsem Taua bilong Devit i strong na ol birua i no inap brukim em!

Olsem na oltaim yumi mas singaut long Maria, long wanem em i strong olsem dispela Taua bilong Devit! Maria i redi oltaim long helpim yumi olsem wanpela ami i redi long pait!

Taua i waitpela olgeta

(Tower of ivory)

Nau yumi kolim Maria em i «Taua i waitpela olgeta». Long Tok Inglis dispela litani em i «*tower of ivory*», Na «*ivory*» em ol tit bilong elefan. Long Tok Pisin em bai i fani liklik sapos yumi kolim Maria em i olsem wanpela taua bilong tit bilong elefan, olsem na mobeta yumi tok Maria em i «Taua i waitpela olgeta». Dispela litani tu i kam long bipo tru, olsem na ol santu bilong bipo na olgeta manmeri bilong graun i givim dispela nem long Maria.

Tasol bilong kisim as na mining bilong dispela litani, yumi mas toktok liklik pastaim long tit bilong ol elephant («*ivory*»), long wanem dispela litani i tok olsem Maria em i olsem wanpela taua ol i bin wokim long tit bilong elefan.

Yumi mas save olsem ol elefan i gat tupela traipela tit i winim ol kom bilong dia. Long ai bilong yumi ol dispela tit i luk olsem

kom, tasol ol i no kom, ol i tit tasol. Ol dispela tit i longpela olsem wanpela mita samting, na ol i strong nogut tru! Na kala bilong ol i wait olgeta olsem ren ais.

Planti manmeri i save kamautim tit bilong ol elefan bilong wokim na kavim ol samting, kain olsem ol spia na ol bainat. Na tu planti manmeri i save yusim dispela tit bilong kavim ol samting bilong bilasim haus na bilong bilasim bodi tu. Tasol ol dispela tit i dia tumas na i save kostim planti mani, olsem na ol king na ol maniman tasol inap long baim ol.

Orait, olsem wanem na yumi kolim Maria em i olsem wanpela taua ol i bin wokim long tit bilong elefan?

- **Tit bilong elefan em i wait olgeta olsem ren ais.** Kala bilong tit bilong elefan em i wait olgeta, olsem na em i naispela tru long lukim, na long dispela as tasol planti manmeri i save mangal long ol dispela tit. **Orait sol bilong Maria tu em i wait olgeta,** long wanem i no gat wanpela samting i doti long sol bilong em. Long taim Maria i kamap long bel bilong mama bilong em inap long taim em i go bek long heaven, em i no bin mekim wanpela liklik sin, olsem na sol bilong em i klin olgeta. Long dispela as tasol yumi kolim Maria em i Klin Olgeta, na yumi selebretim dispela Pestode long de 8 bilong mun Disemba.

- **Tit bilong elefan em i naispela tru long lukim.** Ol manmeri i save mangalim dispela tit, long wanem ol i naispela tru. Kala

bilong ol i wait olgeta na i no gat wanpela samting i doti long ol, olsem na ol i nais tru long lukim. **Orait Maria tu em i naispela tru**, na i no gat narapela samting i bin kamap long han bilong God i nais olsem Maria. Nogat tru. Biuti bilong Maria i winim tru biuti olgeta samting bilong heven na bilong graun.

- **Tit bilong elefan em i dia tumas.** Ol tit bilong elefan i save kostim planti mani tru, long wanem i no gat planti elefan long graun, na tu long wanem i no isi long painim ol elefan na kamautim ol tit bilong ol. Olsem na long dispela as ol maniman tasol inap long baim ol dispela tit. **Orait Maria tu i dia tumas long ai bilong God na long ai bilong yumi.** I no gat wanpela ensel o santu i winim Maria long ai bilong God. Nogat tru. Maria i go pas! Olsem na long ai bilong God na long ai bilong yumi Maria i dia tumas!

- **Tit bilong elefan em i bilas bilong ol king.** Olsem yumi tok pinis, ol tit bilong elefan i dia tumas na i save kostim planti mani, olsem na bipo ol king tasol inap long baim ol. Ol manmeri nating i no inap long baim ol dispela tit, long wanem prais bilong ol i save go antap tru! **Orait Maria tu em i samting God i bin mekim bilasim heven.** Maria em i mama bilong Jisas, na Jisas em i King bilong heven na graun. Olsem na Maria i kamap olsem bilas bilong God, na God yet i bin makim Maria bilong kamap bilas bilong heven, long wanem Maria i mekim heven i kamap naispela moa yet!

- **Tit bilong elefan i strong tumas.** I no isi long kamautim ol tit bilong elefan, long wanem ol i strong tumas! Na ol spia o bainat samting ol man i save wokim long dispela tit, ol i no inap bruk! Nogat tru! Ol i strong nogut tru, na ol i no save bruk o bagarap!

Orait Maria tu i strong tumas olsem ami i redi long pait. Nogat wanpela samting nogut i ken daunim Maria. Nogat tru. Long strong bilong God Maria i winim ol samting nogut, na em i strong inap long em i krungutim pinis het bilong Satan!

- **Tit bilong elefan i sap olsem bainat.** Bipo ol manmeri i save yusim ol tit bilong elefan bilong wokim ol spia na bainat, long wanem ol tit i sap nogut tru! Olsem na ol soldia i save yusim ol tit bilong elefan bilong go long woa na sutim ol birua bilong ol.

Orait Maria tu i gat strong bilong bagarapim ol birua bilong yumi. Maria i save pait bilong helpim ol gutpela manmeri i singaut long em, long wanem Maria i no laik long ol birua i daunim yumi. Oltaim Maria i save daunim na bagarapim Satan na ol birua bilong sol bilong yumi!

Olsem na long dispela as tasol yumi kolim Maria em i olsem wanpela taua ol i bin wokim long tit bilong elefan! Maria em i wait olgeta olsem ren ais! Maria em i naispela tru long lukim! Maria em i bilas bilong heven! Maria em i strong tumas! Na Maria i save pait bilong daunim ol birua bilong sol bilong ol Katolik manmeri!

Haus gol

(House of gold)

Long dispela litani yumi kolim Maria em i «Haus gol». Yumi no ken lustingting long wanem samting yumi bin tok long «Tok i go pas», long wanem long Tok Pisin yumi no save yusim sampela litani bilong santu Maria. Ol manmeri i bin tanim ol litani i no bin tanim olgeta litani bilong Maria i kam long bipo tru. Nogat. Ol i bin tanim wan wan litani tasol. Tasol ol trupela litani bilong santu Maria i planti tumas na i winim namba bilong ol litani ol i bin tanim long Tok Pisin!

Orait nau yumi kolim Maria em i «Haus gol». Olsem wanem? Yumi save pinis olsem gol em i samting i dia tumas. Namel long olgeta ston bilong graun, gol i go pas. Ol kantri na ol king na ol maniman i save hat wok tru na tuhat bilong painim gol, long wanem prais bilong gol i winim prais bilong olgeta samting

bilong graun. Gol i winim ol naispela naispela bis bilong solwara, na i winim tru silva na kapa na ol arapela naispela naispela ston i save i stap long graun.

Gol long Buk Baibel

Buk Baibel yet i save yusim gol olsem piksa bilong **ol samting bilong God na ol samting bilong ol king**.

Long Olpela Testamen, yumi painim olsem gol em i samting ol manmeri i save yusim bilong wokim ol samting bilong lotu long God. Na tu gol em i samting ol manmeri i save yusim bilong wokim ol samting bilong bilasim ol king

Na long Nupela Testamen tu gol em i piksa bilong ol samting bilong God. Santu Jon yet i tok olsem heaven i pulap long gol! Long Buk bilong Revelesen em i tok:

- **Jisas i pulap long gol:** «*[Jisas] Em i bin putim longpela klos i karamapim lek bilong em, na em i pasim **let gol** i raunim bros bilong em*» (1:13)... «*Orait mi lukluk gen, na mi lukim wanpela waitpela klaut, na wanpela man i wankain olsem yumi man bilong graun i sindaun i stap long dispela klaut. Em i gat **hat gol** long het bilong em, na long han bilong em em i holim naip i sap tru*» (14:14)...

- **Ol hetman i gat gol:** «*Ol dispela hetman i putim longpela waitpela klos, na ol i gat ol **hat gol** olsem ol hat king i stap long het*

*bilong ol» (4:4)... «Olgeta hetman wan wan i holim wanpela musik olsem gita na wanpela **dis gol**» (5:8)...*

*- Ol ensel i gat gol: «Na narapela ensel i kam sanap klostu long alta. Em i holim **plet gol** bilong holim insens» (8:3)...*

*- Ol samting bilong lotu ol i wokim long gol: «Mi tanim pinis, na mi lukim 7-pela **lam gol** i stap» (1:12)... «Orait namba 6 ensel i winim biugel bilong em, na mi harim maus bilong wanpela man i toktok namel long ol 4-pela kom i stap long ol 4-pela kona bilong **alta gol** i stap long pes bilong God» (9:13)...*

*- Na taun bilong heven em i bilong gol tasol: «Banis bilong taun em God i bin wokim long ston jaspā. Na em i wokim taun yet long **gol tasol**, na taun i lait olsem glas» (21:18)... «Dispela 12-pela dua em 12-pela pel, em ol dispela kain waitpela bis i dia tumas. Ol wan wan dua ol i wokim long wanpela wanpela bikpela pel tasol. Olgeta rot bilong taun ol i wokim long **gol tasol**, na dispela **gol** em i klia tru olsem glas» (21:21).*

Maria em i haus gol

Yumi tok pinis olsem Buk Baibel i save yusim gol olsem piksa bilong ol samting bilong God na ol samting bilong ol king. **Orait Maria em i mama bilong God, na em i mama bilong Jisas, em i King bilong heven na graun!** Olsem na long dispela as tasol yumi kolim Maria em i «Haus gol»!

- **Maria em i haus gol, long wanem bel bilong em i bin kamap haus bilong God yet.** Dispela em i nambawan as bilong dispela litani. God yet i bin i stap 9-pela mun olgeta long bel bilong santu Maria, olsem na bel bilong Maria i kamap olsem haus bilong God. 9-pela mun olgeta God i bin i stap insait long santu Maria!

- **Maria em i haus gol, long wanem bel bilong em i bin kamap haus bilong King Jisas.** Jisas em i King bilong olgeta samting, na Jisas i bin i stap 9-pela mun insait long bel bilong santu Maria! Bel bilong Maria i bin kamap olsem haus king bilong Jisas! Na long dispela as tasol yumi save kolim Maria em i Kwin, long wanem em i karim King Jisas.

Olsem na yumi amamas long kolim Maria em i «haus gol», long wanem gol em i samting bilong God na bilong ol king, na bel bilong Maria i bin i stap haus bilong God na haus bilong King Jisas, long wanem Pikinini bilong God yet i bin i stap 9-pela mun olgeta insait long bel bilong em!

Oltaim yumi mas kolim nem bilong Maria! Maria em i Mama bilong God na mama bilong King Jisas, olsem na Maria inap long helpim yumi oltaim! I no gat wanpela samting God i no inap mekim. Nogat. God inap long mekim olgeta samting, olsem na yumi no ken tubel long singaut long mama bilong em, long wanem mama bilong em, em i mama bilong yumi tu.

Bokis Kontrak bilong Bikpela

(Ark of the covenant)

Long dispela litani yumi kolim Maria em i «Bokis Kontrak bilong Bikpela». Na bilong kisim save long mining bilong dispela litani, orait pastaim yumi mas tok olsem **ol samting bilong Olpela Testamen em i piksa bilong ol samting bilong Nupela Testamen**. Santu Pol yet i tok: *Dispela ol samting [bilong Olpela Testamen] i bin kamap... em i olsem piksa bilong ol arapela man i ken lukim* (1 Korin 10:11). Na Jisas yet i tok olsem ol samting bilong Olpela Testamen i toktok long em yet. Taim em i wokabaut wantaim tupela disaipel i go long ples Emeus, Buk Baibel i tok: *[Jisas] Em i stat long tok bilong Moses na bilong olgeta profet, na em i skulim tupela long as bilong olgeta hap bilong buk bilong God i toktok long em yet* (Luk 24:27). Olsem na taim yumi ritim Olpela Testamen yumi mas save

olsem em i pulap long planti piksa bilong ol samting bilong Nupela Testamen, olsem na yumi bai i painim ol piksa bilong Jisas, Katolik Sios, santu Maria na heven.

Olsem na long bipo tru ol Tisa bilong Sios i tok olsem Bokis Kontrak bilong Bikpela em i piksa bilong santu Maria. Olsem wanem?

Bokis Krontrak long Olpela Testamen

Stori bilong Bokis Kontrat i stap long sapta 25 bilong Buk bilong Eksodas. God yet i bin askim Moses long wokim Bokis Kontrak bilong Bikpela. Dispela Bokis Kontrak em i wanpela bokis i longpela olsem 110 sentimita na bikpela olsem 66 sentimita na antap tu em i 66 sentimita. Moses i bin wokim long plang bilong diwai akas, na em i bin karamapim timba insait na ausait wantaim gol ol i bin kukim long paia bilong rausim pipia bilong em. Na tu em i bin wokim tupela ensel gol i karamapim bokis wantaim ol win bilong ol, na wokim 4-pela ring gol bilong karim bokis. Olsem na dispela bokis em i naispela tru, na ol Israel i kirap nogut tru long lukim. Moses i bin wokim dispela bokis olsem Bikpela i tok, olsem na Bikpela i amamas long Moses.

Orait, wanem samting i bin i stap insait long Bokis Kontrak? Insait long Bokis Kontrak Moses i bin putim 3-pela

bikpela samting: **1)** Insait long Bokis Kontrat Moses i bin putim tupela ston wantaim ol 10-pela mandato bilong God. God yet i bin givim ol 10-pela mandato long Moses, na Moses i bin putim ol insait long Bokis Kontrak. **2)** Insait long Bokis Kontrat Moses i bin putim dispela bret mana God yet i bin givim long ol Israel long ples wesan nating. **3)** Insait long Bokis Kontrat Moses i bin putim stik bilong Aron i soim olsem Aron em i pris bilong Bikpela.

Olsem na taim ol Israel i lukim Bokis Kontrak, ol i pil olsem ol i lukim God yet. Ol Israel i save pinis olsem insait long Bokis Kontrak i gat ol samting bilong God yet, olsem na ol i tok dispela Bokis em i holi tumas.

*Bokis Kontrak bilong Bikpela
em i piksa bilong santu Maria*

Olsem wanem na yumi kolim Maria em i «Bokis Kontrak bilong Bikpela»? Yumi givim dispela nem long Maria, long wanem dispela Bokis Kontrak em i piksa bilong santu Maria.

- **Bokis Kontrak em i olsem haus bilong God.** Ol Israel i save olsem Bokis Kontrak em i holi tumas, olsem na ol i ting em i haus bilong God, long wanem ol samting bilong God i stap insait. **Orait Maria em i trupela haus bilong God,** long wanem God yet i bin i stap 9-pela mun olgeta long bel bilong Maria.

Olsem na bel bilong Maria em i olsem Bokis Kontrak na God yet i bin i stap insait long em.

- **Bokis Kontrak i holim 10-pela mandato bilong God.** Ol dispela mandato i kam long bikpela save bilong God, na God yet i bin givim long yumi, bai yumi i ken bihainim ol na go long heven. **Orait Maria i bin karim Jisas, na Jisas em i *Tok bilong God na Save bilong God*.** Buk Baibel yet i save kolim Jisas «*Tok bilong God*» na «*Save bilong God*». Santu Jon i tok: *Tok em i bin kamap man, na em i kam i stap namel long mipela* (Jon 1:14). Na santu Pol i tok: *Krais em i strong bilong God, na em i save bilong God* (1 Korin 1:24).

- **Bokis Kontrak i holim bret mana.** Moses i bin putim bret mana insait long Bokis Kontrak, bai ol Israel i ken lukim na tingim long ol gutpela samting God i bin mekim bilong helpim ol. Na dispela bret mana em i piksa bilong yukaris, long wanem yukaris em i trupela bret bilong heven. **Orait Maria i bin karim Jisas insait long bel bilong em, na Jisas em i trupela bret i givim laip long yumi.** Jisas yet i tok: «*Mi yet, mi bret bilong laip*» (Jon 6:48).

- **Bokis Kontrak i holim stik bilong Aron.** God yet i bin mekim mirakel long dispela stik, na dispela stik i kamap olsem mak bilong God yet i bin makim Aron long kamap pris. **Orait Maria i bin karim Jisas, na Jisas em i trupela Pris bilong Oltaim.** Buk Baibel yet i tok: *[Jisas] em i kamap*

hetpris wankain olsem Melkisedek, na em bai i stap hetpris oltaim oltaim (Hibru 6:20).

- **Bokis Kontrak em i dia tumas long ol Israel.** God yet i bin makim Israel olsem pipel bilong em, olsem na ol Israel i laikim tumas dispela Bokis Kontrak. **Orait Maria em i dia tumas long ai bilong God,** long wanem God yet i bin makim em bilong kamap mama bilong Jisas.

- **Bokis Kontrak i gat tupela ensel i karamapim em.** God yet i bin tok na Moses i wokim tupela ensel gol i karamapim Bokis Kontrak long win bilong ol. **Orait Maria em i Kwin bilong ol ensel,** olsem na ol ensel i save mekim wok bilong helpim em. Maria em i olsem dispela Bokis Kontrak na ol ensel i save raunim em na amamas long em.

- **Bokis Kontrak i pulap long gol.** Bikpela yet i bin tokim Moses long karamapim Bokis Kontrak long gol long ausait na ausait, long wanem ol samting i stap insait long em, em i bikpela tru. **Orait Maria i winim dispela Bokis Kontrak,** long wanem insait long bel bilong em God yet i bin kamap. Bokis Kontrak i karim ol ston na bret tasol, tasol bel bilong Maria i karim God yet!

- **Bokis Kontrak em i strong tumas.** Buk Baibel i tok olsem Moses i bin yusim diwai akas, long wanem dispela diwai em i strong tumas. God yet i bin makim dispela diwai bai Bokis Kontrak i ken i stap strongpela, long wanem ol i mas karim em

na wokabaut planti yia long ples wesana nating, olsem na timba i no ken bagarap hariap. **Orait Maria em i strong tumas**, na God yet i bin givim strong long Maria i winim strong bilong ol ensel. God tasol i winim Maria! Maria i pulap long strong i kam long God yet, olsem na i no gat wampela samting i ken daunim em o bagarapim em.

Olsem na yumi ol Katolik i amamas tru long kolim Maria em i «Bokis Kontrak bilong Bikpela», long wanem em i bin karim Bikpela yet insait long bel bilong em! Bokis Kontrak bilong Olpela Testamen em i piksa bilong Bokis Kontrak bilong Nupela Testamen, em Maria tasol! Bokis Kontrak bilong Olpela Testamen i lus, na i no gat wampela man i ken save em i stap we nau. Bokis Kontrak bilong Nupela Testamen i stap long heaven, na oltaim em i save was long yumi!

Dua bilong heven

(Gate of heaven)

Dispela litani bilong santu Maria em i naispela tumas, na i save givim bikpela ona long em. Yumi kolim Maria em i «Dua bilong heven», na dispela nem i kam long Buk Baibel yet na i gat bikpela mining bilong em.

Tasol pastaim long yumi go insait long mining bilong dispela litani, yumi mas tok klia olsem **Jisas tasol em i dua bilong i go long heven**. Em yet i tok: «**Mi yet mi dua**. Sapos wanpela man i kam long mi na i go insait long banis, orait God bai i kisim bek em» (Jon 10:9). Na santu Pita tu i tok klia olsem Jisas tasol i save kisim bek yumi: «*I no gat narapela man i inap kisim bek yumi. Nogat. Long nem bilong Jisas wanpela tasol yumi olgeta manmeri bilong graun inap i stap gut. Em wanpela tasol God i bin makim bilong kisim bek yumi*» (Wok Aposel 4:12).

Orait olsem wanem na yumi kolim Maria tu em i «Dua bilong heven»? Dispela nem yumi givim long santu Maria i gat tupela as bilong em.

1) Maria em i dua bilong heven, long wanem Jisas i kam insait long graun long bel bilong Maria

Dispela em i nambawan as bilong dispela nem. Taim Maria i tok «Yesa» long Ensel Gabriel, orait Maria i kamap olsem wampela dua Pikinini bilong God i laik yusim bilong lusim heven na kam insait long graun. Yumi no ken lustingting olsem God i no bin pulim Maria long tok «Yesa». Nogat. God i bin askim Maria long kamap mama bilong Jisas, tasol God i rispektim laik bilong Maria. Sapos Maria i tok «Nogat», orait Jisas bai i no inap kam long graun. Tasol Maria i tok «Yesa», na em i kamap olsem wampela dua Jisas i laik yusim bilong kam i stap namel long yumi.

Oltaim yumi mas tenkim Maria long «Yesa» bilong em, long wanem em i bin mekim Jisas i lusim heven na i kam long graun bilong kisim bek yumi. Long «Yesa» bilong Maria God i bin inapim ol promis bilong em na olgeta tok profet bilong bipo i kamap ples klia. Long «Yesa» bilong Maria God yet i bin kam i stap namel long yumi. Bel bilong Maria i kamap olsem dua God yet i laik yusim bilong kam long graun na kisim bek yumi.

2) Maria em i dua bilong heven, long wanem em i sanap namel long yumi na Jisas

Yumi kolim Maria «Dua bilong heven» long wanem em i namelmeri i sanap olsem wanpela dua namel long yumi na Jisas. Yumi olgeta i gat sin na yumi doti long ai bilong Jisas, olsem na i no gutpela long yumi sanap nating long ai bilong em, long wanem em bai i luksave long ol sin bilong yumi, olsem na em bai i gat olgeta rait long sakim ol prea blong yumi. Tasol Maria i save laikim yumi tumas, olsem na oltaim em i sanap namel long yumi na Jisas. Na taim yumi save prea, orait Maria i save kisim ol prea bilong yumi, na givim long Jisas. Sapos yumi laik go long Jisas, orait yumi mas askim santu Maria long helpim yumi. Na ol grasia Jisas i laik givim long yumi, orait Jisas i save givim long mama bilong em pastaim, na mama bilong em i save tilim i kam long yumi. Maria em i dua yumi mas yusim bilong i go long Jisas!

Long dispela as tasol oltaim yumi save beten na askim intersesen bilong santu Maria, long wanem yumi save pinis olsem em i namelmeri Jisas yet i bin putim bilong helpim yumi. Na dispela pasin bilong i stap namelmeri i kamap ples klia long mirakel Jisas i bin wokim long kaikai bilong marit long taun Kana long Galili. Gutnius i tok olsem man i marit i sot long wain, olsem na Maria i askim Jisas long helpim dispela man. Na Jisas i harim prea bilong Maria, olsem na em i wokim namba wan mirakel

bilong helpim dispela man. Olsem na Maria i sanap namel long dispela man na Jisas, na interesen bilong em i kamap ples klial!

Maria em i dua Jisas i bin yusim bilong kam long graun, na em i dua yumi mas yusim bilong i go long heven! Olsem na oltaim yumi ol Katolik i mas askim Maria long helpim yumi! Oltaim yumi mas askim em long sanap namel long yumi na Jisas, long wanem prea bilong Maria i gat bikpela pawa long ai bilong Jisas! Na wankain olsem em i bin sanap olsem namelmeri bilong helpim dispela man long kaikai bilong marit long taun Kana, wankain olsem tasol em bai i sanap olsem namelmeri bilong helpim yumi oltaim!

Sta bilong moning

(Morning star)

Long dispela litani yumi amamas long kolim Maria em i «Sta bilong moning». Long ol litani Katolik Sios i save givim planti naispela nem long Maria, na ol dispela nem i kam long Buk Baibel yet. Sampela bilong ol dispela nem i save kam long Olpela Testamen, na sampela i kam long Nupela Testamen. Na yumi mekim olsem long wanem Buk Baibel i pulap long planti tok profet na long planti piksa bilong ol samting bai i kamap bihain, olsem na ol santu na ol saveman bilong Sios i bin skelim gut ol dispela samting na ol i save tok olsem planti hap tok bilong Buk Baibel em i piksa bilong Maria.

Pastaim em i gutpela long yumi tingim wanpela hap tok bilong Buk Baibel i soim yumi olsem Maria em i Kwin bilong ol sta. Long Buk bilong Revelesen i gat wanpela tok i naispela tru:

Orait wanpela narakain mak tru i kamap long skai. Dispela mak i olsem. Wanpela meri i stap, na em i pasim san olsem klos bilong em. Na mun i stap aninit long lek bilong em, na 12-pela sta i stap olsem hat long het bilong em (12:1). Ol Tisa bilong Sios na ol saveman i tok olsem dispela meri Buk Baibel i toktok long em, em i piksa bilong santu Maria. Maria em i dispela meri i stap long heven, na em i pasim san olsem klos bilong em, em i sanap antap long mun na i gat ol sta i stap olsem hat long het bilong em. Ol dispela samting i soim yumi olsem God yet i bin makim Maria bilong kamap Kwin bilong heven.

Maria em i «Sta bilong moning»

Orait, olsem wanem na yumi kolim Maria em i «Sta bilong moning»? Yumi givim dispela nem long Maria, long wanem **sta bilong moning em i wanpela spesel sta i winim tru ol arapela sta bilong skai. Olsem na sta bilong moning i no wankain olsem ol arapela sta bilong skai. Nogat., long wanem lait bilong em i bikpela tru na winim lait bilong ol arapela sta. Olsem na planti manmeri i tok olsem sta bilong moning em i naispela tumas! Na dispela sta i gat wanpela wok bilong em: em i save kamap long taim tudak i laik pinis na san i laik kamap. Em i no save lait long biknait. Nogat. Em i save lait tasol long taim san i laik kamap.**

Olsem na nau yumi toktok liklik long Maria em i «Sta bilong moning».

- **Sta bilong moning i lait tumas na i winim ol arapela sta.** Ol manmeri i stadi long ol samting bilong skai i tok olsem lait bilong dispela sta i winim tru ol arapela sta. Lait bilong san tasol inap long winim em. Na dispela em i piksa bilong santu Maria, long wanem Jisas em i san i givim lait long yumi, na Maria em i dispela sta i lait tumas, tasol em i no inap winim lait bilong Jisas. Jisas yet i tok: «***Mi yet mi lait bilong graun***» (Jon 8:12). Olsem na lait bilong Maria i kam bihain long lait bilong Jisas. Jisas em i nambawan tru, long wanem em i God tru na Sevia bilong yumi. Tasol Maria i kam bihain long Jisas, long wanem em i mama bilong em. Jisas em i san, na Maria em i sta.

- **Sta bilong moning i toksave olsem tudak bai i pinis.** Dispela sta i no save lait long biknait. Nogat. Em i save kamap na lait long taim tudak i laik pinis, olsem mak bilong bikpela san bai i kam hariap. Na dispela em i piksa bilong santu Maria, long wanem em i mak bilong tudak bilong sin bai i pinis. Maria i kam long graun pastaim long Jisas, na em i mak olsem Jisas bai i kam na pinisim strong bilong sin na strong bilong Satan. Buk Baibel i tok: *Ol manmeri i bin i stap long bikpela tudak, tasol nau ol i lukim bikpela lait. Ol i bin sindaun long ples tudak, tasol nau lait i kamap long ol* (Aisaia 9:2). Dispela tok bilong Profet Aisaia i tok long Jisas, em i givim lait long ol manmeri i bin i stap long tudak bilong sin.

- **Sta bilong moning i kam pastaim long san.** Sta bilong moning i save lait olsem mak bilong san bai i kamap, olsem na taim ol manmeri i lukim em, orait ol i save olsem i no longtaim bikpela san bai i kamap. Na dispela em i piksa bilong santu Maria, long wanem em i kam pastaim long Jisas. Maria i kam long graun olsem sta bilong moning i toksave long yumi olsem Jisas bai i kam long graun.

- **Sta bilong moning em i naispela tru.** Dispela sta i naispela tumas, na em i winim tru ol arapela sta bilong skai. Lait bilong em i mekim ol arapela sta i luk olsem ol i liklik tumas. Na dispela tu em i piksa bilong Maria, long wanem grasia na pasin bilong Maria i winim tru grasia na pasin bilong ol santu bilong heaven. Long heaven Maria em i nambawan samting tru, na ol ensel na santu i kam bihain long em.

- **Sta bilong moning em i bilas bilong heaven.** Sta bilong moning em i naispela bilas God yet i bin putim long skai, bilong mekim skai i kamap naispela moa yet. Na dispela em i piksa bilong santu Maria, em i bilas bilong heaven. Maria i mekim heaven i kamap naispela moa moa yet!

Olsem na yumi kolim Maria em i «Sta bilong moning» long wanem Jisas em i trupela san i givim lait! Maria em i sta, na Jisas em i san. Maria i soim yumi olsem tudak bai i pinis, tasol Jisas i kam na brukim tudak na givim lait long yumi!

Helpim bilong ol sikmanmeri

(Health of the sick)

Dispela litani i save givim amamas na bel isi long ol manmeri i sik, long wanem yumi kolim Maria em i «Helpim bilong ol sikmanmeri». Na em i tru, long wanem Maria i save givim bel isi long ol manmeri i sik, na i oltaim em i save helpim ol manmeri i singaut long em.

Na pastaim long yumi go insait long mining bilong dispela litani, yumi mas tingim olsem olgeta samting nogut i stap long graun i kam long sin bilong Adam na Iv. Yes, long wanem taim God i kamapim Adam na Iv na putim tupela long paradais, olgeta samting i orait tasol. I no gat wanpela samting nogut long paradais, na i no gat wanpela samting nogut i ken daunim ol manmeri! Tasol Adam na Iv i mekim sin, olsem na God yet i rausim tupela long paradais, na graun i kamap narakain

olgeta. Sin i mekim strong bilong Satan i kam long graun, olsem na nau graun i pulap long planti samting nogut. Na sik em i wanpela samting nogut i save bagarapim tru bodi bilong yumi. Santu Pol yet i skulim yumi olsem: *Yumi save, wanpela man [Adam] i bin mekim sin, na long dispela pasin sin i kamap long graun. Na sin i bringim dai i kam. Na dai i kisim olgeta man* (Rom 5:12). **Olsem na sin bilong Adam na Iv em i as bilong sik na as bilong indai.**

Tasol God em i gutpela tumas, olsem na em i givim santu Maria olsem wanpela dokta i save helpim ol sikmanmeri!

Na yumi no ken lustingting olsem yumi ol manmeri i gat bodi na sol. Bodi bilong yumi i save baragap long sik, na em i save dai. Na sol bilong yumi i save bagarap long sin, tasol em i no save dai. Nogat tru. Maski bodi bilong yumi i bagarap long matmat, sol bilong yumi i save i stap laip na em bai i stap laip inap oltaim oltaim! Sapos yumi dai wantaim grasia bilong God, orait sol bilong yumi bai i stap laip long heven. Sapos yumi dai wantaim mortal sin na yumi no gat grasia bilong God, orait sol bilong yumi bai i stap laip long paia bilong hel. Olsem na santu Maria i wari tumas long yumi, na em i save lukautim sol na bodi bilong yumi wantaim! **Maria i no was long bodi bilong yumi tasol. Nogat. Em i was moa moa yet long sol bilong yumi,** long wanem em i laik long yumi go long heven!

Orait nau yumi toktok liklik long mining bilong dispela litani.

1) Santu Maria i save helpim sol bilong yumi

Santu Maria i save helpim sol bilong yumi, long wanem em i laik long sol bilong yumi i orait oltaim. Sin tasol i save bagarapim sol bilong yumi, olsem na oltaim Maria i save helpim yumi long abrusim ol samting nogut i save pulim yumi long mekim sin. Bodi bilong yumi i save baragap long sik, tasol sol bilong yumi i save bagarap long sin. **Na sol i winim bodi, long wanem sol bilong yumi i no save dai!** Olsem na Maria i wari tumas long sol bilong yumi, na em i strongim yumi long sakim ol traime nogut i laik pulim yumi long mekim sin na bagarapim sol bilong yumi. Nogut yumi tingting tumas long ol samting bilong bodi, na bihain sol bilong yumi i lus long hel! Olsem na Maria i save hatwok tru bilong helpim sol bilong yumi long i stap klin long sin. Na oltaim yumi mas singaut long Maria, long wanem yumi wik tumas, na yumi save pundaun planti taim long sin!

2) Santu Maria i save helpim bodi bilong yumi

Santu Maria em i gutpela mama bilong yumi, olsem na em i save was oltaim bai bodi bilong yumi i orait. Wankain olsem ol mama i save lukautim ol liklik bebi bilong ol, wankain olsem

tasol santu Maria i save lukautim bodi bilong yumi. Taim wanpela pikinini i sik, mama bilong em i save was long em long san na long nait. Mama i no save slip. Nogat tru. Em bai i was long pikinini tasol, na em bai i wok hat bai pikinini i no ken sot long wanpela samting. Orait santu Maria i winim tru ol mama bilong dispela graun, olsem na taim wanpela man o meri i sik, em i save was long em tu long san na long nait, na em i askim Jisas oltaim long strongim dispela man o meri i karim pen. Maria i laikim yumi tumas, olsem na em i no laik long yumi i karim bikpela pen!

Santu Bernard i tok: «Taim yu pilim olsem pen bilong yu i bikpela nogut tru, orait yu mas singaut long Maria. Taim yu pilim olsem ol manmeri i lusim yu na yu i stap wanpis, orait yu mas singaut long Maria. Taim yu pret long ol samting nogut i ken kamap long yu, orait yu mas singaut long Maria. Maria i mas i stap oltaim long lewa bilong yu! Sapos yu laikim em tru, em bai i helpim yu long wokabaut long gutpela rot. Sapos yu tingting oltaim long em, yu no inap lus. Sapos yu holim strong han bilong em, yu bai i no inap pundaun long sin. Sapos yu pas wantaim em, yu no ken pret long wanpela samting, long wanem em bai i kisim yu i go long heven».

Olsem na oltaim yumi mas kolim nem bilong Maria, na askim em long was long bodi na sol bilong yumi oltaim! Sol bilong

yumi i bagarap long sin, na bodi bilong yumi i bagarap long sik. Olsem na yumi mas askim Maria long sambai long yumi, bai yumi ken abrusim ol sin na ol sik, na yumi ken i stap klin na gut long ai bilong God! Na sapos sik i kisim yumi na yumi no inap abrusim em, orait yumi no ken komplein na tingting planti, yumi mas ofarim olgeta pen na tingim olsem bikpela pe i wetim yumi long heven!

Ples hait bilong ol sinmanmeri

(Refuge of sinners)

Nau yumi kolim Maria em i «Ples hait bilong ol sinmanmeri». Na dispela litani i save givim hop na bel isi long yumi olgeta, long wanem yumi olgeta man na meri bilong mekim sin. I no gat wanpela man o meri long dispela graun i ken tok olsem em i no gat sin. Nogat. Sapos wanpela man o meri i tok olsem em i no gat sin, dispela man o meri i giaman. Buk Baibel yet i tok olsem taim yumi i stap long bel bilong mama, yumi man na meri bilong mekim sin pinis. Profet Devit i tok: *[Bikpela] Yu save pinis, taim mama i karim mi, mi kamap man bilong mekim pasin nogut. Taim mi stap yet long bel bilong mama, mi man bilong mekim sin* (Buk Song 51:5). Na santu Jon tu i tok: *Sapos yumi tok: «Mi no bin mekim sin», orait long dispela tok yumi kolim God em i man bilong giaman* (1 Jon 1:10).

Tasol God i laikim yumi tumas, olsem na em i no laik long yumi i lus long hel. Nogat tru! God i laik long yumi i go long heven. **Olsem na em i givim Jisas long yumi, bai Jisas i ken i stap olsem Helpim bilong yumi.** Buk Baibel yet i tok: *Sapos wanpela man i mekim sin, orait yumi gat Helpim bilong yumi, em i stap wantaim Papa. Em Jisas Krai, dispela man bilong mekim stretpela pasin olgeta. Em yet i bin mekim wok bilong rausim sin bilong yumi* (1 Jon 2:1-2). **Olsem na Jisas em i nambawan Helpim bilong yumi,** long wanem Jisas tasol i bin kapsaitim blut bilong em long diwai kros bilong kisim bek yumi.

Orait olsem wanem na yumi kolim Maria em i «Ples hait bilong ol sinmanmeri»? Pastaim yumi mas tok olsem ol ples hait em ol ples ol manmeri nogut i save yusim bilong hait long em. Taim wanpela man o meri i mekim rong, orait em i save go na hait long ples hait. Long ples hait em i stap gut, na em i save olsem i no gat wanpela samting nogut i ken kamap long em. Long ples hait em i no pret long wanpela samting, long wanem ol manmeri i no save dispela ples hait i stap we, olsem na ol bai i no inap long painim em.

Olsem na nau yumi toktok liklik as bilong dispela nem yumi givim long santu Maria.

- Long ples hait ol manmeri nogut i no save pret. Ol manmeri i bin mekim rong na i hait long ples hait, i no save pret long ol birua, long wanem ol birua i no save long dispela ples

hait i stap we. **Wankain samting i save kamap long Maria!** Olsem na taim yumi mekim sin, wantu yumi mas go long Maria. Taim yumi mekim sin na sol bilong yumi i doti long ai bilong God, orait Maria i kamap olsem wanpela ples hait we yumi ken go na hait. Maria i save welkamim yumi na em i no save rausim yumi. Nogat. Oltaim Maria i redi long welkamim yumi, long wanem em i laik helpim yumi long tanim bel na kam bek long Jisas!

- **Long ples hait ol manmeri nogut i stap gut.** Taim wanpela man o meri i mekim rong na i go i stap long ples hait, em i pil olsem long dispela ples hait em i stap gut. Em i save pinis olsem sapos em i go bek long ples na i kamap ples klia, orait ol manmeri bai i bagarapim em stret. Tasol long ples hait em i pil olsem em i ken i stap gut, na em i amamas long hait long dispela ples. **Wankain samting i save kamap long Maria!** Taim sol bilong yumi i pulap long sin, orait yumi mas go long Maria, na em bai i helpim yumi long go bek long Jisas na i stap gut. God yet i bin makim Maria bilong helpim yumi long go long Jisas na kisim grasia bilong God long sol bilong yumi gen.

- **Long ples hait ol manmeri nogut i save kisim gutpela tingting.** Planti taim i kamap olsem ol manmeri i hait long ples hait, ol i save tingting gen long rong ol i bin mekim, na ol i save sori long dispela rong. Planti taim ol manmeri i stap hait ol i save kisim gutpela tingting, olsem na ol i luksave long rong ol i bin

mekim. **Wankain samting i save kamap long Maria!** Taim yumi mekim sin na yumi askim Maria long helpim yumi, wantu em i save givim gutpela tingting long yumi, bai yumi ken kam bek long Jisas na stretim dinau wantaim em. Maria i amamas long kirapim ol gutpela tingting insait long bel bilong yumi, olsem na em i redi long helpim yumi long tok sori long Jisas.

Olsem na yumi mas hait long santu Maria oltaim, long wanem God yet i bin makim em olsem «Ples hait bilong ol sinmanmeri». Maria i pulap long marimari na laikim pasin! Em i no save givim baksait long ol manmeri bilong sin. Nogat. Em i no save les long harim ol prea bilong ol manmeri bilong sin i singaut long em. Nogat tru. Bipo, taim Maria i stap long graun, marimari bilong em i bikpela tru. Tasol nau marimari bilong Maria i bikpela moa moa yet, long wanem nau em i stap long heven! Santu Brigit i tok: «I no gat wangepela man o meri i singaut long Maria, na Maria i bin les long helpim dispela man o meri. Nogat tru». Sapos Maria i no pre bilong helpim yumi, orait yumi bai i lus olgeta. Na Jisas yet i tokim santu Brigit moa olsem: «Sapos Mama bilong mi i no pre bilong helpim ol manmeri, orait ol manmeri bai i lus olgeta».

Strong bilong ol manmeri i bel hevi

(Comfort of the afflicted)

Bipo yumi tok pinis olsem Maria em i gutpela dokta God yet i bin givim long yumi bilong helpim yumi. Yumi bin kolim Maria em i «Helpim bilong ol sikmanmeri», na em i tru, long wanem em i save was oltaim bilong helpim ol manmeri i sik long bodi o long sol bilong ol. Na nau yumi kolim Maria em i «Strong bilong ol manmeri i bel hevi», long wanem Maria em i olsem marasin i save oraitim ol manmeri i gat hevi na wari, na em i save givim hop na bel isi long ol manmeri i bel hevi.

Pastaim yumi mas tok olsem bel hevi em i no wanpela sin. Nogat. Planti man na meri i bungim planti hevi long laip bilong ol, olsem na bel bilong ol i hevi. Na dispela i no sin, long wanem ol i no bin mekim wanpela rong. Olsem na yumi no ken paul na tingting olsem bel hevi em i wanpela sin. Nogat tru. Long Buk

Baibel i gat stori bilong planti man na meri i stretpela tru long ai bilong God, tasol ol i bin bel hevi.

- **Jisas i bel hevi!** Gutnius i tok olsem Jisas i bel hevi nogut tru: *Na bel bilong em [Jisas] i hevi, na em i pilim nogut tru. Na em i tokim ol [disaipel] olsem: «Bel bilong mi em i hevi tumas, na klostu mi laik i dai. Yupela stap hia na was wantaim mi»* (Matyu 26:37-38).

- **Santu Maria i bel hevi!** Maria i save gut long bel hevi em i wanem samting! Yumi no ken lustingting olsem em i bin lukim pikinini bilong em i hangamap long diwai kros! Maria i bin lukim Jisas i dai long diwai kros, na em i witnesim olgeta samting nogut ol Juda i bin mekim long Jisas. Na long dispela taim bel bilong Maria i hevi tumas. Olsem na em yet i save long bel hevi em i wanem samting, olsem na em i inap long helpim yumi gut.

- **Ol disaipel tu i bel hevi!** Taim Jisas i toksave long ol olsem em i mas i dai, orait Buk Baibel i tok: *Ol disaipel i harim dispela tok na ol i bel hevi tumas* (Matyu 26:22).

Olsem na yumi no ken tingting olsem bel hevi em i wanpela sin, long wanem Jisas i no mekim sin na em i bel hevi tumas. Na santu Maria tu i no bin mekim wanpela sin long laip bilong em, tasol em i pilim bikpela bel hevi tu.

Tasol maski bel hevi em i no wanpela sin, yumi mas tok klia olsem bel hevi em i samting nogut tru, long wanem em i save

bagarapim bel na tingting bilong yumi. Buk Baibel i tok: *Sapos bel bilong man i amamas, bai pes bilong em i gutpela. Tasol sapos bel bilong man i hevi, bai tingting bilong em i bagarap* (Provep 15:13). Taim yumi bel hevi longpela taim tumas, orait kain kain tingting nogut i save kirap insait long bel bilong yumi, na isi isi yumi lusim hop. Olsem na oltaim yumi mas pait bilong winim bel hevi, na yumi no ken larim bel hevi i daunim yumi! Nogat!

Santu Pol i bin karim planti pen na hevi long laip bilong em, tasol em i no bel hevi. Olsem wanem? Long wanem em i gat bikpela hop long Bikpela, na em i save olsem Bikpela yet bai i kam na helpim em. Em i tok: ***Oltaim yupela i mas amamas long Bikpela. Mi tok gen, yupela i mas amamas*** (Filipai 4:4).

Olsem na sapos yumi laik winim bel hevi, orait yumi mas trastim God wantaim olgeta strong bilong yumi. Yumi mas hop long em, na putim laip bilong yumi long han bilong em. Profet Aisaia i tok: ***Ol manmeri i bilip long Bikpela na i wetim em i helpim ol, ol bai i stap strong oltaim. Na bai ol i flai olsem ol tarangau. Bai ol i ran na ol i no inap sotwin, na bai ol i wokabaut na ol i no inap les*** (Aisaia 40:31).

Na yumi kolim Maria em i «Strong bilong ol manmeri i bel hevi» long wanem oltaim Maria i save strongim yumi long winim bel hevi. Oltaim Maria i save kirapim ol gutpela tingting insait long bel bilong yumi. Oltaim Maria i save strongim bilip

na hop bilong yumi. Na oltaim em i save sambai long yumi, bai bel hevi i no ken bagarapim yumi.

Sapos yumi trastim Maria, orait long taim bilong bel hevi yumi mas askim em long helpim yumi. Yumi mas putim olgeta samting nogut bilong yumi long han bilong em, bai em i ken givim long Jisas na Jisas i ken helpim yumi. Maria i save was tumas long sol bilong yumi, olsem na em i laik long yumi i stap gut. Maria i no laik long bel hevi i bagarapim yumi o mekim yumi i daun tumas. Nogat. Maria i laik helpim yumi long i stap gut na painim amamas gen.

Na yumi no ken lustingting olsem Maria em i gutpela mama bilong yumi! Dispela em i as bilong hop bilong yumi! Taim yumi beten long Maria, yumi no beten long wangepela bikmeri bilong graun. Nogat! Taim yumi beten long em, orait yumi beten long mama bilong yumi! Na i gat wangepela mama save les long helpim pikinini bilong em? Nogat tru! Ol gutpela mama i amamas long harim ol singaut bilong ol pikinini bilong ol. Olsem na santu Maria bai i amamas tru long harim ol beten bilong yumi, na wantu em bai i kam bilong helpim yumi!

Helpim bilong ol Kristen manmeri

(Help of Christians)

Dispela litani i save givim strong na hop long yumi ol Katolik manmeri, long wanem yumi kolim Maria em i «Helpim bilong ol Kristen manmeri».

Yumi save pinis olsem long strong bilong yumi yet, yumi no inap mekim wanpela samting. Jisas yet i tok: «***Sapos yupela i no pas long mi, yupela i no inap karim kaikai... Man i pas long mi na mi pas long em, em i save karim planti kaikai. Sapos yupela i lusim mi, yupela i no inap mekim wanpela samting***» (Jon 15:4-5). Olsem na yumi nidim helpim bilong Jisas oltaim, long wanem em yet em i as bilong olgeta strong bilong yumi, na em yet em i nambawam Helpim bilong yumi.

Tasol Jisas yet i givim santu Maria olsem gutpela mama bilong yumi, bai em i was long yumi na strongim yumi long

taim bilip bilong yumi i slek. Taim Jisas i hangamap long diwai kros, orait em i tokim Jon olsem: «**Dispela meri em i mama bilong yu**» (Jon 19:27), na yumi save pinis olsem Jon i makim ol Katolik manmeri. Olsem na taim Jisas i givim mama bilong em long Jon, em i givim mama bilong em long yumi olgeta.

Orait olsem wanem na yumi save kolim Maria em i «Helpim bilong ol Kristen manmeri»? Yumi givim dispela nem long Maria, long wanem yumi ol Kristen i gat 3-pela birua i save wok hat bilong bagarapim sol bilong yumi. Yumi no toktok nau long ol birua bilong bodi bilong yumi, em ol lain long ples i belnogut o kros long yumi. Nogat. **Nau yumi toktok long ol birua bilong sol bilong yumi, em ol birua i laik pulim yumi i go long hel.** Na ol dispela birua i husat tru?

1) Namba wan birua bilong sol: Satan

Satan em i namba wan birua bilong sol bilong yumi. Satan em i birua bilong God, olsem na em i birua tu bilong ol samting God yet i bin mekim. Satan i lus olgeta long hel, long wanem em i bin sakim tok bilong God. Olsem na nau em i hetim yumi na em i laik pulim yumi tu i go long hel wantaim em. Satan i save wok hat bilong mekim yumi i pundaun long sin, olsem na oltaim em i save kirapim kain kain tingting nogut long bel bilong yumi.

Tasol santu Maria i winim Satan! Olsem na yumi no ken pret long Satan! Long bigin stret bilong Buk Baibel i gat tok bilong wanpela meri i karim pikinini na dispela pikinini i krungutim het bilong Satan, na dispela meri Buk Baibel i toktok long em, em i santu Maria tasol! Buk bilong Stat i tok: *Na God, Bikpela i tokim snek olsem: «...bai mi mekim yu i stap birua bilong meri, na meri i stap birua bilong yu. Na bai mi mekim ol lain bilong yu i birua long lain bilong meri. Bai ol i krungutim het bilong yu...»* (Stat 3:15).

Satan i no inap long winim Maria na em i no inap long mekim wanpela samting nogut long em, long wanem God yet i bin banisim Maria, olsem na Maria em i Klin Olgeta na i no gat sin! Satan i save win long yumi, long wanem planti taim yumi save mekim sin. Tasol Maria i winim Satan, long wanem Maria i no bin mekim wanpela sin long laip bilong em! Olsem na Satan em i birua tru long Maria, tasol Maria i lap long em na i save bagarapim em oltaim. Long ai bilong Maria, Satan em i olsem das nating!

2) Namba 2 birua bilong sol: Amamas bilong graun

Amamas bilong graun em i namba tu birua bilong sol bilong yumi. Amamas bilong graun i min ol pasin bilong tingting tumas long amamas bilong bodi, na long tingting tumas long mani, o long hipim hipim planti samting, o long kisim ona na

biknem, na ol dispela samting i save pulim yumi long sakim tok bilong Jisas, long wanem Jisas planti taim i tok olsem yumi mas daunim yumi yet na i stap las.

Tasol santu Maria i winim amamas bilong graun! Santu Maria i bin daunim em yet oltaim, na i no gat wanpela taim em i pundaun long dispela pasin nogut bilong kisim amamas bilong graun. Olsem na taim ol tingting bilong graun i kirap insait long sol bilong yumi, orait yumi mas save olsem Maria em i redi long helpim yumi!

3) Namba 3 birua bilong sol: Laik nogut bilong bodi bilong yumi

Laik nogut bilong bodi bilong yumi em i namba 3 birua bilong sol bilong yumi. Ol laik nogut bilong bodi em ol tingting bilong mekim pasin pamuk na pasin i doti long ai bilong God, na tu em ol tingting bilong givim amamas long bodi long sait bilong dring, spak, kaikai planti na lespasin.

Tasol santu Maria i winim ol laik nogut bilong bodi! Santu Maria em i Klin Olgeta na i no gat wanpela taim em i bin bihainim ol laik nogut bilong bodi. Nogat tru! Bodi bilong Maria em i klin olgeta na i stap aninit long God oltaim. Olsem na taim ol tingting nogut i kirap insait long bel bilong yumi, orait wantu tasol yumi mas singaut long Maria, na askim em long helpim yumi! Sapos yumi no singaut long em hariap,

orait ol dispela tingting nogut bai i kamap bikpela moa yet na bai i mekim yumi i pundaun long sin.

Olsem na yumi ol Katolik i no ken pret tumas long ol birua bilong sol bilong yumi! Nogat tru! Yumi gat wanpela Helpim i save daunim na bagarapim Satan, ol amamas bilong dispela graun na tu ol laik nogut bilong bodi bilong yumi!

Maria em i redi oltaim bilong helpim yumi olsem wanpela ami i redi long pait! Strong bilong em i winim tru strong bilong ol birua bilong yumi! Olsem na oltaim yumi mas kolim nem bilong em, bai em i ken helpim yumi long winim ol birua i laik pulim yumi i go long hel. Na long strong bilong em, orait yumi bai inap long winim ol birua na i stap gut!

Kwin bilong ol ensel

(Queen of angels)

Nau yumi kolim Maria em i «Kwin bilong ol ensel», na em i tru, long wanem God yet i bin makim Maria bilong kamap Kwin bilong heven na graun.

Pastaim yumi mas tok olsem Jisas em i King bilong olgeta samting. Jisas em i King bilong heven na bilong graun. Jisas i bosim olgeta samting, long wanem em i God tru, olsem na olgeta samting i kamap long han bilong em tasol. Long bigin tru bilong Buk Baibel yumi ritim olsem: *Bipo bipo tru God i mekim kamap skai na graun na olgeta samting i stap long em* (Stat 1:1). Na i no God Papa tasol i mekim olgeta samting i kamap. Nogat. Taim Buk Baibel i tok «*God i mekim kamap skai na graun*» em i tok long God Papa, God Pikinini na God Holi Spirit. God Triwan i mekim olgeta samting i kamap!

Jisas yet i tok klia olsem em yet em i King. Gutnius bilong santu Jon i tok: *Na Pailat i askim em [Jisas]: «Olsem na i tru yu wanpela king, a?»*. Na Jisas i bekim tok olsem: **«Dispela tok bilong king, em tok bilong yu yet.** Mama i karim mi na mi kam long dispela graun bilong mekim wanpela wok tasol, em bilong autim tok tru, bai olgeta manmeri i ken harim. Na olgeta man i bihainim tok tru, ol i save harim tok bilong mi» (Jon 18:37). Olsem na Jisas yet i tok klia olsem: **«Mi yet mi king!»**.

Orait olsem wanem na yumi kolim Maria em i «Kwin bilong ol ensel»? Yumi givim dispela nem long Maria long wanem Maria em i mama bilong Jisas, na Jisas em King, olsem na Maria em i Kwin. Maria i go pas long ol samting bilong heven na graun. Na ol samting bilong heven em ol ensel na ol santu. Long sait bilong Maria olsem Kwin bilong ol santu yumi bai i toktok bihain, tasol nau yumi toktok liklik long Maria olsem Kwin bilong ol ensel.

Ol ensel long Buk Baibel

Ol ensel ol i wanem samting? Ol ensel em ol spirit i save mekim wok bilong God oltaim. Dispela wod «ensel» i kam long Tok Gris na i min «spirit i save bringim tok bilong God». Ol ensel i gat planti wok long mekim, tasol yumi toktok liklik long 3-pela wok bilong ol.

1) Ol ensel i save bringim ol tok bilong God

Dispela em i namba wan wok bilong ol ensel. Ol ensel i save bringim ol tok bilong God. Long Nupela Testamen i gat eksampel bilong ol ensel i bringim tok long Sekaraia, long santu Maria na long santu Josep.

Ensel i bringim tok long Sekaraia: *Orait na wanpela ensel bilong Bikpela i kamap long Sekaraia na... i tokim em olsem: «Sekaraia, yu no ken pret. God i harim pinis prea bilong yu. Meri bilong yu Elisabet bai i karim pikinini man. Na yu mas kolim nem bilong em Jon» (Luk 1:11-13).*

Ensel i bringim tok long Maria: *Long namba 6 mun bilong Elisabet i gat bel, God i salim ensel Gebriel i go long [...] wanpela yangpela meri... Nem bilong dispela yangpela meri em Maria. Orait Gebriel i go long em na i tok olsem: «Ave, Maria! Yu pulap long grasia!... Yu bai kisim bel na karim wanpela pikinini man. Na yu mas kolim nem bilong em Jisas...» (Luk 1:26-31).*

Ensel i bringim tok long santu Josep: *Long driman wanpela ensel bilong Bikpela i kamap long em [Josep]. Ensel i tok olsem: «Josep, yu man bilong lain bilong Devit, yu no ken pret long kisim Maria olsem meri bilong yu. Harim. Dispela pikinini i stap long bel bilong em, em Holi Spirit i bin givim long em» (Matyu 1:20).*

Na i gat planti arapela eksampel tu bilong ol ensel i bringim tok long santu Pita, long santu Pol na long ol arapela aposel tu!

2) Ol ensel i save mekim wok bilong helpim God

Dispela em i namba tu wok bilong ol ensel. Ol ensel ol i olsem wokman bilong God, olsem na ol i save mekim wok bilong helpim em oltaim. Long Buk bilong Revelesen santu Jon i tok: *Orait, mi lukluk gen, na mi harim maus bilong planti ensel moa. Namba bilong ol i olsem planti handet milion, na planti tausen tausen moa. Ol i sanap raunim sia king* (Revelesen 5:11). Ol ensel i raunim sia king bilong Jisas oltaim na mekim wok bilong helpim em long san na long nait.

3) Ol ensel i save lukautim yumi

Dispela em i namba 3 wok bilong ol ensel. God yet i bin makim ol ensel bilong was long yumi na lukautim yumi. Ol ensel i save was long yumi long taim mama i karim yumi inap long taim yumi dai. Long Buk bilong Tobit i gat tok olsem: *God i salim ensel Rafael i kam bilong helpim Tobit na Sara* (Tobit 3:15). Na tu em i tok: «*God wantaim gutpela ensel bilong em i ken was long yupela na i ken bringim yutupela i kam bek orait gen*» (Tobit 5:16).

Olsem na yumi olgeta i gat wanpela wasensel i save i stap klostu long yumi oltaim, maski ai bilong yumi i no inap lukim em. Long san na long nait wasensel bilong yumi i stap klostu long yumi na i wok bilong helpim yumi. Olsem na em i gutpela long yumi beten olgeta de long em, na askim em long helpim yumi.

Na tu yumi mas tenkim em, long wanem oltaim em i save was long yumi na helpim yumi long abrusim ol samting nogut, maski yumi no luksave long wok em i save mekim!

Santu Maria em i Kwin bilong ol ensel

Sapos yumi tok olsem Jisas em i King na Maria em i Kwin, orait yumi mas tok tu olsem Maria em i Kwin bilong ol ensel. Na as bilong dispela samting em i olsem: **Maria em i Mama bilong God**. Dispela pasin bilong i stap Mama bilong God i givim olgeta namba na ona long santu Maria!

God yet i bin kamapim ol ensel, na Maria i karim God, olsem na Maria i winim ol ensel! Olsem na ol ensel i stap aninit long Maria, na ol i amamas long harim ol tok bilong em.

Ol ensel i amamas tumas long taim santu Maria i karim Jisas! Taim Maria i karim Jisas planti ensel i kamap na singsing amamas! Buk Baibel i tok: *Wantu planti ensel moa bilong ami bilong heven i kamap na i stap wantaim dispela ensel. Na ol i litimapim nem bilong God olsem: «Litimapim nem bilong God i save stap antap tru. Na long graun ol manmeri i ken stap bel isi. God i belgut long ol»* (Luk 2:13-14).

Olsem na Maria em Kwin bilong ol ensel long wanem em i karim Jisas, na Jisas em i God tru. God yet i kamap man na i kam long graun, na dispela samting i kamap long wanem Maria

i tok «Yesa» long Ensel Gebriel. Olsem na ol ensel i amamas long luksave olsem Maria em i Kwin bilong ol, long wanem pikinini bilong Maria yet i bin kamapim ol ensel!

Kwin bilong ol Tumbuna bilong Israel

(Queen of Patriarchs)

Nau yumi kolim Maria em i «Kwin bilong ol Tumbuna bilong Israel». Pastaim em i gutpela long yumi save long mining bilong dispela tok «Tumbuna bilong Israel». Long Tok Inglis yumi save kolim ol «*Patriarchs*».

Ol Tumbuna bilong Israel

Ol Tumbuna bilong Israel, ol i husat tru? Yumi givim dispela nem «*Patriarchs*» o «Tumbuna bilong Israel» long sampela santu bilong Olpela Testamen God yet i bin makim ol bilong kamap hetman bilong Israel. Ol Tumbuna bilong Israel em ol

man i bin bilip long God wantaim olgeta strong bilong ol, olsem na God yet i bin promisim ol olsem Mesaia bai i kam. Ol Tumbuna bilong Israel i sanap olsem wanpela wasman i givim strong na lait long ol pipel bilong Israel, na ol i strongim ol pipel bilong Israel long bihainim God na long wetim Mesaia bai i kam.

Na tu i gat wanpela bikpela samting yumi no ken lustingting long em: **ol Tumbuna bilong Israel em ol piksa bilong Jisas yet!** Taim yumi ritim Olpela Testamen, yumi bai i luksave olsem pasin bilong ol Tumbuna bilong Israel i kamap olsem piksa na tok profet bilong ol pasin bilong Jisas! Olsem na nau yumi toktok liklik long sampela tumbuna bilong Israel.

- **Noa em i Tumbuna bilong Israel.** Buk Baibel i stori olsem graun i pulap long planti pasin nogut, olsem na God i tok: *«Bai mi pinisim olgeta manmeri mi bin wokim, maski ol i stap long wanem hap. Na bai mi pinisim tu olgeta pisin na olgeta animal bilong ples na olgeta animal bilong bus. Mi yet mi bin wokim ol dispela samting, tasol mi ting i gutpela sapos mi no bin wokim ol»* (Stat 6:7). **Tasol Bikpela i amamas long Noa,** olsem na em i askim Noa long wokim wanpela sip. Na taim sip i redi, orait Bikpela i salim traipela ren i kam long graun, olsem na bikpela tait i kamap, na olgeta manmeri nogut i dai. Olsem na God i givim wok long Noa long kamapim planti pikinini gen, bai dispela graun i ken pulap gen long planti man na meri!

- **Abraham em i Tumbuna bilong Israel.** Yumi save pinis long bikpela bilip bilong em, na tu yumi save pinis olsem Abraham em i man bilong bihainim tok bilong God oltaim. Em i no tubel long taim God i askim em long kilim pikinini bilong em Aisak i dai, long wanem em i trastim God wantaim olgeta strong bilong em. Na taim God i lukim bikpela bilip bilong Abraham, orait God i tokim em olsem: *«Mi Bikpela, mi tok tru tumas long nem bilong mi yet olsem. Yu gat dispela wanpela pikinini tasol na yu no bin pasim em. Olsem na bai mi mekim gut tru long yu. Na bai mi mekim ol lain tumbuna pikinini bilong yu i kamap planti tru olsem ol sta bilong skai na olsem wesan bilong nambis»* (Stat 22:16-17). **Olsem na God i blesim bilip bilong Abraham wantaim bikpela promis!** God i tokim Abraham olsem wanpela tumbuna bilong Abraham bai i kamap Sevia na Ridima bilong ol manmeri!

- **Moses em i Tumbuna bilong Israel.** God yet i bin makim Moses bilong mekim ol Israel i lusim kantri Isip na kamap fri. God yet i bin promisim Moses olsem ol Israel bai i kam bek long kantri Israel, long wanem God yet i makim ol bilong kamap pipel bilong em stret. Buk Baibel i stori long yumi long ol mirakel God i bin mekim long han bilong Moses, long wanem God i laikim em tumas. **Na Buk Baibel i tok tu olsem Moses em i trupela pren bilong God:** *Bikpela i save toktok wantaim Moses olsem man i save toktok wantaim pren bilong em* (Eksodas 33:1).

Olsem na ol Tumbuna bilong Israel em ol pren bilong God i bin bihainim oltaim laik bilong em. Ol Tumbuna bilong Israel i bilip long God oltaim, olsem na God yet i bin amamas long ol na blesim ol wantaim planti grasia. Ol Tumbuna bilong Israel i kamap olsem eksampel bilong yumi, bai yumi tu i ken bihainim ol gutpela pasin bilong ol.

*Santu Maria em i Kwin
bilong ol Tumbuna bilong Israel*

Long dispela litani yumi kolim Maria em i «Kwin bilong ol Tumbuna bilong Israel». Orait olsem wanem na yumi givim dispela nem long Maria?

Santu Maria i winim Noa! Noa i bin winim traipela tait na em i mekim planti pikinini i kamap. Tasol Maria i winim sin bilong Adam na Iv, na pikinini bilong em em i Jisas yet! Noa i no winim sin, na ol pikinini bilong em em ol manmeri bilong sin, wankain olsem yumi. Tasol Maria i winim strong bilong sin na pikinini bilong em em God yet i kam i stap namel long yumi!

Santu Maria i winim Abraham! Abraham i bilip long God na God i promisim em olsem planti pikinini bai i kamap long lain bilong em. Tasol bilip bilong Maria i winim tru bilip bilong Abraham, na God yet i promisim em olsem em bai i karim

Pikinini bilong God yet! Ensel i tokim Maria olsem: «*Olsem na dispela pikinini bihain bai yu karim, em bai i stap gutpela na stretpela man bilong God, na ol bai i kolim em Pikinini Bilong God*» (Luk 1:35).

Santu Maria i winim Moses! Moses i wokman bilong God, na em i toktok wantaim God olsem man i save toktok wantaim pren bilong em. Tasol Maria em i Mama bilong God, na taim Maria i toktok wantaim Jisas, orait Maria i toktok olsem wanpela mama i save toktok wantaim pikinini bilong em. Taim santu Maria i toktok long Jisas, orait em i lukim God yet long ai bilong em! Na pasin bilong i stap Mama bilong God i winim tru pasin bilong i stap wokman bilong God!

Olsem na long dispela as tasol yumi kolim Maria em i «Kwin bilong ol Tumbuna bilong Israel». Bilip bilong Maria i winim tru bilip bilong ol Tumbuna bilong Israel! Pasin bilong Maria i winim tru pasin bilong ol Tumbuna bilong Israel! Laik bilong Maria i go long God i winim tru laik bilong Tumbuna bilong Israel! Maria em i trupela Mama bilong God, na dispela nem i winim olgeta nem bilong heven na graun!

Kwin bilong ol profet

(Queen of Prophets)

Nau yumi kolim Maria em i «Kwin bilong ol profet». Dispela litani i gat bikpela mining bilong em, na mining bilong em bai i helpim yumi long save gut long santu Maria em i wanem kain meri, long wanem Maria em i no wanpela meri nating. Nogat tru. Long Olpela Testamen i gat planti tok profet i toktok long Maria, na ol profet bilong bipo i save pinis long mama bilong Mesaia em bai i olsem wanem.

Ol profet long Buk Baibel

Pastaim yumi mas toktok liklik long ol profet. **Ol profet em ol man God yet i bin makim bilong autim tok bilong God.** Long Olpela Testamen God yet i bin makim sampela man bilong

makim maus bilong em, na bilong autim tok bilong God long olgeta manmeri. Olsem na nambawan wok bilong ol profet em i wok bilong makim maus bilong God. Na tu sampela taim God i bin givim save long ol long ol samting bai i kamap bihain! Olsem na planti taim ol profet i toktok tu long ol samting bai i kamap bihain, bai ol lain bilong Israel i ken redim ol yet gut. Ol profet i toktok planti long Mesaia bai i kam, olsem na ol i strongim ol Israel long stretim ol pasin nogut bilong ol, long wanem Mesaia i mas kam long graun bilong kisim bek ol manmeri.

Jisas em i as bilong olgeta tok profet bilong Buk Baibel. Ol profet i bin toktok long Jisas, tasol ol i bin autim planti tok piksa, olsem na sampela taim yumi painim hat long kisim as bilong ol tok bilong ol. Tasol Jisas i tok olsem ol profet i toktok long em yet. Taim Jisas i wokabaut wantaim tupela disaipel i go long Emeus, Buk Baibel i tok: *Na [Jisas] em i autim tok long tupela. **Em i stat long tok bilong Moses na bilong olgeta profet, na em i skulim tupela long as bilong olgeta hap bilong buk bilong God i toktok long em yet*** (Luk 24:27).

Olsem na long ol buk bilong ol profet i gat planti tok bilong ol samting bilong Jisas. **Maski Jisas i no bin kam yet long graun, ol profet i save pinis long em!** Ol profet i toktok pinis long Mesaia bai i kamap long ples Betlehem, ol i tok pinis olsem mama bilong em bai i stap virgo, na tu ol i toktok planti long sait bilong Pen na Indai na Kirap bek bilong em.

Ol buk bilong ol profet i stap long Buk Baibel bilong yumi, olsem na em i gutpela long yumi ritim na kisim save long ol skul bilong ol. Na sapos sampela taim yumi painim hat long kisim as bilong wanpela tok bilong ol, orait em i gutpela long yumi askim long ol pris long helpim yumi.

Santu Maria em i Kwin bilong ol profet

Olsem wanem na yumi kolim Maria em i «Kwin bilong ol profet»?

1) Maria em i «Kwin bilong ol profet» long wanem olgeta tok profet i kamap ples klia long taim em i karim Jisas

Taim Maria i tok «Yesa» long Ensel Gabriel, orait olgeta tok profet bilong Olpela Testamen i kamap tru! Dispela Mesaia ol profet i bin toktok long em, i bin i stap 9-pela mun olgeta insait long bel bilong Maria! Ol profet bilong bipo i no bin lukim Jisas long ai bilong ol, tasol Maria i karim em long bel bilong em, na bihain em i karim em long ples Betlehem. Dispela Mesaia ol profet i bin toktok long em, i bin i stap long han bilong Maria, na Maria i bin givim susu long em, na Maria i bin lukautim em olsem wanpela mama i save lukautim pikinini bilong em. Olsem na long dispela as tasol yumi kolim Maria em i «Kwin bilong ol profet», long wanem em i winim tru ol profet bilong bipo! Ol profet i toktok planti long Mesaia, tasol Maria i karim Mesaia long bel bilong em!

2) Maria em i «Kwin bilong ol profet» long wanem ol profet i bin toktok long em tu

Ol profet i no bin toktok long Jisas tasol. Nogat. Ol profet i bin toktok long Maria tu. Tasol planti taim ol profet i bin yusim planti tok piksa, olsem na yumi painim hat long painimaut mining bilong ol hap tok i toktok long Maria.

I gat planti tok profet long Olpela Testamen i toktok long Maria, tasol yumi no laik pulim tok tumas, olsem na yumi bai i toktok liklik long wanpela tasol. Yumi lukim dispela bikpela tok profet i stap long Buk bilong Aisaia long sapta 7. Profet Aisaia i tok: *«Bai Bikpela yet i soim wanpela mak long yu. Dispela mak i olsem. Wanpela virgo i gat bel, na bai em i karim wanpela pikinini man na kolim nem bilong em Emanuel»* (Aisaia 7:14). O bikpela tok profet tumas! Long Buk Baibel long Tok Pisin ol i tanim kranki dispela hap tok bilong Aisaia, olsem na planti manmeri i paul liklik! Trupela tok profet bilong Aisaia long Tok Hibru i tok: *«...wanpela **virgo** i gat bel...»*, tasol ol manmeri i bin tanim Buk Baibel long Tok Pisin i bin raitim: *«...wanpela **yangpela meri** i gat bel...»*. Tasol Profet Aisaia i no toktok long wanpela *«yangpela meri»*. Nogat tru. Em i toktok long wanpela *«**virgo**»*!

Orait nau yumi skelim liklik dispela tok bilong Aisaia. Em i tok klia tupela samting:

- Profet Aisaia i tok klia olsem wanpela virgo bai i kisim bel. Dispela virgo em i husat? Dispela virgo em i santu Maria tasol!

I no gat narapela meri long graun i bin i stap virgo na kisim bel. Nogat tru! Maria tasol inapim dispela tok profet bilong Aisaia, long wanem Maria wanpela tasol i bin i stap virgo na kisim bel long Holi Spirit!

2) Profet Aisaia i tok olsem pikinini bilong dispela virgo em i God yet. Profet i tok olsem nem bilong pikinini bai Emanuel, na mining bilong nem Emanuel long Tok Hibru em i olsem: **«God i stap wantaim yumi».**

Olsem na profet Aisaia i tok profet long santu Maria! Em i tok klia olsem God bai i kam i stap wantaim yumi, na mama bilong em bai i stap virgo!

Long Olpela Testamen i gat planti tok profet moa long sait bilong santu Maria, tasol yumi no laik pulim toktok tumas nau.

Olsem na yumi ol Katolik i amamas long kolim Maria em i «Kwin bilong ol profet»! Olgeta tok profet bilong Olpela Testamen i kamap ples klia long Jisas, na Maria i bin karim Jisas! Ol profet bilong bipo i no inap lukim Jisas long ai bilong ol, tasol Maria i bin karim Jisas long bel bilong em! Ol profet bilong bipo i autim tok profet bilong Maria tu, long wanem ol i tok klia olsem mama bilong Mesaia bai i stap virgo na em bai i karim Pikinini bilong God yet!

Kwin bilong ol Aposel

(Queen of Apostles)

Nau yumi kolim Maria em i «Kwin bilong ol Aposel». Pastaim yumi mas toktok liklik long mining bilong dispela tok «aposel». «Aposel» em i wanpela wod i kam long Tok Gris, na i min «man ol i bin salim bilong mekim wok». Na long Katolik Sios yumi yusim dispela nem «aposel» bilong makim ol man na meri i save go nabaut na autim Tok bilong God long olgeta manmeri.

Yumi mas save tu olsem insait long Katolik Sios i gat 3-pela kain aposel:

1) Ol 12-Aposel bilong Jisas. Em ol 12-pela man Jisas yet i bin makim bilong i stap wantaim em. Jisas i bin makim ol olsem bisop na pos bilong Katolik Sios, na bilip bilong Katolik Sios i kam long ol yet. Na namel long ol Aposel Jisas i makim Pita

bilong go pas long ol. Olsem na sapos yumi aninit long ol Aposel na long santu Pita, orait yumi i stap long trupela Sios bilong Jisas. Na nau ol bisop i kisim ples bilong ol Aposel, na Papa Santu i kisim ples bilong santu Pita. Olsem na sapos yumi aninit long ol bisop na long Papa Santu, orait yumi i stap long Sios Jisas yet i bin kamapim.

2) Ol arapela man o meri i givim laip bilong ol bilong mekim wok aposel. Long Katolik Sios i gat planti tausen man na meri (olsem bisop, pater, sista, brata) i save givim laip bilong ol bilong mekim wok bilong Jisas, olsem na ol i kamap misinari. Ol i bin lusim kantri bilong ol, na famili na ol pren, na ol i bin go long ol longwe ples na kantri bilong autim Tok bilong God. Long ol dispela lain yumi tu i kolim ol «aposel».

3) Olgeta Katolik manmeri i save mekim wok aposel. Planti gutpela man na meri i save helpim ol misinari long mekim wok aposel insait long ol ples na taun. Em ol man na meri i save wok hat bilong mekim ol arapela long save long Jisas. Insait long ol peris bilong yumi i gat kain kain grup i save helpim ol pris long mekim wok aposel, kain olsem Lijen bilong Maria, o Sande Skul, o Divain Mersi, o ol Katolik Mama na ol Katolik Papa. Olsem na long ol dispela manmeri yumi tu i kolim ol «aposel», long wanem ol i save helpim ol pris long mekim wok aposel.

Maria em i Kwin bilong Aposel

Orait yumi kolim Maria em i «Kwin bilong ol Aposel» long wanem em i go pas na i winim tru ol Aposel! Olsem wanem na Maria i go pas long ol Aposel? Maria i go pas long ol Aposel long wanem em i mama bilong Jisas, na pasin bilong i stap mama i winim tru pasin bilong i stap Aposel! Pawa bilong Maria i winim tru pawa bilong ol Aposel! Bilip bilong Maria i winim tru bilip bilong ol Aposel!

1) Maria em i mama bilong Jisas

Dispela em i nambawan as bilong yumi i kolim Maria em i «Kwin bilong ol Aposel». Ol 12-pela Aposel em ol pren bilong Jisas, na ol i wok olsem wokman bilong Jisas. Ol Aposel i save harim tok bilong Jisas oltaim, na ol i save mekim ol samting olsem Jisas i tok. Ol i bin i stap 3-pela yia tasol wantaim Jisas, na ol i bin witnesim ol mirakel na ol skul bilong em.

Tasol Maria em i narakain tru! Maria i no wanpela pren bilong Jisas. Nogat. Maria em i mama bilong Jisas, na pasin bilong i stap mama i winim tru pasin bilong i stap pren! Na tu Maria i no bin i stap 3-pela yia tasol wantaim Jisas. Nogat! Maria i bin karim Jisas long bel bilong em, na em i bin i stap 33 yia wantaim Jisas! Long taim Maria i karim Jisas inap long taim Jisas i go bek long heven, orait oltaim Maria i bin i stap wantaim em.

Olsem na i no gat wanpela man i ken save long Jisas olsem Maria!

2) Pawa bilong Maria i winim pawa bilong ol Aposel

Long Gutnius i gat planti stori bilong Jisas na ol Aposel, na planti taim ol Aposel i askim Jisas long mekim wanpela samting, tasol Jisas i no save bihainim laik bilong ol. Na sampela taim Jisas yet i save stretim toktok na tingting bilong ol Aposel, long wanem ol i askim Jisas long mekim ol samting i no stret. Long Gutnius i gat stori bilong Pita, i askim Jisas long abrusim Pen na Indai bilong em, na Jisas i toktok strong long Pita. Na tu i gat stori bilong Jems na Jon i askim Jisas long bagarapim wanpela taun, long wanem dispela taun i bin les long Jisas, tasol Jisas i toktok strong long ol, na em i no mekim olsem ol i bin tok.

Tasol Maria em i narakain tru! Buk Baibel yet i stori long yumi olsem Jisas i wokim namba wan mirakel bilong em long wanem em i laik inapim laik bilong Maria. Long kaikai bilong marit long ples Kana Maria i toktok long Jisas, na wantu Jisas i harim tok bilong mama bilong em! Maski Jisas yet i tokim mama olsem taim bilong wokim ol mirakel i no bin kamap yet, Jisas i no laik sakim tok bilong mama, olsem na Jisas i hariapim dispela taim na i wokim namba wan mirakel bilong em bilong givim amamas bilong mama! Olsem na pawa bilong Maria i winim tru pawa bilong ol Aposel!

3) Bilip bilong Maria i winim bilip bilong ol Aposel

Gutnius yet i stori long yumi olsem planti taim bilip bilong ol Aposel i slek, na ol i tubel. Long taim bilong Pen na Indai bilong Jisas, orait ol Aposel i ranawe na i larim Jisas i stap wanpis tasol. Jon tasol i sanap strong long bilip bilong em na i bihainim Jisas. Ol arapela Aposel i bin ranawe. Na taim Jisas i kirap bek long indai, orait ol Aposel tu i no bilip na ol i tubel. Ol i bilip tasol taim ol i lukim Jisas long ai bilong ol.

Tasol Maria em i narakain tru! Long taim Ensel Gebriel i bringim tok long Maria inap long Asensen bilong Jisas, oltaim Maria i bin bilipim olgeta tok bilong God. I no gat wanpela taim Maria i bin tubel. Nogat tru! Maria em i meri bilong strongpela bilip, olsem na em i no tubel taim em i lukim Jisas i dai long diwai kros. Maria i bilip strong olsem Jisas bai i winim indai na em bai i kirap bek, olsem na maski em i pilim bikpela sori long pikinini bilong em i dai long diwai kros, insait long bel bilong em, em i save pinis olsem Jisas bai i winim strong bilong indai!

Olsem na yumi amamas long kolim Maria em i «Kwin bilong ol Aposel» long wanem em i winim ol! Laikim pasin bilong Maria i winim laikim pasin bilong ol Aposel! Bilip bilong Maria i winim bilip bilong ol Aposel! Pawa bilong Maria i winim pawa bilong ol Aposel! Grasia bilong Maria i winim grasia bilong ol Aposel! Na ol Aposel yet i luksave olsem Maria i winim ol na i

go pas long ol, olsem na taim Jisas i go bek long heven, orait ol Aposel i amamas long bung wantaim em. Buk Baibel i tok: *Orait ol aposel i lusim dispela maunten ol i kolim Oliv, na ol i go bek long Jerusalem... Ol i go insait long taun, na ol i go long dispela rum antap ol i save stap long em... Olgeta dispela man i stap wanbel na ol i save bung na beten. Na ol meri, **na Maria, em mama bilong Jisas**, na ol brata bilong Jisas, ol tu i save kam na beten wantaim ol* (Wok Aposel 1:12-14).

Kwin bilong ol martir

(Queen of Martyrs)

Nau yumi kolim Maria em i «Kwin bilong ol martir», na em i tru, long wanem God yet i bin makim Maria olsem Kwin bilong olgeta samting bilong heven na bilong graun.

Pastaim yumi mas toktok liklik long dispela wod «martir». «Martir» em i wanpela wod i kam long Tok Gris, na i min «witnes». **Katolik Sios i save givim dispela namba long ol man na meri i bin kapsaitim blut bilong ol bilong givim witnes long Jisas.** Long taim bilong Jisas i kam inap nau planti tausen man na meri na pikinini i bin dai bilong givim witnes long Jisas, olsem na Katolik Sios i save kolim ol «martir». Ol martir i bin karim bikpela pen long bodi bilong ol inap long ol i dai, olsem na ol i kamap eksampel long yumi olgeta i mas redi oltaim long karim pen bilong givim witnes long bilip bilong yumi. Yumi no

ken sem long Jisas o givim baksait long em. Nogat tru! Ol martir i sanap olsem pos i givim lait long yumi olgeta, bai yumi no ken lustingting olsem yumi tu i mas redi long karim pen long nem bilong Krai.

Santu Maria em i Kwin bilong ol martir

Orait olsem wanem na yumi kolim Maria em i «Kwin bilong ol martir»? **Yumi givim dispela nem long Maria long wanem pen bilong em i winim tru pen bilong ol martir!** Yes, maski Maria em i mama bilong God, em i bin karim planti pen long laip bilong em! God i no banisim Maria long karim pen. Nogat tru. God i banisim Maria long sin, tasol em i no banisim Maria long karim pen. Olsem na Maria i karim bikpela pen tumas long laip bilong em.

Long Buk Baibel i gat tok profet bilong Jeremaia i skulim yumi long pen bilong Maria. Profet i tok: *«Yupela, ol manmeri i wokabaut long ol rot klostu long mi. Lukim, mi karim bikpela pen... Ating bipo i no gat man i bin karim dispela kain pen»* (Krai 1:12). Ol santu na saveman bilong Sios i tok olsem dispela tok profet bilong Jeremaia i kamap ples klia taim Maria i bungim Jisas long rot i go long Kalvari. Maria i karim bikpela pen tumas, olsem na em i askim ol manmeri i wokabaut long rot klostu long em long sori long em. Na tu dispela tok profet bilong Jeremaia i kamap ples klia taim lapun Simeon i kisim bebi Jisas long han

bilong em na i tokim Maria olsem: «***Yu bai i pilim olsem wanpela bainat i sutim lewa bilong yu tu***» (Luk 2:35).

Maria i bin karim planti pen long laip bilong em. Yumi save pinis long ol 7-pela sori bilong santu Maria, olsem na nau yumi no inap toktok long ol. Yumi kolim ol tasol, nogut yumi lustingting: **1)** Tok profet bilong Simeon. **2)** Holi Famili i mas ranawe na i go long Isip. **3)** Pikinini Jisas i lus long tempel. **4)** Maria i bungim Jisas long rot i go log Kalvari. **5)** Jisas i dai long diwai kros. **6)** Ol i sutim sait bilong Jisas na ol i lusim em long diwai kros. **7)** Ol i putim Jisas long matmat.

Planti ol santu i tok olsem maski Maria i no bin kapsaitim blut bilong em, pen bilong em i winim tru pen bilong ol martir. Wanpela santu i tok: «Pen Maria i bin karim long laip bilong em, em i bikpela olsem solwara, na i no gat wanpela man o meri i ken save gut long em».

Pen bilong santu Maria long indai bilong Jisas

Yumi no inap toktok long olgeta pen na sori bilong santu Maria, tasol em i gutpela long yumi toktok liklik long pen em i bin karim taim Jisas i dai long diwai kros, long wanem dispela pen i winim tru ol arapela!

Santu Jon i tok olsem: ***Mama bilong Jisas... i sanap i stap klostu long diwai kros bilong Jisas*** (Jon 19:25). Nau yumi mas

tingting long Maria i sanap aninit long diwai kros, na yumi mas luksave olsem pen bilong em i winim pen bilong olgeta manmeri bilong dispela graun. Na dispela pen na sori em i namba 5 bainat i sutim lewa bilong Maria.

Taim Jisas i kam kamap long Kalvari, bodi bilong em i bagarap olgeta na i bruk nabaut. Ol soldia i bin rausim ol klos bilong em na nilim tupela han na tupela lek bilong em long diwai kros. Na taim ol i nilim Jisas pinis, ol soldia i bin apim dispela diwai kros i go antap, na lusim em i hangamap inap long taim em i dai.

Taim Jisas i hangamap i stap, ol soldia na ol Juda i go bek pinis long haus bilong ol. Wok bilong ol i pinis nau, olsem na ol i go na lusim Jisas wanpela tasol i hangamap long diwai kros. Tasol Maria nogat. Maria i no lusim Jisas. Maria i sanap aninit long diwai kros, na em i wet inap long pikinini bilong em i pulim las win na i dai. Wanpela de santu Maria i kamap long santu Brigit na i tokim em olsem: «Taim pikinini bilong mi i hangamap long diwai kros, mi no lusim em. Mi sanap klostu long em». Na santu Bonaventura i tokim Maria olsem: «Olsem wanem na yu laik lukim pikinini bilong yu i dai long Kalvari? Ating dispela pen na sori i no bikpela tumas bai yu ken lukim em? Yu lukim pikinini bilong yu i karim pen, na yu tu i bin karim pen wantaim em. Pikinini bilong yu em i God tru, olsem na yu lukim God yet i hangamap long diwai

kros! Tasol lewa bilong yu i no tingting long pen na sori bilong yu yet. Nogat. Yu tingting long pikinini bilong yu tasol, olsem na yu no laik lusim em. Na long dispela as tasol yu laik i stap wantaim em inap long em i dai. Maski yu no inap long helpim em liklik, yu laik i stap tasol». Na narapela santu i tok olsem: «O gutpela mama, yu pulap long laikim pasin! Yu no laik lusim pikinini bilong yu i stap wanpis long diwai kros! Tasol taim Jisas i hangamap long diwai kros em i painim hat long kisim win, na yu tu i bin painim hat long kisim win, long wanem sori bilong yu i bikpela tumas!». Na santu Maria i tokim santu Brigit moa olsem: «Taim pikinini bilong mi i hangamap long diwai kros em i karim bikpela pen tumas. Na i no gat wanpela man o meri i ken toktok long pen pikinini bilong mi i bin kisim. Tupela ai bilong em i pulap long blut na i luk olsem ai bilong wanpela daiman, wasket bilong em i bruk nabaut, maus bilong em i op liklik, gras bilong em i pas long blut, het bilong em i daun liklik na i lukluk long bros bilong em, tupela han na lek bilong em i no gat strong na i luk olsem ol bun i drai pinis, na olgeta hap bodi bilong em i pulap long blut na ol bikpela sua».

Santu Jerom i tok olsem olgeta pen bilong Jisas i kamap pen bilong Maria tu. Olgeta sua i stap long bodi bilong Jisas i bin stap long lewa bilong Maria tu. Sapos yumi inap long go long Kalvari, yumi bai i painim tupela alta na tupela sakrifais: wanpela

alta em i bodi bilong Jisas, na narapela alta em i lewa bilong Maria. Tasol santu Bonaventura i tok olsem Maria tupela Jisas i bin mekim wanpela alta tasol, na dispela alta em i diwai kros bilong Jisas. Long wanem long diwai kros Jisas tupela Maria i bin karim pen na i bin ofarim ol yet. Na santu Ogastin i tok: «Ol nil i bin nilim Jisas na Maria wantaim long diwai kros. Taim ol nil i sutim Jisas, i luk olsem ol i sutim mama bilong em tu». Na santu Bernard i tok: «Ol nil i bin sutim han na lek bilong Jisas, tasol ol dispela nil i bin sutim lewa bilong Maria tu wantaim».

Olsem na taim yumi kolim Maria em i «Kwin bilong ol martir» yumi no ken lustingting long pen bilong em! Pen bilong santu Maria i winim tru pen bilong ol martir, olsem na Maria i kamap Kwin bilong ol. Taim Jisas i dai long diwai kros, olgeta pen bilong Jisas i kalap long Maria, na Maria i pilim ol dispela pen long lewa bilong em. **Maski bodi bilong Maria i stap orait, lewa bilong Maria i bruk olgeta wankain olsem bodi bilong Jisas.** Olsem na em i gutpela na i stret long yumi tingim oltaim ol pen na sori bilong Maria, na yumi tok tenkyu long em! Maria i bin givim Jisas long diwai kros bilong kisim bek yumi! Pen bilong Maria tu i helpim yumi long i stap wanbel wantaim God!

*Kwin bilong ol santu
i kisim hevi long bilip bilong ol*

(Queen of Confessors)

Long dispela litani yumi kolim Maria em i «Kwin bilong ol santu i kisim hevi long bilip bilong ol». Pastaim yumi bin tok olsem Maria em i «Kwin bilong ol martir», na yumi tok olsem dispela wod «martir» i min «witnes». Nau yumi tok olsem **Maria em i Kwin bilong ol santu i bin karim pen bilong givim witnes long Jisas, tasol ol i no bin dai olsem martir.**

Long Katolik Sios i gat planti tausen santu: planti man, na planti meri. Planti pikinini, na planti lapun, na planti yut. Planti martir, na planti virgo. Planti pris na bisop, na planti sista na brata. Planti maritman na planti maritmeri. Orait long dispela litani yumi laik tingim ol santu i bin kisim hevi long bilip bilong

ol, tasol ol i no bin dai olsem martir. Long dispela litani yumi laik tingim ol gutpela manmeri i bin karim pen bilong soim bilip bilong ol na bilong givim witnes long Jisas.

*Karim pen long bilip
em i bikpela samting long ai bilong Jisas*

I no isi long bihainin Jisas. Nogat. Jisas i no promisim yumi olsem em bai i isi long i stap gutpela Kristen. Jisas i tokim yumi olsem yumi mas redi oltaim long karim pen, na yumi mas redi oltaim long karim diwai kros bilong yumi. Em i tok: «***Man i no karim diwai kros bilong em na bihainim mi, em i no inap i stap pren bilong mi. Man i ting em i mekim laip bilong em yet i kamap gutpela, laip bilong em bai i lus. Tasol man i ting long mi na i lusim laip bilong em, em bai i kisim laip tru***» (Matyu 10:38-39).

Sapos yumi laik i stap pren bilong Jisas, orait oltaim yumi mas redi long karim pen wantaim em. Jisas yet i tok olsem yumi mas daunim yumi yet oltaim, long wanem sapos yumi laik holimpas laip bilong yumi, orait sol bilong yumi bai i lus long hel. Jisas i tok klia olsem: «***Sapos wanpela man i laik bihainim mi, orait em i mas daunim laik bilong em yet, na em i mas karim diwai kros bilong em na bihainim mi. Long wanem, sapos wanpela man i laik holimpas laip bilong em yet, laip bilong em bai i lus.***»

Tasol sapos wanpela man i ting long mi na i lusim laip bilong em, em bai i kisim laip bilong em» (Matyu 16:24-25).

Olsem na sapos yumi laik go long heven, orait yumi mas sanap strong long bilip bilong yumi, na yumi no ken givim baksait long Jisas o sem long bilip bilong yumi. Nogat. Sapos yumi karim pen wantaim Jisas, orait em i promisim yumi olsem em bai i kisim yumi i go long heven! Olsem na ol gutpela manmeri bai i kisim bikpela pe long heven!

Jisas i tok moa olsem: *Sapos ol i lukim yupela i stap long lain bilong mi, na ol i tok nogut long yupela na ol i mekim nogut long yupela na sutim kain kain tok giaman long yupela, orait yupela i ken amamas. **Yupela i ken belgut na amamas tru, long wanem, bikpela pe i wetim yupela long heven*** (Matyu 5:11-12). Planti taim tumas Jisas i tok olsem yumi mas sanap strong long bilip bilong yumi. Na yumi mas sanap strong, long wanem yumi mas pas wantaim Jisas na soim bilip bilong yumi long ples klia. Yumi no ken pret long soim bilip bilong yumi. Nogat. Yumi no ken sem long soim olsem yumi Katolik na yumi laik bihainim Jisas. Na sapos bilip bilong yumi i mekim planti manmeri i belnogut long yumi, orait yumi mas amamas tasol! Yumi no ken pret o tingting planti! Nogat! Yumi save olsem bikpela pe i wetim yumi long heven!

Long Buk Baibel i gat planti eksampel bilong ol manmeri i bin karim pen long bilip bilong ol. Santu Pol i tok: *Planti taim*

ol man i bin putim mi long kalabus na ol i paitim mi planti taim moa yet... Planti taim klostu mi dai. Ol Juda i bin paitim mi 39 taim long wip, na dispela samting i kamap long mi inap 5-pela taim olgeta. Tripela taim mi kisim kanda. Wanpela taim ol i tromoi ston long mi. Tripela taim sip mi stap long em, em i bagarap, na wanpela nait na wanpela san mi trip i stap long solwara. Planti taim mi wokabaut i go long ol longwe ples, na mi laik lus long wara, na mi laik bagarap long han bilong ol stilman i save pulim samting bilong ol man i wokabaut long rot. Ol wantok bilong mi yet ol i laik bagarapim mi, na ol man bilong ol arapela lain tu ol i laik bagarapim mi. Klostu mi laik bagarap long taim mi stap long ol taun, na long taim mi stap long graun i no gat man. Klostu mi laik lus long solwara. Na klostu mi laik bagarap long han bilong ol giaman brata. Mi bin mekim ol kain kain wok i hat tru. Planti taim mi wok nait na mi no slip. Mi stap hangre, na mi dai long wara. Planti taim mi lusim kaikai. Planti taim kol i bagarapim mi na mi no gat saket samting bilong karamapim skin bilong mi. Na mi inap tok long planti arapela hevi tu i bin kamap long mi (2 Korin 11:23-28).

Olsem na sapos yumi kisim hevi long bilip bilong yumi, orait yumi mas amamas, long wanem dispela pen em i mak bilong yumi i bihainim Jisas gut! Ol santu i bin kisim hevi long bilip bilong ol, olsem na yumi mas wokabaut long lek mak bilong ol, na amamas tasol!

Maria em i «Kwin bilong ol santu i kisim hevi long bilip bilong ol», long wanem em i bin kisim bikpela pen long laip bilong em. Long taim Jisas em i liklik bebi inap long taim em i go bek long heven, oltaim planti birua i bin laik long mekim nogut long Jisas. Na oltaim Maria i bin lukautim Jisas na karim pen wantaim em. Pen bilong Maria i winim tru pen long ol arapela santu!

Olsem na taim yumi karim pen o hevi long bilip bilong yumi, orait yumi mas askim santu Maria long helpim yumi. Em i redi oltaim long strongim yumi, bai yumi no ken pret long soim pasin Katolik oltaim. Maria i amamas tasol long harim ol singaut bilong yumi, olsem na oltaim yumi mas kolim nem bilong em! Em yet i bin givim strong long ol santu, olsem na em bai i givim strong long yumi tu!

Kwin bilong ol virgo

(Queen of Virgins)

Pastaim yumi bin kolim Maria «Santu Virgo, yu go pas long lain bilong ol virgo». Na yumi bin tok olsem Maria i go pas long ol virgo, long wanem Maria em i virgo na mama. Maria i no virgo tasol. Nogat. Maria em virgo, tasol em i mama tu, long wanem em i bin karim wanpela pikinini. Olsem na yumi tok olsem Maria i winim tru ol virgo, long wanem em i stap virgo tasol em i bin karim wanpela pikinini tu!

Nau yumi kolim Maria em i «Kwin bilong ol virgo». Na as bilong dispela litani em i olsem: **Maria em i Kwin bilong ol manmeri i save bihainim klinpela pasin na i stap virgo.** Planti tausen man na meri i save i stap virgo, long wanem ol i laik bihainim Jisas gut, na Jisas yet i bin i stap virgo. Planti tausen man na meri i bin tok «nogat» long marit, olsem na ol i no laik

kisim man o meri, na ol i laik givim sol na bodi bilong ol long Jisas. Ol pris, ol sista na ol brata i bin mekim dispela promis long God! Olsem na Maria em i Kwin bilong ol!

Na Maria em i «Kwin bilong ol virgo» long 4-pela as:

1) Maria em i namba wan meri i bin mekim promis long i stap virgo

Maria em i «Kwin bilong ol virgo» long wanem em i namba wan meri i bin mekim promis long God long em i laik i stap virgo. Long Olpela Testamen ol meri i save kisim man na marit, long wanem ol manmeri i tok olsem ol pikinini em ol blesing bilong God. Olsem na sapos wanpela man o meri i no gat pikinini, orait ol i tok olsem God i no save blesim dispela man o meri. Olsem na long Olpela Testamen i no gat wanpela man o meri i bin mekim promis long i stap virgo! Ol i tingting olsem pasin bilong i stap virgo em i wanpela samting nogut, long wanem ol virgo i pasim God long blesim ol wantaim ol pikinini.

Tasol Maria em i narakain tru, olsem na em i laik givim bodi bilong em tu long God. Olsem na taim Maria em i yangpela gel yet, em i bin mekim promis long i stap virgo. Stori bilong dispela promis i no i stap long Buk Baibel, tasol em i kam long Tradisen bilong Katolik Sios. Maria i laikim God tumas, olsem na em i no laik givim lewa na bodi bilong em long wanpela man.

Na long dispela as tasol Maria i bin mekim promis long em i laik i stap virgo, bai bodi, lewa na sol bilong Maria i ken i stap samting bilong God tasol. Na santu Josep i wanbel long dispela promis bilong Maria, olsem na taim tupela i marit, orait tupela wantaim i bin bihainim pasin bilong i stap virgo.

2) Maria em i virgo na mama

Maria em i «Kwin bilong ol virgo» long wanem em i virgo na mama. Maria i no virgo tasol. Nogat. Maria em i virgo oltaim, tasol em i bin karim wanpela pikinini tu. Tasol dispela pikinini i kamap long bel bilong Maria long strong bilong Holi Spirit tasol, olsem na em i no lusim pasin virgo bilong em. I no gat narapela man o meri i bin i stap virgo na i bin kisim bel. Nogat olgeta! Dispela em i wanpela bikpela mirakel God yet i bin mekim long Maria, olsem na pasin virgo bilong Maria i winim tru pasin virgo bilong ol arapela santu! Maria em i trupela mama bilong Jisas, tasol em i virgo oltaim!

3) Klinpela pasin bilong Maria i winim tru klinpela pasin bilong ol arapela virgo

Maria em i «Kwin bilong ol virgo» long wanem klinpela pasin bilong em i winim tru klinpela pasin bilong ol arapela virgo. Ol virgo i save bihainim klinpela pasin, na ol i save wok hat bilong winim ol traिम bilong Satan na ol laik nogut bilong

bodi bilong ol. Tasol Maria i winim ol virgo, long wanem Buk Baibel i tok olsem Maria i bin krungutim het bilong Satan! Olsem na Satan i no bin traim Maria, na bodi bilong Maria i no pulap long ol laik nogut! Nogat tru! Maria em i Mama bilong God, olsem na God yet i bin banisim Maria bai Satan i no ken traim em, na tu bai em i no ken pilim ol laik nogut bilong bodi! Olsem na klinpela pasin bilong Maria em i stret olgeta, na i winim tru ol arapela virgo!

4) Maria i save strongim ol virgo

Maria em i «Kwin bilong ol virgo» long wanem em i save strongim ol manmeri i laik i stap virgo. Pasin bilong i stap virgo i no isi, long wanem Satan i save traim yumi, na tu ol laik nogut bilong yumi i laik pulim yumi long mekim sin. Olsem na planti taim i no isi, na ol virgo i save painim hat long bihainim dispela pasin. Tasol Maria i winim Satan na i winim tu ol laik nogut bilong bodi, olsem na em i strong tumas inap long helpim ol virgo! Sapos wanpela virgo i painim hat long bihainim klinpela pasin, orait em i mas singaut long Maria, na wantu Maria bai i strongim em!

Sapos yumi ritim ol buk ol virgo i bin raitim, orait yumi bai i painim olsem ol i bin kisim strong long taim ol i beten long santu Maria. Olsem na oltaim yumi mas askim Maria long strongim yumi, bai yumi tu i ken i stap klin long ai bilong God.

Yumi mas amamas long kolim Maria em i «Kwin bilong ol virgo»! Maria i go pas long ol manmeri i laik givim bodi na sol bilong ol long God! Maria i save strongim ol oltam, bai ol i ken bihainim gut ol promis ol i bin mekim long God! Na sapos yumi pundaun long sin na yumi mekim sin i doti long ai bilong God, orait wantu yumi mas sori na konpes, na God bai i pogivim yumi na amamas gen long yumi!

Kwin bilong ol santu

(Queen of all saints)

Pastaim yumi bin tok olsem Maria em i «Kwin bilong ol ensel», «Kwin bilong ol Tumbuna bilong Israel», «Kwin bilong ol martir», «Kwin bilong ol manmeri i kisim hevi long bilip bilong ol» na «Kwin bilong ol virgo». Olsem na nau yumi amamas long kolim Maria em i «Kwin bilong ol santu». Na em i tru, long wanem Maria i go pas long ol santu, na Maria em i wanpela eksampel God yet i bin makim bilong soim rot bilong i go long heven long yumi.

Na as bilong dispela litani em i olsem:

1) Maria i pulap long grasia

Maria em i «Kwin bilong ol santu» long wanem em i pulap long grasia. **Grasia bilong God tasol i save mekim ol manmeri**

i kamap santu. Grasia bilong God em i as bilong olgeta pasin i holi. Sapos yumi no gat grasia bilong God insait long sol bilong orait, orait yumi no inap long mekim wanpela pasin i holi.

Na Buk Baibel yet i tok olsem Maria i pulap long grasia! Taim Ensel Gebriel i bringim tok long Maria, em i tok: «*Ave, Maria! Yu pulap long grasia!*» (Luk 1:28). Olsem na sapos Maria i pulap long grasia, orait yumi mas tok tu olsem Maria i pulap long olgeta pasin i holi. Long dispela graun i no gat wanpela man o meri i pulap long grasia. Nogat. Maria tasol i pulap long grasia. Maski yumi wok hat bilong kamap santu, planti taim yumi save mekim sin tu, olsem na grasia bilong God i no pulap long sol bilong yumi. Tasol Maria em i Klin Olgeta na em i no bin mekim wanpela sin long laip bilong em, olsem na em i pulap long grasia na em i pulap tu long olgeta gutpela pasin! Na long dispela as tasol yumi kolim em i «Kwin bilong ol santu», long wanem grasia bilong Maria i winim tru grasia bilong ol santu.

2) Maria i save tilim ol grasia

God yet i bin makim Maria bilong kamap namelmeri namel long yumi na Jisas. Stori bilong dispela samting i stap long sapta 2 bilong Gutnius bilong santu Jon, taim Maria i askim Jisas long wokim namba wan mirakel bilong em. **Stori bilong dispela mirakel i soim klia olsem Maria i save sanap namel long Jisas**

na ol manmeri i sot long ol samting. Olsem na ol santu na saveman bilong Sios i save tok olsem God yet i bin putim olgeta grasia long han bilong Maria, bai Maria yet i tilim long yumi. **Olgeta grasia i kam long han bilong God tasol, tasol God yet i bin putim olgeta grasia long han bilong Maria.** God yet em i as na papa bilong olgeta grasia na blesing, tasol em i makim Maria bilong tilim ol grasia na blesing long yumi. Olsem na long dispela as yumi kolim Maria em i «Kwin bilong ol santu».

3) Maria em i eksampel bilong ol gutpela pasin

Maria em i «Kwin bilong ol santu» long wanem olgeta pasin bilong em i stret olgeta long ai bilong God, olsem na yumi mas bihainim ol lek mak bilong em. Long ol arapela sapta yumi toktok pinis long daunpasin bilong Maria, na tu long klinpela pasin bilong em na long bikpela laik bilong em i go long God na long ol manmeri. Olsem na i no gat wanpela santu i ken winim Maria long mekim gutpela pasin. Nogat tru. Maria i go pas long ol santu, na ol santu i amamas tru long bihainim ol gutpela pasin bilong em.

4) Maria i save helpim ol manmeri long kamap santu

Maria em i «Kwin bilong ol santu» long wanem em i save helpim ol manmeri long bihainim gutpela pasin na kamap santu. Sapos yumi ritim ol buk bilong ol santu, orait yumi bai

i luksave olsem oltaim ol santu i bin beten long Maria. Ol santu em ol man na meri wankain olsem yumi, olsem na planti taim ol tu i bin pundaun long sin, na planti taim ol tu i bin painim hat long bihainim laik bilong God. Tasol ol santu i bin askim santu Maria long helpim ol, na Maria i bin harim ol singaut bilong ol. Sapos yumi beten long Maria, orait em bai i kam na helpim yumi long wokabaut long gutpela rot na i go long heven.

Maria em i «Kwin bilong ol santu»! Maria i go pas long ol santu bilong heven, na oltaim em i save soim rot bilong kamap santu long yumi! Sapos yumi bihainim ol gutpela pasin bilong em, orait laip bilong yumi bai i senis tru! Olsem na oltaim yumi mas beten long santu Maria, long wanem em i gat bikpela laik long helpim yumi long kamap santu na go long heven!

*Kwin i no gat sin
bilong Adam na Iv*

(Queen conceived without original sin)

Long bigin bilong dispela buk yumi bin toktok long litani i kolim Maria em i «Mama Imakulata». Olsem na em i gutpela long yumi ritim gen dispela sapta. Long wanem taim yumi tok Maria em i «Mama Imakulata» na Maria em i «Kwin i no gat sin bilong Adam na Iv» em i wankain samting tasol! Dispela litani em i bikpela samting tru, na em i save givim bikpela amamas long santu Maria, long wanem God yet i bin mekim na santu Maria i no gat sin bilong Adam na Iv.

Sin bilong Adam na Iv long Buk Baibel

Stori bilong sin bilong Adam na Iv i stap long Buk bilong Stat (o Jenesis). Buk Baibel i tok olsem God i bin kamapim Adam na Iv, na putim tupela long paradais. Na God i tokim tupela olsem oltaim ol i mas harim tok bilong em. Tasol Satan i traim Adam na Iv, na tupela i sakim tok bilong God na i mekim sin. Olsem na God i no amamas long pasin bilong tupela, na rausim tupela long paradais. Na long dispela taim stret sol bilong tupela i kamap doti na **tudak bilong sin i kam insait long graun**, long wanem ol i bin mekim sin. Na sin bilong Adam na Iv i kam inap nau, long wanem yumi olgeta i kam long lain bilong Adam na Iv. Olsem na olgeta manmeri bilong graun i gat dispela sin long sol bilong ol. Profet Devit i tok: *[Bikpela] Yu save pinis, taim mama i karim mi, mi kamap man bilong mekim pasin nogut. **Taim mi stap yet long bel bilong mama, mi man bilong mekim sin*** (Buk Song 51:5).

Na sin bilong Adam na Iv em i as bilong olgeta sin na as bilong olgeta samting nogut i kamap long dispela graun. Santu Pol i tok: *Yumi save, wanpela man i bin mekim sin, na long dispela pasin sin i kamap long graun. Na sin i bringim dai i kam. Na dai i kisim olgeta man, long wanem, olgeta man i bin mekim sin* (Rom 5:12).

Tasol God i laikim yumi tumas, olsem na em i givim sakramen bilong baptais long yumi, bai wara bilong baptais wantaim strong bilong Holi Spirit i ken tekewe dispela sin. Olsem na taim

wanpela man o meri i kisim baptais, God i tekewe sin bilong Adam na Iv long sol bilong dispela man o meri!

Maria i no gat sin bilong Adam na Iv

Planti manmeri bilong ol arapela lotu i save kirap nogut tru taim ol i harim olsem yumi ol Katolik i tok olsem Maria i no gat sin bilong Adam na Iv. Ol i save sutim spia long Maria, na ol i tok olsem Maria em i wanpela meri nating wankain olsem ol meri bilong graun. Olsem na ol i save tok olsem Maria tu i gat sin. Tasol dispela toktok em i rong olgeta, na em i olsem wanpela tok nogut long Maria.

Long **sapta 3 Buk bilong Stat** i tok klia olsem wanpela meri i bin krungutim het bilong Satan, na ol saveman bilong Sios i tok olsem dispela meri Buk Baibel i tok long em, em i piksa bilong santu Maria. Santu Maria i krungutim tru het bilong Satan, olsem na Satan i no inap mekim wanpela samting nogut long em. Maski Satan i mekim yumi olgeta i kamap man na meri bilong sin, em i no inap bagarapim santu Maria. God yet i mekim na em i banisim santu Maria long sin bilong Adam na Iv.

Long bipo tru i kam inap nau ol santu na ol saveman bilong Sios i bin tok olsem **strong bilong Maria i winim tru strong bilong Satan, olsem na Satan i no inap bagarapim Maria long sin**. Olsem na long dispela as tasol long de 8 bilong mun

Disemba bilong yia 1854, Papa Santu Pius namba 9 i raitim wanpela pas i go long olgeta Katolik manmeri bilong olgeta hap bilong graun, na em i mekim strongpela tok olsem:

«Yumi ol Katolik manmeri i bilip olsem Santu Maria Virgo i no gat sin bilong Adam na Iv. Long taim em i kamap long bel bilong mama bilong em, God I Antap Tru i bin banisim em long dispela sin, olsem na Maria em i Klin Olgeta. Long strong bilong God tasol Maria i klin olgeta na i no gat wanpela sin long em. Pen na Indai bilong Jisas em i as bilong dispela bikpela mirakel, long wanem Pen na Indai bilong Jisas i winim strong bilong sin na strong bilong Satan. Olsem na God yet i bin mekim Maria i stap klin oltaim, na God yet i bin mekim sol bilong Maria i abrusim sin bilong Adam na Iv. Olsem na olgeta Katolik manmeri i mas sanap strong long dispela bilip, long wanem dispela bilip i kam long Buk Baibel yet».

Olsem na yumi ol Katolik i mas sanap strong long bilip bilong yumi na tokaut olsem Maria em i Klin Olgeta! Maria i no gat sin bilong Adam na Iv! Maria em i dispela meri i krungutim het bilong Satan! Strong bilong Maria i winim tru strong bilong Satan! God i laikim mama bilong em tumas, olsem na God yet i bin banisim Maria long olgeta sin!

Kwin i go bek long heven

(Queen assumed into heaven)

Nau yumi kolim Maria em i «Kwin i go bek long heven». Dispela litani i min olsem: **taim wokabaut bilong Maria i pinis hia long graun, orait God i kisim em i go long heven.** Olsem na Maria i stap long heven wantaim bodi na sol bilong em, wankain olsem Jisas. Na dispela em i wanpela bikpela presen God yet i bin givim long Maria, long wanem Maria em i Mama bilong God, na God i no laik long mama bilong em i bagarap long matmat. **God yet i bin i stap 9-mun olgeta long bel bilong Maria,** olsem na i no gutpela long bodi bilong Maria i bagarap long matmat. Nogat tru. Olsem na olgeta yia long Ogas 15 yumi ol Katolik i selebretim Bikpela Pestode bilong Maria i go bek long heven, o Asunsio.

Asunsio bilong Maria long Buk Baibel

Planti manmeri bilong ol arapela lotu i save sutim spia long santu Maria, long wanem ol i tok olsem yumi ol Katolik i bilipim planti stori bilong santu Maria, tasol ol dispela stori i no i stap long Buk Baibel. Olsem na planti taim ol i save tok olsem yumi ol Katolik i mas yusim yusim Buk Baibel tasol. Tasol dispela toktok bilong ol i kranks olgeta, long wanem yumi ol Katolik tu i save yusim Buk Baibel. Yumi no ken lustingting olsem ol bikpela saveman bilong Buk Baibel em ol Katolik tasol. Na olgeta skul bilong Katolik Sios i kam long Buk Baibel, long wanem Katolik Sios tasol i gat rait long skulim long as bilong olgeta tok i stap long Buk Baibel.

Orait na Buk Baibel i tok wanem long sait bilong Asunsio bilong Maria? Long Buk Baibel i gat 2-pela hap tok i save helpim yumi long toktok long Asunsio bilong Maria.

1) Namba wan hap bilong Buk Baibel i kam long Buk bilong Stat

Long sapta 3 God yet i toktok long wanpela meri i karim wanpela pikinini, na tupela i krungutim het bilong Satan. I no pikinini tasol i krungutim het bilong Satan. Nogat. Meri tu i krungutim het bilong Satan. Na Satan em i as bilong sin na as bilong indai. Olsem na sapos dispela meri i krungutim het

bilong Satan, i min olsem dispela meri i winim Satan, olsem na **dispela meri i winim tu strong bilong sin na strong bilong indai**. Dispela meri em i Maria tasol, na long dispela as tasol strong bilong sin na strong bilong indai i no bin bagarapim em. Nogat. Maria i winim sin na i winim indai, olsem na long dispela as tasol yumi ol Katolik i tok olsem Maria em i Klin Olgeta na i go bek long heven!

2) Namba tu hap bilong Buk Baibel i stap long pas bilong santu Pol i go long ol Rom

Em i tok: *Yumi save, wanpela man i bin mekim sin, na long dispela pasin sin i kamap long graun. Na sin i bringim dai i kam. Na dai i kisim olgeta man, long wanem, olgeta man i bin mekim sin* (Rom 5:12). Santu Pol i tok klia olsem indai i kam long graun, long wanem Adam na Iv i bin mekim sin. Olsem na yumi olgeta i mas i dai, long wanem mama i karim yumi wantaim dispela sin. **Tasol Maria i no gat sin bilong Adam na Iv, olsem na em i no sapos long i stap long matmat olsem ol manmeri bilong sin**. Nogat! Maria i no sapos long bagarap long matmat wankain olsem ol manmeri bilong sin. Yumi no ken lustingting olsem indai i kam long sin, olsem na sapos Maria i no gat sin, orait em inap long abrusim matmat tu. Olsem na long dispela as tasol yumi ol Katolik i tok olsem God i no larim bodi bilong mama bilong em i bagarap long matmat. Nogat tru! Taim Maria

i lusim laip bilong em, orait God i kirapim em na kisim em i go bek long heven!

Na i gat tu planti arapela hap tok bilong Buk Baibel i ken helpim yumi long kisim as bilong Asunsio bilong Maria, tasol yumi no laik pulim toktok nau. Dispela tupela hap i gat bikpela skul bilong ol, na yumi ol Katolik i mas tingim tupela oltaim!

Asunsio bilong Maria long bilip bilong Katolik Sios

Long bipo tru i kam inap nau, oltaim ol Katolik manmeri bilong olgeta hap bilong graun i bilip olsem: **taim wokabaut bilong Maria i pinis hia long graun, orait God i kisim em i go long heven.** Tradisen bilong Katolik Sios i kam long bipo tru i sanap strong long dispela bilip, na i no gat wanpela taim Katolik Sios i bin skulim narapela samting. Nogat tru. Dispela bilip i kam long taim bilong ol Aposel yet!

Oltaim Katolik Sios i bin tokaut klia long Asunsio bilong Maria, tasol sampela manmeri i tubel liklik, olsem na sampela yia i go pinis olgeta bisop bilong olgeta hap bilong graun i wanbel, na ol i raitim planti tausen pas i go long Papa Santu, bilong askim em long tokaut klia long dispela bilip. Olsem na long de 1 bilong mun Novemba bilong yia 1950 Papa Santu Pius namba 12 i tokaut klia olsem:

«Mi bin beten planti long God, bai em i ken pulapim mi long save bilong em yet. Olsem na nau mi laik givim ona long God Papa, long God Pikinini na long God Holi Spirit. Na mi tokaut klia olsem: God yet i bin givim santu Maria Virgo long Jisas, bai Maria i karim em. Jisas em i King bilong Oltaim na King bilong olgeta samting. Jisas i winim strong bilong sin na strong bilong indai, long wanem em i bagarapim Satan na em i kirap bek long indai. Na Jisas i laikim tumas mama bilong em, olsem na God tu i mekim na Maria i winim strong bilong Satan na strong bilong sin. Olsem na mi, Papa Santu, wantaim namba bilong mi i kam long Aposel Pita na Pol, i tokaut olsem: **taim wokabaut bilong Maria Imakulata i Virgo Oltaim i pinis hia long graun, orait God i kisim em i go long heven wantaim bodi na sol**».

Dispela em i Katolik bilip bilong yumi! Maria i go bek long heven! God yet i givim dispela bikpela presen long em, long wanem Maria em i Mama bilong God, olsem na God i laik banisim em long matmat! God yet i mekim na Maria i go bek long heven wantaim bodi na sol bilong em! God yet i helpim Maria long abrusim strong bilong indai! **Pastaim God i bin banisim Maria long sin, orait nau God i banisim Maria long indai.** God yet i mekim na Maria i stap pinis long heven!

Kwin bilong Rosari

(Queen of the most holy Rosary)

Long dispela litani yumi kolim Maria em i «Kwin bilong Rosari». Yumi olgeta i save Rosari em i wanem samting, tasol i no yumi olgeta i save gut long stori bilong Rosari i kamap olsem wanem. Olsem na long dispela sapta yumi bai i toktok liklik long Rosari.

Pastaim yumi mas tok olsem dispela Prea Rosari em i nambawan prea bilong santu Maria, long wanem santu Maria yet i bin kamapim dispela prea! Prea Rosari i no kam long tingting bilong wanpela man o meri. Nogat. Prea Rosari i kam long tingting bilong santu Maria yet, long wanem em yet i kamapim dispela prea! Nau yumi bai i toktok liklik long stori bilong Prea Rosari, na yumi bai i kirap nogut tru long harim Prea Rosari i kamap olsem wanem.

Stori bilong Rosari

Long bigin bilong yia 1200 planti tausen manmeri i lusim Katolik bilip bilong ol, na ol i joinim wanpela lotu i save rabisim bilip bilong yumi. Ol manmeri bilong dispela lotu i save tok olsem Katolik Sios em i samting nating, na ol i save egensim olgeta tok bilong Buk Baibel na bilong Papa Santu. Ol i tok olsem Jisas em i wanpela ensel, na ol i no bilip olsem Jisas em i wanpela trupela man. Na tu ol i bilip olsem hel em i no trupela samting na em i wanpela giaman bilong Katolik Sios. Ol i bilip long heven tasol, olsem na planti manmeri bilong dispela lotu i save kilim ol yet, long wanem ol i laik go hariap long heven.

Olsem na God i kamapim wanpela bikpela santu bilong bekim olgeta toktok bilong ol, na dispela santu em i santu Dominik. Santu Dominik i bin wok planti yia bilong helpim ol dispela manmeri long tanim bel na long kam bek long Katolik Sios, tasol wok aposel bilong em i no bin karim planti kaikai hariap. Olsem na wanpela de santu Dominik i wok long tingting planti na em i bel hevi, long wanem em i skelim olsem i no planti manmeri i save harim tok bilong em. Olsem na taim em i bel hevi na i tingting planti, orait bikpela mirakel i kamap! Santu Maria yet i kamap long em! Santu Maria i givim wanpela korona long Dominik, na i tokim em olsem: **«Dominik, yu mas lainim ol manmeri long beten Rosari. Rosari bilong mi bai i**

helpim wok aposel bilong yu long karim planti kaikai. Rosari em i strong tumas olsem klos bilong pait, na em bai i pinisim dispela lotu nogut i wok long bagarapim tingting bilong planti manmeri». Na santu Maria yet i skulim Dominik long rot bilong beten Rosari. Na i no longtaim planti bilong ol dispela manmeri nogut i wok long tanim bel na kam bek long Katolik Sios, inap long dispela lotu bilong ol i pinis olgeta na trupela bilip bilong Katolik Sios i win gen!

Ol promis bilong Rosari

Taim santu Maria i givim korona long santu Dominik, orait santu Maria yet i mekim 15-pela promis long ol manmeri i save beten Rosari olgeta de. **Ol dispela promis i kam long maus bilong santu Maria yet, olsem na yumi mas putim yau na tingim gut oltaim!** Santu Maria i tok:

- 1) Ol manmeri i save beten Holi Rosari bai i kisim ol spesel grasia.
- 2) Mi promisim spesel proteksen bilong mi na planti bikpela grasia long ol manmeri i save beten Holi Rosari.
- 3) Holi Rosari bai i kamap olsem klos bilong pait bilong winim strong bilong hel. Rosari bai i pinisim ol pasin nogut, na em bai i helpim ol man na meri long lusim sin,

na tu em bai i pinisim ol giaman tok i laik bagarapim Katolik bilip.

4) Holu Rosari bai i mekim ol gutpela pasin i kamap bikpela moa yet na i karim planti gutpela kaikai. Rosari bai i helpim ol manmeri long kisim marimari bilong God. Em bai i helpim ol manmeri long lustingting long amamas bilong dispela graun, na helpim ol long laikim ol samting i stap antap long heven.

5) Man o meri i save beten korona, em bai i no lus olgeta.

6) Man o meri i save beten korona, em bai i no bungim taim nogut long laip bilong em. God bai i no jasim em olsem strongpela jas. Sapos em i save beten olgeta de, orait em bai i no lusim grasia bilong God, na olsem em bai i go long heven.

7) Ol husat i beten korona bai i no sot long ol sakramen bilong Sios long taim bilong indai.

8) Ol husat i save beten korona taim ol i stap laip yet na taim ol i dai, ol bai i kisim lait na grasia bilong God.

9) Bai mi rausim hariap long klinpaia ol manmeri i save beten korona.

10) Ol husat i save beten korona bai i stap antap tru long heven.

11) Olgeta samting yu askim long mi taim yu beten korona, bai i mi givim long yu.

12) Ol husat i save mekim wok aposel na tokim ol narapela long beten korona, bai mi helpim ol long taim ol i sot long sampela samting.

13) Pikinini bilong mi Jisas i tokim mi olsem, olgeta santu na ensel bilong heven bai i sanap long kot wantaim ol manmeri i save beten korona, na ol bai i helpim dispela man o meri long winim kot.

14) Ol man na meri i save beten korona, em ol i pikinini tru bilong mi, na brata na susa bilong Jisas.

15) Pasin bilong beten korona em i mak i soim olsem yu bai i go long heven.

Olsem na oltaim yumi mas beten Rosari! Em bai gutpela long yumi beten Rosari olgeta de, long wanem santu Maria i bin mekim planti promis long ol manmeri i save beten Rosari olgeta de! Em i promisim yumi olsem em bai i helpim yumi long winim kot bilong God na go long heven! Em i promisim yumi olsem yumi bai inap long kisim ol sakramen na redim yumi yet gut long indai! Em i promisim yumi olsem em bai i rausim yumi long purgatori hariap! Em i promisim yumi em bai i givim planti grasia long yumi!

Oltaim yumi mas kolim Maria em i «Kwin bilong Rosari», na oltaim yumi mas painim taim na givim 15-pela minit tasol long Maria na beten Rosari. Rosari em i nambawan beten bilong santu Maria, long wanem santu Maria yet i bin kamapim dispela beten!

Kwin bilong ol famili

(Queen of families)

Dispela litani i kam long tingting bilong Pop santu Jon Pol namba 2. Long yia 1995 Papa Santu Jon Pol namba 2 i tok olsem yumi mas kolim Maria em i «Kwin bilong ol famili», olsem na em i putim dispela litani wantaim ol arapela litani i kam long bipo tru.

Olsem wanem na yumi kolim Maria em i «Kwin bilong ol famili»? Yumi givim dispela nem long Maria, long wanem em i save gut long famili em i wanem samting. Maria em i wanpela marit meri, na man bilong em, em santu Josep. Maria i bin karim wanpela pikinini tu, em Jisas, Sevia bilong yumi. Na Maria i bin i stap wantaim man bilong em na pikinini bilong em long haus bilong Nasaret klostu 30-pela yia olgeta! Olsem na Maria i save gut long wok insait long famili, na em i gutpela

meri bilong santu Josep na gutpela mama bilong Jisas. Maria i save long olgeta hevi na wari bilong ol mama, long wanem laip bilong Holi Famili i no isi.

Olsem nau yumi laik toktok liklik long ol gutpela eksampel Holi Famili i save givim long ol mama, long ol papa, na long ol pikinini.

1) Santu Maria em i eksampel bilong ol mama

Maria i go pas long olgeta mama bilong dispela graun. Maria i save pinis olsem wok bilong ol mama i no isi. Em yet i bin kisim planti hevi! Buk Baibel yet i stori long yumi olsem Maria em i wanpela tarangu, olsem na em i karim pikinini bilong em insait long wanpela groto na i slipim em long bokis kaikai bilong bulmakau. Gutnius i stori tu long santu Maria i mas ranawe na i go long Isip, long wanem King Herot i laik kilim pikinini Jisas i dai. Na taim Holi Famili i kam bek long Nasaret, orait ol i bin i stap long wanpela liklik haus, na ol i bin sot long planti samting. Santu Josep i wok olsem kamda, na planti taim em i sot long ol kastama, olsem na Holi Famili i sot long ol samting.

Tasol Maria i no save komplein. Nogat. Oltaim em i save mekim gut long man bilong em, long wanem em i save olsem man bilong em i save wok hat. Maria em i no wanpela meri i save raun nabaut long ples na sindaun nating na gosip wantaim ol arapela meri. Nogat olgeta. Na Maria i save lukautim gut

pikinini Jisas, na maski ol i no gat planti mani, oltaim Maria i bin mekim Jisas i stap gut. Pasin bilong Maria em i stret olgeta, olsem na ol meri i mas bihainim ol pasin bilong em.

2) Santu Josep em i eksampel bilong ol papa

Santu Josep em i eksampel bilong ol papa i ken bihainim. Insait long laip bilong santu Josep i gat 3-pela pasin em i save bihainim oltaim: **1)** Em i save bihainim ol 10-pela mandato bilong God. **2)** Em i save wok hat olsem kamda. **3)** Em i save mekim gut long meri na pikinini bilong em.

Tasol namel long yumi planti taim i save kamap olsem ol papa i no save rispektim ol meri bilong ol, olsem na ol papa i save toknogutim na paitim ol meri. Na planti taim ol papa i save krosim nating ol pikinini tu. Na tu sampela taim ol papa i save raun raun planti tumas na kain kain rabis tingting i save kirap insait long bel bilong ol.

Orait famili bilong Maria em i narakain olgeta! Man bilong em, santu Josep, i bin rispektim Maria oltaim! Santu Josep em i wanpela gutpela man i save wok na mekim gut long meri na pikinini bilong em! Insait long Holi Famili i no gat kros, long wanem Maria na Josep i save laikim God tru na tupela i save bihainim gut ol 10-pela mandato bilong God. Olsem na em bai i gutpela long ol papa i skelim pasin bilong santu Josep insait long Holi Famili, na wok hat bilong bihainim em.

3) Pikinini Jisas em i eksampel bilong ol pikinini

Pikinini Jisas i mas kamap eksampel bilong ol pikinini bilong graun. Buk Baibel yet i tok olsem oltaim Jisas i save harim tok bilong papamama bilong em, na Jisas i save mekim santu Maria na santu Josep i amamas tasol long pasin bilong em. Maski Jisas em i God tru, em i daunim em yet na bihainim laik bilong papamama bilong em oltaim.

Oltaim ol pikinini i mas tingim olsem i gat 3-pela pasin Jisas i save laikim tumas: **1) Pasin bilong beten na lotu. 2) Pasin bilong harim tok bilong papamama. 3) Klinpela pasin na abrusim ol sin i doti long ai bilong God.**

Santu Teresia bilong Kalkata i tok: **«Sapos papamama i save beten olgeta de wantaim ol pikinini bilong ol, orait dispela famili bai i stap strong na bai i no gat wanpela samting i ken bagarapim em»**. Olsem na oltaim ol papamama i mas beten wantaim ol pikinini bilong ol. Ol papamama i mas go pas na soim gutpela eksampel long ol pikinini, nogut ol pikinini i lainim ol samting nogut na sol bilong ol i lus. Ol papamama i mas sindaun gut oltaim, na ol i mas tok sori wanpela narapela long taim bilong hevi. Ol pikinini i mas harim tok bilong papamama bilong ol na rispektim ol. Olsem na sapos yumi mekim ol dispela samting, orait santu Maria bai i kamap Kwin bilong famili bilong yumi!

Kwin bilong bel isi

(Queen of peace)

Dispela em i las litani bilong santu Maria. Yumi amamas tru long kolim Maria em i «Kwin bilong bel isi». Dispela litani i kam long tingting bilong Pop Benedik namba 15, long wanem em yet i kamapim dispela litani na putim i go insait long lain bilong ol litani i kam long bipo tru. Na bilong kisim save long mining bilong dispela litani, em bai i gutpela long yumi save long stori bilong dispela litani i kamap olsem wanem.

Stori bilong dispela litani

Namel long yia 1914 na 1918 wanpela bikpela woa i kamap long graun. Planti kantri bilong graun i wok long pait namel long ol yet, na planti milion manmeri i lusim laip bilong ol.

Olsem na Papa Santu Benedik namba 15 i wari tumas na em i askim God long pinisim dispela woa hariap. Na long de 30 bilong mun Novemba bilong yia 1915 em i salim wanpela pas i go long olgeta bisop bilong graun, na em i askim ol Katolik manmeri long beten long santu Maria, bai dispela woa i ken pinis hariap. Olsem na ol Katolik manmeri bilong olgeta hap bilong graun i bungim maus, na ol i beten long Maria, long wanem Maria em i «Kwin bilong bel isi». I no longtaim Maria i soim bikipela strong bilong em, na em i senisim tingting bilong ol manmeri i bin kamapim dispela woa, olsem na woa i pinis. Maria i soim bikipela pawa bilong em, na em i mekim olgeta manmeri i stap gut gen!

Maria em i «Kwin bilong bel isi»

Olsem wanem na yumi kolim Maria em «Kwin bilong bel isi»? **Yumi givim dispela nem long Maria long wanem Maria em i mama bilong Jisas, na Jisas em i as na papa bilong gutpela taim na bel isi.**

Taim Maria i karim Jisas, ol ensel i singsing amamas olsem: «*Litimapim nem bilong God i save stap antap tru. Na long graun ol manmeri i ken stap bel isi. God i belgut long ol*» (Luk 2:13). Na taim Jisas i kirap long indai, em i tokim ol Aposel olsem: «*Bel bilong yupela i ken i stap isi*» (Jon 20:19). Na santu Pol i

tok: ***God bilong givim gutpela sindaun na bel isi long yumi, em i ken i stap wantaim yupela olgeta*** (Rom 15:33). Na em i tok moa olsem: ***Krais yet i save mekim yumi i stap bel isi na sindaun gut wantaim*** (Efesus 2:14). Olsem na Buk Baibel yet i tok olsem Jisas tasol i save mekim yumi i stap bel isi, long wanem em tasol em i as na papa bilong olgeta gutpela samting.

Nau yumi toktok liklik long Jisas olsem as na papa bilong bel isi na gutpela taim.

1) Jisas em i as bilong bel isi long wanem em i kisim bek yumi

Dispela em i nambawan samting: Jisas em i as bilong bel isi long wanem em i kisim bek yumi. Taim Adam na Iv i mekim sin, orait God i pasim dua bilong heven, olsem na ol manmeri i no inap long go long heven. Long sin bilong Adam na Iv Satan i kam insait long graun, na em i pulim planti manmeri long mekim sin. Olsem na ol manmeri i no wanbel wantaim God, na ol i wok long sakim tok bilong em oltaim. Na maski planti manmeri bilong Olpela Testamen i wok long ofarim planti sakrifais long God, God i no inap long kisim ol i go long heven ol, long wanem Mesaia i no bin kam yet long graun. Sakrifais bilong Jisas long diwai kros i mekim yumi i stap wanbel gen wantaim God, olsem na pastaim long Jisas i kam long graun, orait ol manmeri i painim hat tru long kisim marimari bilong God na go long heven.

Tasol Jisas i dai long diwai kros bilong kisim bek yumi, na sakrifais bilong em i mekim yumi i stap gut gen. God Papa i amamas tumas long sakrifais bilong Jisas, olsem na em i opim dua bilong heaven gen na em i marimari long yumi olgeta.

2) Jisas em i as bilong bel isi long wanem em i givim grasia long yumi

Pastaim long Jisas i dai long diwai kros, dispela graun i pulap long tudak bilong sin. Sin i pulap tru long sol bilong ol manmeri, na ol i no gat ol sakramen bilong kisim grasia bilong God. Olsem na Satan i kamap olsem hetman bilong dispela graun. Jisas yet i tok olsem Satan i bin i stap «*prins*» (o hetman) bilong graun: *Nau bai [God] em i rausim dispela hetman i save bosim dispela graun* (Jon 12:31).

Tasol sakrifais bilong Jisas long diwai kros i winim strong bilong sin na strong bilong Satan, olsem na nau ol manmeri inap long kisim grasia bilong God. Grasia bilong God tasol i save mekim yumi i stap gut na opim dua bilong heaven long yumi.

3) Jisas em i as bilong bel isi long wanem em inap long pinisim olgeta samting nogut


Long Gutnius i gat planti stori bilong Jisas i save mekim ol manmeri i stap gut. Jisas i save kirapim ol manmeri i dai pinis,

em i save oraitim ol manmeri i gat kain kain sik, na em i save givim bel isi long ol manmeri i bel hevi na i gat wari. Nupela Testamen i pulap tru long ol mirakel bilong Jisas i soim olsem Jisas i pulap long marimari na em i gat bikpela laik bilong mekim yumi i stap gut!

Olsem na trupela bel isi i kam long Jisas tasol. Em tasol i gat strong bilong pinisim ol samting nogut i save kamap long yumi. Na taim yumi bungim taim nogut, orait Jisas tasol inap long strongim yumi, bai yumi ken karim pen wantaim bel isi na amamas, wankain olsem em i bin karim pen long diwai kros.

Olsem na oltaim yumi mas kolim Maria em i «Kwin bilong bel isi», long wanem em i karim Jisas, na Jisas em i as na papa bilong bel isi na gutpela taim! Long taim nogut yumi mas kolim nem bilong Maria! Long taim bilong sik yumi mas kolim nem bilong Maria! Long taim bilong kros na hevi yumi mas kolim nem bilong Maria! Na taim yumi laik i dai na lusim dispela graun, orait yumi mas kolim nem bilong Maria wantaim olgeta strong bilong yumi, bai em i ken pulapim yumi long bel isi bilong Jisas, na yumi ken lusim dispela graun wantaim bel isi na go long heven!

OL BUK LONG TOK PISIN
OL PRIS BILONG INSTITUTE OF THE INCARNATE WORD
(IVE FATHERS) I BIN MEKIM



**Buk bilong Gutnius
wantaim Katolik
eksplanesen**
230 pes




*Santu Alfons Maria
bilong Liguori*

**Visitim Jisas long
Santu Sakramen**
142 pes




*Santu Alfons Maria
bilong Liguori*

**Ol 7-pela sori na ol
gutpela pasin bilong
santu Maria**
213 pes




*Santu Alfons Maria
bilong Liguori*

**Rot bilong Diwai Kros na
15-pela meditesen bilong
Pen na Indai bilong Jisas**
168 pes



*Santu Alfons Maria
bilong Liguori*

**Indai, kot,
heven na hel**
165 pes




*Santu Alfons Maria
bilong Liguori*

Rot bilong Salvesen
230 pes



*Santu Alfons Maria
bilong Liguori*

**Ol meditesen bilong
Krismas**
177 pes




*Santu Alfons Maria
bilong Liguori*

Santu Hat bilong Jisas
96 pes



*Santu Alfons Maria
bilong Liguori*

**Novena bilong
santu Maikel**
64 pes




Fr Tomás Ravaoli, IVE

Mi laikim Jisas
Buk bilong ol pikinini
186 pes




**Ol prea bilong
Divain Mersi**
52 pes



Fr Tomás Ravaoli, IVE

Ol Aposel bilong Jisas
*Laip stori bilong
ol 12-pela Aposel*
368 pes



Fr Tomás Ravaoli, IVE

Santu Josep
*Laip stori na ol prea
bilong santu Josep*
232 pes



Fr Tomás Ravaoli, IVE

**Kwin bilong heven,
Mama bilong marimari**
*Ol litani bilong
santu Maria*
249 pes

Sapos yu laik kisim ol dispela buk yu ken salim e-mail:
ive.png@gmail.com

Sapos yu laik save long ol IVE Fathers yu ken visitim web site bilong
ol:
www.ive.org